

1

週年默想 第一冊

N° 416

週年默想

Nº 416

2000 4-37

MEDITATIONES
QUOTIDIANAE IN TOTUM ANNUM

Auctore: P. Vercruysse, S. J.

Translatoribus: P. Joanne-Baptista Hiu, 許采白

P. Andrea Tsian, S. J. 蔣邑虛

— • —
**上
海
主
教
惠

准**

一
千
九
百
三
十
七
年

上
海
土
山
灣
印
書
館
第
二
版
印

週年默想序

演習默想，爲救靈要務，作聖始基。古今來成聖成賢者，大抵肇端夫此。顧通經飽學之士而外，不能無專書以爲之先導。歐美諸國，固不乏方言善本，而我國信人尙缺同文專籍，同人憾焉。許司鐸采白爰將耶穌會司鐸伯羅諾衛爾克慮氏所著週年默想一書，譯以華文，冀公同好。祇以琢句鍊辭，過事深邃，解人難索，致艱餉世，束之高閣者二十餘年於茲矣。去夏升偶閱是書，追念許君劬於筆事，煞費苦心，又荷同人贊修之囑，遂以點

金成鐵之手，削繁就簡，深者淺之，邃者豁之，俾易成誦，幸閱者校不以讐，謬承許可，迺付手民，以成許君未竟之志。凡我教中希賢希聖者，日閱是編，庶幾週而復始，自必德與年增，詎不快哉。是爲序。

南窗侍者蔣升識

MG
B976.1
726
201



3 1773 3638 9

小引

默想爲祈禱之分支，專體諸心，非誦諸口。保祿宗徒所謂，我將
禱以靈，禱以心，歌頌以靈，歌頌以心者是。是禱也，較諸誦禱爲
尤要。烏誥代聖味多爾曰，祈禱非先行默想，或非與默想同行，
則其禱不全。聖奧斯定亦曰，祈禱無默想，則爲溫禱，非冷非熱。
又曰，推思之悟，爲諸善之本。蓋思上主至善，慈愛我人，爲我甘
受苦難，則愛戴之情自熾。倘或思已過犯，想已窮困，則謙遜之
心自深。又或思已冷淡，事主未殷，獲罪孔多，則以爲當受之罰

浩大而以己所受之艱難困苦爲不足道。如是繩愆糾謬，則諸德必當富有矣。聖方濟各撒肋爵曰：默想能得天主寵佑，光照明悟，感動愛欲，熱愛天主之事情，消除一己之謬見，祛私慾，遏偏情，皆惟默想是賴。聖文都辣謂人曰：欲忍世上艱難，須行默想。欲勝內外誘惑，須行默想。欲度平安之日，須行默想。欲避害靈之念，須行默想。一言以蔽之，欲消滅種種弊病，樹立種種善德，莫不當勤行默想。聖多瑪斯亦云：人行默想，卽離諸罪。信心真實，望德堅固，愛情勃發，靈魂安樂，心中平和，能勝誘惑，能消

憂悶，能淨五官，能修德行，能策怠惰，能克偏私。熱愛之火於以
炎，天堂之門於以開。超性之識於以啟。吾儕祈禱之聲，天主必
由是傾耳而聽。聖女德肋撒有云，默想乃自地登天之正路。達
未聖王嘗謂，日夜以思主律者，真福人。自古迄今，聖人賢士，皆
以默想爲修成之基礎，而行之維謹者，蓋以此也。吾儕信人，孰
不願救己靈魂，成爲聖賢哉。請卽於默想之工，加之意焉耳。

默想正則撮要

前工要則

一 遠備，卽預備靈魂善行默想。首當去諸默想之阻，如驕傲、假善、罪過、分心、諸端。次當用諸助行默想之法，如謙遜、誠實、克苦、靜默、諸德。

二 近備，卽在默想前日，或閱或聽默想題目，并細想當求之益。臥後未睡前，畧記默想題目。清晨初醒，專意尋思，勿雜他念。洗面往來時，循題旨激發衷情。

正工要則

默想初工

一 旣至默想處，佇立片時，約念在天一遍之久。當以活潑信德，想天

主在前，鑒我默想。

二 想我卑污罪人，何敢主前對越。卽俯身致敬，伏地朝拜。

三 跪念豫經，認識天主全能至尊，自己懦弱卑污。外當痛悔求赦，并以身靈諸力，全獻於主。懇求天主及諸神聖，助我善行默想。

四 略記經旨題意，倘有故事，亦宜記之。

五 習用定像，卽以所想之事物形狀，陳設目前，一如現在者然。如默想耶穌被釘十字架，卽想自己在加爾瓦略山，親見吾主耶穌釘於兩盜中，全體受傷，滿身流血。聖母聖若望聖女瑪達肋納及他聖女同立架旁。又有惡黨環圍十字架，嗤笑咒罵。云云

六 定像後，按題特求天主，照我明悟，俾我明知真實道理。動我愛欲，使我願行厥道。如默想罪過，求主賜我聖寵，俾認識罪之重大，而

真心悔恨。

首用記司、記憶一端中、或一節中、或一句中、語言行事。言者何人、行者何人、所言何事、所行何事。若遇當信之端、於此須發信德。

繼用明司、以記含所記之言行、一一推究。

一 推究題目中、有何道理。如以人得普世、而失己靈魂、何益之有、爲題。則當推想二端、一、得普世萬物、是空虛無益。二、失己靈、或救己靈、是最重要務、人之禍福、全在於此。云云

二 按此道理、有何實行、當修何德、當去何過。云云

三 推我行此事、有何緣故、或爲稱我地位、及我本分、或爲有益我神靈、或爲我行此事、翕合主旨、甚爲可樂、或爲我行此事、主必賜佑、實爲易甚、或因此行事、爲守分救靈、實爲緊要。云云

四 想我自昔至今，行之何如，善乎否乎。善，則謝主，否，則悔改。

五 想我自今而後，當行何事。卽預究將行之善，將去之惡，而激發衷情。

六 想以後當去何阻，當用何法，以行我所定之事。間嘗阻我修德者，約略有三：驕傲、安逸、分心。而相反此阻，以助我修德者，亦有三法：卽謙遜、克己、束心。

終用欲司，運發衷情，立定志向。

一 激發衷情，如惻隱、痛悔、感謝、驚訝、畏懼、羞愧、欣愉、依恃、愛主、效主、善善惡惡等是。若想主工之奇妙，則發奇異之情。若記天主之宏恩，則生讚謝愛慕之情。若念天主之義怒，天主之顯罰，則生畏懼之情。悉依默想之資，而勃發衷情。倘默想者身居罪過，及諸患難

中。則不得不生謙遜、羞愧、痛悔、求救等情。

二
立定善志、因默想之向、不特在默禱半時、要在洗罪潔靈、遷善修德、堅志事主、勝難去誘、善守本分等事。然此非善定志向、斷不能成。然所定善志、一、當在尋思實理之後、卽所謂按此實理、我將何爲、當去何阻、富用何法也。二、當屬於能行、爲改惡修成、誠爲有效者。如默想死候、卽定志曰爲得善終、我今定志避去某罪某失、務立某德某功。且如何改此惡習。三、當專於特一、不可混通。如定曰、我在某機會、易於忿怒、我今定志忍受。或曰爲愛釘死耶穌、我該忍受此苦。此皆爲特一之志。四、宜在當境。五、又宜每日定志。今日改何毛病、或修何德行。六、當依極堅之故、或爲緊要、或爲裨益、或爲相宜。云云。七、該係謙遜、不恃己力、謙己求主、全靠主寵助佑。又

求聖母瑪利亞、主保聖人、護守天神等、轉求天主賜佑。非然者、終無實益。

默想終工

一 束提、種種善志重爲立定、更發熱愛。

二 須向天主、或聖母、或天神聖人、敬念祝言。或以揚其美、或以訴己困、或以求加恩佑、後或念在天、或誦亞物等經、而畢。聖依納爵屢用別法、卽念向耶穌聖靈誦、并在天亞物等經。一、祈求聖母轉求聖子、賜我聖寵、繼念亞物。二、求耶穌仁慈、作我中保、求聖父賜我恩寵、則繼念向耶穌聖靈誦。三、求天主聖父、因吾主耶穌之功、准我所求、則念天主經。如是默想完結。

徹工要則

一 省察默想之工，從默想前工，至默想正工終，一一查察，行之善否。善，則感謝主恩，否，則痛悔定改。

二 總記默想全局，推究得何光照，知何真理，發何衷情，定何善志。云

三 撮錄聖牖聖感，卽略寫默想中所定之善志，所得之聖光，所動之善念，及定志之理由。

週年默想目錄第一冊

卷一 正月

月省之思	謹行月省之功	八六	初十日	三王得路	二六
首瞻禮六	熱心敬禮主心	八八	十一日	三王朝禮	二九
初一日	耶穌受割損及立名	一	十二日	三王福寵	三一
初二日	吾主割損遺訓	五	十三日	三王歸國	三四
初三日	耶穌立名遺訓	八	十四日	拯救靈魂之要	三七
初四日	恭敬耶穌聖名	一一	十五日	急救靈魂之證	三九
初五日	時候寶貴宜善用	一四	十六日	聖母取潔遺訓	四二
初六日	三王來朝瞻禮	一七	十七日	聖母取潔續義	四四
初七日	三王聖召	一九	十八日	聖母獻耶穌於主堂	四七
初八日	三王應召	二二	十九日	西默盎遇見耶穌	五〇
初九日	三王覓主	二四	二十日	西默盎預言吾主來事	五三
			二十一日	西默盎預言聖母痛苦	五五
			二十二日	天神夢告若瑟	五八
			二十三日	聖家聽命之表	六一

二十四日	聽命三級	六四
二十五日	聖家避難厄日多	六六
二十六日	諸聖嬰孩致命	六九
二十七日	聖家旋歸故國	七二
二十八日	聖家赴京瞻禮	七四
二十九日	耶穌獨留聖殿	七七
三十日	耶穌自殿歸家	八〇
三十一日	耶穌隱居下邑	八三

卷二 二月

初一日	正心誠意	九一
初二日	獻耶穌於主堂	九三
初三日	耶穌隱居時聽命之表	九六
初四日	耶穌隱居諸德	九九

初五日	耶穌隱居時智寵彌增	一〇二
-----	-----------	-----

封齋時默想諸題

第一	封齋時當務之工	一〇五
第二	耶穌赴山園	一〇八
第三	耶穌園中憂悶	一一〇
第四	耶穌山園祈禱	一一三
第五	耶穌臨終困苦	一一五
第六	補贖之要之式	一一八
第七	耶穌還顧三徒	一二一
第八	茹答負責賣耶穌	一二四
第九	耶穌仆衆醫耳	一二七
第十	耶穌受執徒奔	一三〇
第十一	耶穌解送教首	一三三

第十二	耶穌被人定罪	一三五
第十三	補贖緣於罪惡	一三八
第十四	耶穌終夜受辱	一四一
第十五	伯多祿三番背主	一四四
第十六	伯多祿痛泣前非	一四七
第十七	耶穌遞送比辣多	一四九
第十八	茹答失望而死	一五二
第十九	耶穌受人誣罔	一五四
第二十	補贖緣於罪害	一五七
第二十一	耶穌被官審問	一六〇
第二十二	耶穌默不置辯	一六二
第二十三	耶穌受惡王欺藐	一六五
第二十四	耶穌被衆人棄絕	一六八
第二十五	比辣多圖釋耶穌	一七一

卷三 三月

第二十六	耶穌繫受鞭笞	一七五
第二十七	補贖緣思死候	一七八
第二十八	耶穌茨冠苦辱	一八一
第二十九	比辣多攜耶穌出外示衆	一八四
第三十	比辣多復訊耶穌	一八六
第三十一	比辣多決主死刑	一八九
第三十二	耶穌負十字架登山	一九二
第三十三	耶穌途中顧訓都城婦女	一九五
第三十四	補贖緣思審判	一九七
第三十五	耶穌嘗苦膽被襯衣	二〇〇
第三十六	耶穌釘二盜中	二〇三
第三十七	耶穌求聖父赦仇	二〇六

第三十八	聖母痛苦……………	二〇九
第三十九	耶穌恩赦右盜……………	二一一
第四十	兵衆分衣爭笑……………	二一五
第四十一	補贖緣思地獄……………	二一八
第四十二	耶穌託母於徒……………	二二〇
第四十三	耶穌哀號呼渴……………	二二三
第四十四	耶穌吮髓臨終……………	二二六
第四十五	耶穌付神而崩……………	二二九
第四十六	耶穌殮葬石墓……………	二三二
第四十七	耶穌第三日復活……………	二三五
第四十八	耶穌聖身四奇……………	二三七
第四十九	耶穌聖傷痕跡……………	二四〇
第五十	耶穌復活之益……………	二四二
第五十一	耶穌復活之訓……………	二四五

第五十二	耶穌聖墓之榮……………	二四八
第五十三	聖母憂樂異情……………	二五一
三月十九日	大聖若瑟……………	二五三
三月二十五日	聖母領報……………	二五六

週年默想

卷一 正月

月省之思

謹行月省之功

見本卷末

首瞻禮六

熱心敬禮聖心

見本卷末

初一日 耶穌受割損及立名

定像 想見吾主受割損禮始流聖血。

特求 求天主賜我聖寵能日進於德久而不倦。

第一端 耶穌受割 彌八日期。嬰孩受割。路加二篇耶穌誕生後八

日按古教例行割損禮。即今陽曆正月朔旦。聖教特行聖禮。追念吾主於此日盡中保之職。流己寶血。償人罪債。并以一生苦勞。獻於聖



父、以爲救世之資、其愛人之心、何其切歟。余靈、宜以愛還愛。今日度斯聖教新年、將此新年獻於天主、且將此全年、年內隨日隨時、獻於天主、無不爲天主而善度之。并獻我神形諸有、以顯我忠心、證我愛情。雖捨身流血、亦所不辭。慎思此意、敬行此獻。自今以始、奮發勤修、不以此獻爲虛文。

第二端 耶穌取名 瑪利亞將產子、名以耶穌。蓋渠將救厥民於其

罪惡。瑪竇一篇如德亞古例、男孩生後八日受割損禮、定立名號。其名或取義於所值之境遇、或取義於所望之品詣。天主聖子降生爲人、惟天主聖父知其神形諸奧、能與以適當之名。名曰耶穌、譯言救世者。此名最爲榮耀美善。吾主不願一日虛其名、故取名之日、卽流聖血、行救世之功。我於領洗時、得爲天主子、得爲耶穌弟、得受基利

斯當之榮名。雖不必如吾主割損以取名。然亦當法吾主割損以成名。如割損我偏私。行神割之功。非然者。有名無實。非特榮名無益於我。且將來益增天主審判之威。吾人身靈之禍。必求天主施恩於我。常深敬畏。而今而後。顧名思義也可。

第三端 聖教新年 耶穌立名時。割損所流之血。卽所謂新約之血。

瑪竇二十六篇。瑪爾谷十四篇。路加二十二篇。新約者。乃吾主授人

新教。與人新命。許人新賞。欲天下之事除舊更新。天下之人革故鼎新。修道者孜孜爲善。日盛月新。今日旣行新歲之儀文。宜換其舊歲之氣象。卽舊有之愆尤。今須洗滌一新。舊有之善志。今須重振益新。使身靈無染。煥然常新。庶可望天主降以遐福。成爲聖經所稱之新人也。噫。光陰易過。壽算難知。人多有見去歲之新。而不及見今歲之

新者。安知爾見今歲之新。可復見來歲之新哉。當及時加勉。勤滌罪愆。勤立功德。 祝言

祝言註

按祝言在默想畢時用之。照默想題目之意。或向天主。或向耶穌。或向聖母。或向聖人。一。祝言不必多言。巧語。惟心誦。情誦足矣。二。當求天主賜佑。俾我臨時克守所定之志。三。此時亦可他求。如當境之要務。或爲本身。或爲長上。或爲他人等。四。不必專念在天亞物。按聖依納爵之意。亦可敬誦他經。且念在天亞物經中。亦可習念向耶穌聖靈誦。若默想耶穌行實。此經必宜用之。若默想天主聖神。則念肇有聖神。請降願我云云。或伏求聖神降臨。誦。若默想天主聖主之恩。則念吾儕讚頌天主云云。或伏求聖人行實。則念本聖人祝文。但習加在天亞物。五。此經倘有多端。則可雜祝言中。聖依納爵屢用此法。卽念耶穌聖靈誦。并。在天亞物等經。一。祈求聖父母轉求聖子。賜我聖寵。則繼念亞物。二。求耶穌仁慈。作我中保。求聖父賜我恩寵。則繼念耶穌聖靈誦。三。求天主聖父。因吾主耶穌之功。准我所求。則念天主經。諸如此類。

初二日 吾主割損遺訓

定像 想見吾主受割損禮，獻己寶血於聖父。

特求 求主賜我聖寵，俾效法吾主割損時所遺之德表。

第一端 耶穌割損之緣 耶穌受割損之故，今特揭其三：一、授人神割之訓。按古教定例，亞巴郎後裔之男子皆當受割，祇在肉身之一肢一體。吾主躬行斯禮，蓋欲藉以訓人神割。舉凡內外三司五官所有之偏私，無一不當割絕。如謙以割傲，忍以割怒，恕以割怨等類皆是。二、興救世之功。吾主降生爲贖人罪過，償人罪債，然不忍待至三十三年，方流己血。故生後八日，卽受割損，卽流聖血，爲贖我靈魂至珍之值。三、補聖父之光榮。原祖貪食禁果，背命辱主。今吾主降世爲人，雖無受割損之職，亦願敬行斯禮，顯己昭事之虔，以補聖父所受

之辱。尋思此理，當如何動情奮志，勤行我神割之工，以承吾主救贖之恩，以副吾主光榮聖父之旨哉。

第二端 耶穌受割之難 耶穌受割之難，亦有三故。一、受割之痛。八日之嬰孩，體質嬌柔，刀割血濺，思之已令人悽惻。且吾主之肌膚愈精，則其所覺之痛楚愈劇。二、受割之辱。割損係古教洗滌原罪之禮，吾主本無原罪，今遵行斯禮，似吾主亦有原罪矣。以天主之子，而守罪人之禮制，得罪人之形迹，辱莫大焉。三、受割之係。吾主自天降世，不屬法律。今遵行割損之禮，是認己爲法律中人。則其餘諸律，不將一一遵守乎。此皆吾主受割之難之故。而吾主竟忍痛受辱，謹遵教律，此皆遺我深訓也。我固罪深惡重，乃偏畏難畏苦，畏羞畏辱，犯誠犯規，是豈合吾主之徒哉。亟宜愧悔，求主憫憐。至於修德之途，凡遇

艱難苦辱，當以聖保祿宗徒之言勵曰：瞻仰耶穌，思其艱窘，免爾挫志灰心。蓋爾割私斬慝，未嘗及血故也。致阮白勒人書十二篇

第三端 耶穌受割之心 吾主以仁恕爲心，待己甚嚴，待人甚寬。身受刀割，而授人以領洗聖事。從可知吾儕厚道之宜修也。不然，將如法利塞等難免主責曰：舉重任壓人肩，已則一指弗動。瑪竇二十三篇更可知吾主聖心之宜愛也。試問當時呱呱而泣，血淚交流。吾主之心果何存？吾主之意果何注？而我竟毫不覺察乎？況我之本情宜壓抑也，私欲宜芟除也。不壓抑，不芟除，不能成超性之德，不能契吾主之心。主曰：予爲葡萄樹，爾爲其枝。居於予，予父修削之，得結實愈多。若望十五篇惟聖母深明此理，故雖愛聖子之情，最爲肫摯，及見其碎割受痛，承行聖父之旨，而愛子之情有所不顧焉。當仰賴聖母

轉求賜佑。 祝言

初三日 耶穌立名遺訓

定像 想見天神嘉俾厄爾謂聖若瑟曰。名嬰孩以耶穌。蓋渠將救

厥民於罪愆。瑪竇一篇

特求 求主賜我能識聖名之奇妙。得聖名之恩寵。

第一端 聖名爲謙卑之報。耶穌聖名係天主聖父所立。其名之尊
美。上而天神。中而世人。下而魔鬼。無不當聞名欽敬。然不於天神頌
揚時名之。又不於牧童朝拜時名之。而獨於作罪人形狀。受割損時
名之。此蓋天主聖父特錫美名於聖子。爲其謙卑聽命之酬報也。保
祿宗徒曰。基利斯督自謙聽命。緣此天主顯揚伊。加厥美號。超越諸
名號之上。致斐理賓人書二篇我隨從吾主之後。亦每思獲其賞報。

享其榮光。乃今驕傲根心，希圖聲譽，望人知我名而敬我，聞我名而慕我。如是，恐世俗有我名，而天國無我名。甚矣，好名之一念累我也。求主賜我效其謙遜聽命，勤修實德，不美虛名，庶得功底於成，名登天府也。路加十篇

第二段 聖名爲苦割之酬 耶穌爲救世之耶穌，耶穌爲贖人之耶穌。開天門，閉地獄，制仇魔，皆惟耶穌是賴。然耶穌得斯顯名，尙需膚破血流。我爲耶穌之友，又爲耶穌之弟，乃不思力行苦刻，而竟縱欲恣情，如之何其可也。主嘗有言曰：人欲爲我徒，須克己，而荷己十字架。又曰：人弗負己十字架而從予，非予徒，而弗享予。瑪竇十六篇是可知我苦刻之修，最爲緊要。撫躬自問，行之何如。亟宜按時量力，無間補贖神功。

第三端 聖名爲守規之賞 耶穌聖名，至能至奇，凡驅魔痊病救危，念之皆立應。瑪爾谷十六篇聖伯爾納鐸亦讚主名爲口之飴味，耳之音樂，心之快樂，危之望，驚之勇，病之藥，劣之強，患之慰，然吾主得此耶穌之名，在行古禮，遵教令，束身於規矩之時，今爾旣爲修道中人，有修道之名，若不恪遵規矩，全守誠命，則是爾不顧名思義矣。蓋遵守規矩，爲效法吾主之徑路。如聖伯爾格滿等，大抵循規蹈矩，榮主救靈，以致德業有成，名彰後世。今我於視聽言動之間，苟思盛名之下，其實難副。自必戰戰兢兢，奮志自勉，不敢稍有疎忽。如是，則凡吾主聖名之恩，有何不可得哉。倚恃耶穌聖名之德，向耶穌聖嬰祈求。

祝言

初四日 恭敬耶穌聖名

定像 想見聖保祿宗徒訓人曰、上天下地、皆當跪敬耶穌聖名。
特求 求主賜我認識聖名、時能愈顯聖名之榮。

第一端

聖名宜恭敬

經曰、稱之耶穌、厥位大位、厥稱至高者之子。

路加一篇耶穌之名、尊貴莫匹、天主聖父親自命而定之。聖母與天

神俱不能知、世人更萬不能想及、則其尊貴何如。耶穌聖名美妙無比、脫人罪過、賜人聖寵、加人神力、畀人常生、則其美妙又何如。耶穌聖名、威能無限、擊敗魔鬼之強梁、覷破魔鬼之詭詐。邪魔聞之、驚惶遠遁、則其威能更何如。聖額我略曰、吾友、或聞或誦耶穌聖名、宜俯首屈膝、置心而致內外之敬恭。是以聖教禮規、凡司鐸祭時、或聞或誦耶穌聖名、宜低首示敬、與或聞或誦天主聖三之名無異。問我於

斯敬禮聖名之工，果能無怠無荒乎。自愧向多疎忽。定志日後思聖名之尊美，仰聖名之威能，尊敬而倚恃之，不敢稍懈也。

第二端

敬之於心靈

經又曰：稱主名者，宜遠不義。

致弟莫德後書

二篇保祿此言，垂訓吾人欲敬耶穌聖名，宜避犯罪。犯罪則心靈污穢，不可以敬。誠以耶穌聖名，係天主聖父定之，天神報之，聖母聖若瑟稱之。斯名也，驅邪念，滌惡情，愛心清，喜神潔。敬之者，不可稍有不義也。奈何我一生多罪，心靈污穢，如何而可敬聖名耶。我願偕聖女日多達，求耶穌以其聖名大德，以其三司五官諸功力，免我神形諸惡。專心冀願相符保祿宗徒之訓言：耶穌聖名榮光於爾身也。致得撒落尼人後書一篇更願熱心誠意，效法聖保祿與聖依納爵爲廣揚耶穌聖名之寶器。自當蕩滌心身，清潔內外，不致稍染半點塵埃。

耳。

第三端 敬之於言行 經又云、凡爾所言所行、悉宜因主耶穌之名。

致哥羅森人書三篇耶穌與耶穌聖名之光榮、均宜爲我人言之。

始、之中、之末。此外無物可求、無榮可慕。聖伯爾納鐸曰、吾友、或居或行、或作或息、飲時食時、晨時夕時、耶穌聖名不停於口、不離於心、可也。更當於誘惑艱難之際、虔誦聖名、賴聖名功德、祈主賜我所需恩佑、一如吾主所許曰、爾尙倚予名、求予父。予確云、予父卽諾。若望十六篇平日習誦耶穌聖名、庶幾困厄之時、特於臨終之候、得誦之以口、維之以心、以神以意。吁、吾可愛之耶穌、求爾真爲我之耶穌。求爾爲我仰望之耶穌、救我於患難、救我於凶惡。 祝言

初五日 時候寶貴宜善用

定像 想見聖保祿宗徒訓人曰：迄今有時，宜勤務善功。致加拉大

人書六篇

特求 求主賜我寵光，俾識時候之寶貴，慎無虛廢。

第一端 時候寶貴 聖伯爾納鐸曰：時候之寶，等於天國之珍。蓋在天無一聖不善用其時，而得享永福者。且永福每係於頃刻之時，如偕耶穌釘死之右盜，一生作惡，及將死，乃善用其一息之時，求主慈憫，而得吾主許以偕享真福。珠寶之珍，夫人而知價值之貴。然光陰之貴，尤有甚焉。聖人又曰：時候之珍，直同吾主聖血。蓋吾人罷勉行時，得有功於主前，得邀賞於天上，皆賴吾主聖血功勞。然使我日沾聖血之溉澤，發結天國之華實，非時不能。豈不可貴。我今謝主賜我

許多時日。恨我從未珍重。立志以後，莫再蹉跎。

第二段 妄用時候 天主珍視此時，一若甚於耶穌聖血。緣以聖血付人，盡情傾注。獨於時候，則必分寸以賜人。妄用之者，不亦褻主所賜，而自悞歟。夫人妄用其時有三：一、犯罪時候，宜用爲立功事主，今反用爲獲罪辱主。是誠主施我以德，而我報主以怨，可懼孰甚焉。二、好閒。以有用之時，廢於浮游浪蕩，不知所爲。須記憶吾主之言，曰：樹不結實，亦將砍而令投於火。瑪竇七篇異日臨終時，回顧生平多能爲善，而未之爲，將如何懊悔乎。三、越分。爲非己所當爲，行非時所應行。在當局或自恃爲有功，而識者早知其無益。此皆屬妄用時候，不能邀福於主前。試問我靈，於此三者可無一失乎。有，則改之。無，則加勉。

第三端 善用時候 人在世善用一息之時，卽在天多增一分之榮。今我欲善用時候，厥有四法。一、宜靈魂常存聖寵。須知人無聖寵之時，皆爲天堂無用之時。二、宜心存誠意。誠意者，凡事爲天主而行也。經記法利塞等多行善事，然因志在矜張，吾主謂其無天福之酬。瑪竇六篇聖奧斯定曰：人行大步，而不在正途，將焉往乎。三、行事當忠懇。事雖善，意雖誠，而因循了事，亦爲天主詛咒。日勒米亞四十八篇四、用時宜有次序。額我略、納西盎聖師曰：人宜自定日程，諸事按時而作，循序以行。此最爲善用時之要策，亦畢生成聖之基所由始。聖達尼老年歲不過十八，因愛惜寸陰，德臻聖域。求聖人轉求天主。

祝言

初六日 三王來朝瞻禮

定像 想見三王跪伏馬槽前，朝拜耶穌。

特求 求主賜我聖寵，明此瞻禮奧義，效法三王所行。

第一端 瞻禮之意義 昔天主於無數國中，特選亞巴郎後裔，爲己之臣民，令其信識真宗，流傳正教。又許其日後，天下萬國共信一天主，共爲大主一國之民。則此瞻禮之日，係天主踐己所許，使外教進教之始也。聖教會記念不忘，故盛行禮節。作此瞻禮者，凡八日，蓋定例也。吾人幸遇此日，宜謝主賜我信德，賞我進教，更念吾主救人心切，凡尊卑貴賤，無不欲其共沾信德之光。而修道人於此，尤須灼熱救靈之神火，以還主愛，以報主恩，而深感激之情。求主廣揚聖教，另於與祭領主時，勿忘此意。

第二端 三王之行詣 三王生長教外，其溷於俗塵也久矣。自蒙異星顯示，聖寵照臨，遂自遠來朝，敬禮真主。其行詣，不第當時教外所足重，實更爲後世教內所堪師也。吁！天主所啟佑於我者，不爲不多矣。聖寵之輔翼於我者，不爲不厚矣。而我之輕世諸德，能如三王之棄國不顧乎。克己諸功，能如三王之茹苦若甘乎。且三王尋主，不避譏疑，獻禮用昭誠敬。問我於欽崇奉獻諸工，亦曾專心致志，誠心實意，仰法三王之遺表乎。後當朝乾夕惕，時以三王之行詣，爲我範圍也，可耳。勉之勉之。

第三端 三王之賞報 三王朝拜吾主之時，盡誠致敬，獻以三禮。天主如何賞報，雖經史未有明文。然吾思之，賜以聖愛上智諸德，報其黃金之獻。賜以熱心善禱諸恩，報其乳香之獻。賜以立不朽之功，得

常生之恩寵，報其沒藥之獻。夫人獻菲儀，得主珍賞。人獻世物，得主天錫。則是人所獻者寡，而主所報者多也。今我既多獻主之機，更有獻主之責。乃不竭盡心力，恢宏器量。以己毫釐之獻，望得主無窮之賜，則又何哉。亟宜向耶穌聖嬰，獻我心身。祝言

初七日 三王聖召

定像 想見三王觀星情動。

特求 求主賜我聖寵，隨主默禱，善用主恩。

第一端 聖召之恩 耶穌既降誕，瑪日東來，入都曰：適生國王安在，吾見厥星於東。瑪竇二篇吾主遣天神報本國牧童之際，卽顯景星於天，以召外國君王。無數君王中，克愼厥修者，未必祇有三王。可膺主召者，未必僅在三王。而三王獨能得此殊恩，獨能信識吾主者，此

乃天主超奇之寵也。今天主拔我於眾人中，賜我聖召之恩。果因我身靈清潔乎，抑因我行止聖善乎，更因我才學過人乎。非也。夫學優行粹之人，天下不知凡幾。而天主特賜我寵召之恩，謂非恩愛之獨厚哉。主曰：非爾擇予，實予選爾。若望十五篇我當欣謝主恩，效法保祿宗徒曰：賴主聖寵，得爲今日之我。致哥林多人前書二篇勉勵身修，得如宗徒。致天主聖寵無虛於我。同上

第二端 聖召之福 吾主未誕之前，世人坐於暗冥，及於死影。今者主已降世，如太陽普照世人。昔者三王生長教外，未免惑於異端。及其目見新星，心得聖寵，則去舊更新，始得救靈作聖之基。試問爾未得主召之時何在，非在囂塵濁世，迷途日遠，流而忘反乎。回溯當時，心地是何情景，靈魂有何功修，日久必將有何禍患。今既舍歧途而

行正道、棄險阻而步康莊、幸何如也。須動我知恩之情、憶伯多祿宗徒之言曰、主自幽谷、召我於神異之光。前書二篇亟思何修以用主恩、以補前過。

第三端 聖召之殊 樸誠謙下如牧童者、主遣天神召之、博學通文如三王者、主現異星招之。夫天神、受造中最尊者也。星、受造中無靈者也。主之寵錫各別、而人之感應無殊。故不必泥於品位之高下何如也。然牧童身居微賤、而主遣天神召之。可知天主所重者、不在尊榮富貴、而在謙貧諸德。三王精於天文、而天主以異星顯示之、可知天主引人於善、每因人所素習、以啟牖其心也。是故凡欲進修、必須有聖寵。凡欲導善、必貴乎知人。再者物不可不格也、知不可不致也。以此人世本性之學、能得天主超性之恩。斯理卽於三王証之。求主

賜我明其旨，而行其事。祝言

初八日 三王應召

定像 想見三王棄國離家，同往朝主。

特求 求主賜我常隨聖召，不畏艱難。

第一端 三王速應主召 吾見厥星於東，來敬。瑪竇二篇夫星現於天，見者不止三王，而來敬者不過三王，此誠請者多，簡者寡也。蓋當時之見星者，雖亦皆得主默照，然因朝主之心不急，且有俗事牽連，心下疑貳。斯躬覲聖容之殊福，讓三王獨專也。今爾日近聖體，龕側，日蒙天主洪恩，奈何拜主之心，既疎且怠，而立功改過諸念，又復多所遲回。睹此三王，曾亦自知愧悔否。定志自今而後，於與彌撒拜聖體諸工，黽勉從事，不敢不奮。

第二端 三王勇赴主召 三王既蒙主召，欲往朝拜。雖不知路途之遠近，歲月之淺深，而棄國家如敝屣，慷慨長征，凡臣工之諫阻，鄰封之訕笑，道路之艱險，天時之寒冷，概不顧及。噫，三王之心，何如是之勇毅也。今爾既幸爲教友，立身修途，彼仇魔之攻誘，非如臣工之諫阻乎？異端之毀謗，非如鄰封之訕笑乎？肉身世俗之糾纏，非如道路之艱險，天時之寒冷乎？爾所有之阻碍，同乎三王，而爾之勇毅，不及三王。是三王獨成爲賢，爾自甘於暴棄也。吾願爾於榮主救靈之事，務思希聖希賢，使見義必爲之勇，不讓於三王也。

第三端 三王友愛相將 世風澆薄，人情莫不此疆爾界，畛域各分。以三王生長旣殊，性情復異。一旦見星朝主，中道相逢，難免不肥瘠莫關，行止各別。乃因愛主心誠，推而愛人念切，故旅進旅退，始終來

去。行合趣同，是誠何如善表也。今爾於同居一院者，未免嫉賢忌善，於同處一堂一室者，未能導義輔仁，相親相愛。觀此，可知爾無愛人之德矣。切宜求主助佑，使爾以和愛待人，不致矯情自異。祝言

初九日 三王覓主

定像 想見三王不見新星，客路添愁，入城探問。

特求 求主賜我明識三王之行止，知所取法。

第一端 三王之恆心 適生國王安在。瑪竇二篇千里奔波，忽失引

導。以常情而論，三王雖敬主心虔，然既星隱無憑，即可將此事作爲罷論。三王乃不然，詢曰：適生國王安在？此蓋天主故爲曲折，以試三王之恆心，以爲吾人之表率。夫修德繕靈之士，蒙主聖寵，固心暢神怡，欣欣自得。及魔鬼攻擊偶猛，檢點稍疎，則志灰心墜，欲修德立功，

幾不知何從措手。須以三王爲法。星見則欣然就道。星隱復訪問。始終一念。不稍失望。則心以磨而愈堅。德以修而愈粹。疑慮不能搖其信。憂危不足擾其神。如是。凡不恆其德之譏。人亦無從藉口矣。

第二段 三王之忠勇 阢落德恃力奪位。猜忌多端。不但新王爲其所忌。卽欲朝新王者。亦其勢有所不容。況乎殘殺居心。尤爲可畏。然三王信主甚堅。慕主甚切。惟思得主所在。先覩爲快。故凡阢落德之疑嫉酷虐。皆不計及。其勇敢可謂出人頭地矣。今我潔身奉主。三仇攻誘於前。七罪蠱惑於後。無非欲我畏難苟安。半途中止。倘使稍自怯懦。則貽害將有不可勝言者。惟望克去私欲。德業加修。寧可殺身以享主。不可獲罪以偷生。如是。則諸患諸艱。不足阻撓我之志願。求主堅我信心。增我愛德。庶幾於事主之途。恆能忠勇前行焉。

第三端 惡王之驚懼 三王所稱之國王，卽降生救世之天主。吾意
阨落德聞之，不知宜如何慶幸，如何羨慕矣。乃經云：國王舉城心皆
不寧。瑪竇二篇是則偏於勢位富厚之念，有以致之也。試問爾於平
常無事之時，忽覺形神惶擾者，果爲靈魂舊罪可危乎？抑爲罪人臨
死未救乎？更爲聖教被難不安乎？夫任情恣性，自多心煩慮亂之憂。
而修德立功，遂有心慰神怡之樂。求主佑我，鋤去偏私。 祝言

初十日 三王得路

定像 想見三王辭別阨落得，前往白冷。

特求 求主賜我善隨神師之訓迪，又賜我明於爲善，言行相顧。

第一端 君臣問答 王集解經諸司，問究救世將生何處。對曰：如大
白冷。瑪竇二篇天主上智，以惡王暴虐，解經司之頑劣，亦可使三王

得其路徑。卒獲見主。吾人奉代天主位者爲師。雖其德業。或有未深。而天主欲我承行之事。必不准其謬爲導引也。且三王生長異邦。身居外教。乃不遠千里而來。敬禮吾主。而解經司專治教務者。乃毫不加意。所謂引人上升。而反自下墮也。在世俗之人。勤於神業。而吾輩修道之人。反而怠荒。亦猶是也。此爲吾急宜自省者焉。正人更宜正己。淑己而後淑人。抑或明知道義。不特口誦。更當心維。毋如解經司之徒。讀父書。明於責人。而暗於責己也。可耳。求主賜我經明行修。戒慎乎言。出而躬不逮。

第二段 惡王詐僞 王乃密請三王。詳諮新星。從見至今。經幾歲月。後命之曰。赴至白冷。勤究嬰孩虛實。尋旋報。吾欲往朝。同上阨落德問星現之時。欲知聖嬰年歲。而欲殺同年之嬰孩。以便掩殺聖嬰也。

噫，惡王之詐僞極矣。囑以勤究嬰孩虛實，言已亦欲往朝，實則欲往殺吾主。惡王之心，亦毒甚矣。乃又命之曰：尋旋報，使三王助已爲虐。則惡王之作爲，更不可問矣。我靈當知詐僞之病，卽不至於大惡，然終爲天主所恨。此固吾人亟宜加意防閑者。故凡貌爲忠厚，心存機械，以及沽名釣譽，面諛背毀，種種詐僞，務卽深省而痛改之。

第三端 三王喜悅 三王聽畢，辭君出，見星，忻喜異甚。同上三王日前不見新星，雖覺中懷抑鬱，然不至敗興而返，仍能壯志前行，訪問主之所在。旣聞確耗，遂急於就道。凡城中風景，概不寓目，一若爭先恐後。乃天主酬其忠勇，竟復使新星飛空引示。彼時三王心中之喜悅，莫可名言。吾人矢志進修，亦宜如此。有時偶遇艱辛，而神業之功，仍不稍減。則天主之賞賚，安慰其靈，正可預料矣。求主賜我常能欣

悅於天主之事。祝言

十一日 三王朝禮

定像 想見三王長跪聖嬰前，奉獻禮物。
特求 求主賜我聖寵，效法三王虔恭誠切。

第一端 三王敬禮 至嬰孩降生處方止。入室見孩，偕瑪利亞厥母，
跪伏地。瑪竇二篇吾主誕生之所，馬槽也。今三王入此馬槽，見嬰孩
在聖母懷中。不嫌居處卑陋，不厭諸事貧乏。朝衣朝冠，跪伏於嬰孩
足下。不但敬之爲國王，且欽崇之爲天地大君，認爲救世恩主。吾意
三王於此，目覩聖容，注想其奇妙，必衷情灼熱，深謝吾主降世爲人。
且幸已於億兆人中，先得莫大聖寵。於是將國家人民，神形諸有，盡
獻無遺。其內外之虔誠，有筆舌所難盡述者矣。余靈問爾赴主臺前，

誦經默禱。凡行敬禮之工，其性情心志，果何在耶。自愧多不恭之罪。定志於誦禱之時，端肅容儀，不敢稍懈。

第二段 三禮之義 啟筴，獻黃金乳香沒藥三禮。同上三王敬拜吾主後，復獻禮儀。雖三禮爲本國土產，然得天主默啟，於各禮物中，皆含奧義。黃金以貢奉世王者，乳香爲焚敬天主者，沒藥乃塗斂人屍者。三王獻此，表誠信吾主爲天地大君，眞爲天主，眞爲人，異日代人贖罪，受苦至死也。經有云，爾至我臺前，不宜空手。然則吾於誦經默禱之餘，亦當多行神工，獻於天主。獻主以本身所產，思言行動，必正必誠。獻主以珍貴之儀，克己救靈，毋荒毋怠。獻主以豐富之物，德修日新月盛，有始有終。庶幾吾主鑒我微忱，納我所獻也。

第三端 獻禮之殷 小民負曝，野人獻芹，物本無足輕重，而情殷獻

納其誠意實有可嘉。如三王所獻方物，非絕世之珍寶。然吾主所以不吐棄者，誠以其未獻時之懇摯，既獻時之恭敬耳。故凡修道者，矢絕財絕色絕意三願，以代三禮之獻，皆須實心實事，懇懇懃懃，卽修德之信友等，或獻愛慕上主，哀矜窮人之黃金，或獻熱心祈禱，感化他人之乳香，或獻克己私慾，助人善終之沒藥，總宜真情寔意，展己至誠。庶可望天主不負己所獻，而自身亦不愧己所獻也。試問爾曾何如獻禮之情意？又何如，如此常自深省，亦云可矣。向耶穌祈求。

祝言

十二日 三王福寵

定像 想見三王侍立馬房中，不勝神樂。
特求 求主賜我與分於三王之福寵。

第一段 見聖嬰 入室見孩、偕瑪利亞厥母。瑪竇二篇吾主聖容、固

先知古聖皆以一得瞻仰爲大快、以不獲親淑爲可惜。主嘗謂徒曰、

逆知者多、君國者眾、願視爾攸視不能視。路加十篇亦謂時人曰、亞

巴耶爾曹之父、願視子、視且喜。若望八篇當時西默盎功高德盛、天

主許以終前親救世者。及一見聖嬰、卽無任忻喜。歌曰、請主命僕安

謝世兮、目親救世者兮。路加二篇今三王蒙主異寵、覲主聖容、且得

勾留其地、與主盤桓一室、親炙有時、其福分之大、可勝言哉。然爾與

天主同堂同宇、朝夕相共、所有福寵、未必遜於三王。昔主嘗云、乃有

不見而信、斯果真福人。若望二十篇望爾堅爾信心、證爾信德、庶自

求多福、時蒙主寵也。恭賀三王。自深欣幸。務於誦經拜主時、恒凜然

如在目前、如在左右之思。

第二端 見聖母 聖嬰在聖母懷中，三王見聖嬰，亦見聖母。見聖母令儀令容，不勝驚奇，歎賞不已。又見聖母端莊溫靜，謙恭諸德，則敬慕之情，不覺油然而生。且於言語之間，敬述己何時見星，何日登程，中途何如相遇，新星何如引導，以及不見新星，入城何如詢問等情，聖母胥聽於耳，而會於心。喜吾主已顯示人世，乃諄諄訓諭，囑三王以敬主修靈之要務。然則吾人於此，亦當虔誠恭敬，請訓於聖母，而奉爲師保焉。

第三端 懷聖嬰 三王既覩聖嬰之容，聆聖母之訓。時吾主逾格施恩，俾得親主手足。又默啟聖母，將已送三王手中。三王此際，所受聖寵之光，所有愛情之熱，以及心神之歡慰，惟三王自得之，而自知之。然三王未嘗含主於口，懷主於心也。吾於領聖體時，得與吾主契合。

爲一。而乃毫不動念也。何哉。夫世俗常情。凡事有履行者。卽至重之工。亦每易於怠忽。若我旣欲沾無極之寵恩。自當心專情摯。與主締結。又安可淡然無味。而視爲奉行故事耶。求三王賜我有分於其福寵。祝言

十三日 三王歸國

定像 想見三王將歸。叩拜吾主。告別聖母。

特求 求主賜我聖寵。俾與主交際時。常存三王熱愛之心。

第一端 自別道歸。瑪竇聖史記三王歸由別道。二篇別道者。非來時之熟徑。未免轉多險阻。且不旋報惡王。則失約不信。尤易招彼怨恨。然三王俱不慮及。可知人欲翕合主旨。自當不畏艱苦。革除情面。況三王之歸。其心思念慮。惟有愛慕耶穌。輕賤世物。深思克己善工。

勤顧救靈要務。較諸昔日所爲，夫固前後如出兩人也。吾儕與天主交往之餘，亦當稍有進境，別於往日。否則退後不前，於己亦難無愧。問我德業之修，何故鮮能精進。宜亟思有以悔改云。

第二端 別道之義 前日之路，不見新星，而遇阨落德，極危險之路也。況其遣三王尋訪，未必不伺之於原路。倘三王循原路而歸，則既遇惡王，事有不堪設想者矣。是以爾於前日之地，前日之人，致爾有獲罪之危者，不當再與之交往。倘爾再往，再與締交，吾恐爾靈魂諸事，勢將有禍生不測矣。夫三王未歸之先，未嘗慮及乎此。乃天主竟於夢間，阻而示之，可知人能愛慕天主，依賴天主，則天主之眷顧，亦有出人意想者焉。吾願爾於從前獲罪之地，裹足不前。引爾辱主之人，拒絕不遑。又願爾敬主之虔誠，別於曩時之疎忽。修靈之阻勉，異

於前日之優游。舍舊謀新。改途易轍。庶可望歸天國故鄉。而受樂無窮也。予靈勗哉。

第三端 將別之情 三王未歸時。心有不忍別主之情。恨不克終身侍主。故於將行之際。特以心身家國。重託於主。再三敬拜。求主降以遐福。且既行而後。猶未免回頭瞻望。依依不捨。吾靈爾於與祭領主之後。眷戀吾主之情。果曾如是乎。抑或心馳意放。毫不再念及之乎。相傳三王已去之後。爲善歷三十餘年之久。受洗於聖多默宗徒。終能爲主致命。同躋聖域。其頭骨猶供在高老尼普國省城大堂。信友敬禮者甚眾。蓋其恆德尤足爲吾人追法焉。慶三王在世之功。賀三王在天之福。懇其轉達。祝言

十四日 拯救靈魂之要

定像 想見耶穌謂眾曰、爾等先求天主國、天主義。瑪竇六篇

特求 求主動我愛欲、賜我諸事恪遵主訓。

第一端 救靈至要因事關永遠 能臣謀國曰、長治久安。君子省身、曰、近憂遠慮、雖皆爲永遠計、究與靈魂之禍福、毫無關係。蓋世事皆死而後已。惟靈魂之禍福、死後僅爲始時、歷千百萬年、仍無已時、誠事之最永遠者也。故富貴壽考、悉有了期。而天國永遠真福、能救靈魂者、自綿綿不絕。奈世人惟勤世務謀生、只顧功名利祿。而靈魂之禍福、反置之度外、吾恐異日身在烈火中、將欲離此永遠萬苦、必悔之無及矣。人以世福爲永遠者、誠屬至愚。我求永遠之天福、方爲大智。宜思何者爲救靈上策、矢志一生永遠遵行、以合吾主先求天國之訓。

第二端 救靈至要因一失永失 世間萬事，失之可以復得。如江山人民、房屋田產、功名利祿、妻子室家，苟一息尙存，皆可使旣去者重復歸來。獨靈魂一失，則永失，無法挽救。古來死而復生者有之，出地獄而復救其靈魂者，未一覩也。保祿宗徒曰：宜戰戰兢兢，以救靈魂。致斐理賓人書二篇又曰：吾自苦吾身，強其服役，毋致訓人道德，引人升天後，而反自下墮。致哥林多人前書九篇又教宗聖額我略曰：永遠之事，無處無危，卽無處可云安妥。且天神自天獲罪，自天而隕永獄。古昔聖人功高德粹，心志堅於主寵，尙知靈魂一失不可挽回，而時加戒慎，則凡修道者可縱恣疎忽，絕不知所戒謹，而深恐懼之心乎。爾勿自恃，務克制偏私，以去救靈之阻。

第三端 救靈至要緣無人可代 世有所謂要務者，雖係已分中之

事。他人亦能代行。獨救靈一事。則推諉無從。責難旁貸。聖奧斯定曰。天主造爾。不需爾。其救爾。必需爾。人惟自救厥靈。乃可不失厥靈。故臣不可以代君。子不可以代父。夫不可以代妻。卽修道之人。雖有師長督率。規矩防閑。然只能整飭其躬行。究不得制治其內心。而增益其德修。若非自心汲汲。以崇修爲務。不亦危哉。多默更比曰。汝宜常自警覺。勸勉。無論他人如何。汝終毋自忽也。汝宜常憶汝之終局。蓋既失之時。不再來也。師主編一卷二十五章求本名聖人助我修靈敬主。祝言

十五日 急救靈魂之證

定像 如聞吾主言曰。天國格之以力。惟强者奪之。瑪竇十一篇
特求 求主賜我自知於救靈之事。有何心志。而奮勵進修。

第一段 有心於身靈最大之事者必日夜圖維 於此有人身被獄訟。事苟有關於田產之存亡、室家之憂樂者。則必隨時隨地、竭慮殫精、常以此事縈懷、求所以保全之策。今我於修德救靈要務、果能晨昏舉動、念茲在茲乎。恐惟務求空虛之利祿、浮幻之聲名。一切救靈大事、永遠禍福、反置諸度外。今當自慚自愧、自痛自懲。俯仰視聽之間、效法聖類思自問曰、此於永遠之事、有何關係。

第二段 有心於身靈最大之事者必時憂或失 天下人視安樂爲最大之事、惟恐失落。故肉身之利便、愚者窮形盡相以求之。人世之榮華、鄙者處心積慮以謀之。患得患失、今古皆然。然最大之事、孰有甚於救靈者乎。而我乃優游自得、一任其失去、毫無惜之之心、不用救之力。是不知靈魂之貴、不知救靈之急也。夫救靈必須竭力、方

有功效。故主曰：天國格之以力，惟強者奪之。見上求主以喪失靈魂之懼，啟迪我心。聖經云：終日畏懼罪於主，庶能有望於末時。 喻經二

十三篇當定志常遵守此訓。

第三端 有心於身靈最大之事者必敏行無倦。世之居官者曰：廉敏曰無倦。爲士者曰：敏於事，敏於行。卽爲商爲農者亦曰：倦則必敗，誠以事切心身不如是，不足以有成無失也。況靈魂之事，其重大切要，更遠勝於爲商爲士爲官。誰謂崇德修慝，可遲回瞻顧，不必盡心竭力，奮往直前乎？彼務虛浮事業，猶知慙慙，不憚煩勞。今我於身靈大事，竟若以爲無關緊要，或作或輟，可自便乎？嗚呼！何計之左也。多默更比曰：若非謹慎致力，至終不獲善德。汝若始行退阻，將卽不善矣。師主編一卷二十五章類思聖人若天神之美質，至潔至精，每痛

苦以自懲，最嚴最密。求其轉達，使我常存救靈修德之實心，力行不怠。祝言

十六日 聖母取潔遺訓

定像 想見聖母端莊恭敬，在堂行取潔禮。
特求 求主賜我常隨聖母之訓，師效其德。

第一段 守規聽命 古教之律，婦人受孕生子，禁止入殿。待四旬後，赴堂獻禮取潔，司祭者代祈，乃得復入。聖母產生聖子，不損童貞。其身極淨，原無庸取潔。乃亦行此教禮，毫不推辭。此蓋與吾主不須割損，而仍受之，以聽聖父之命，以遵聖教之規，其義一也。夫至尊天主，至潔聖母，尚不至尊至潔自居，甘願人視爲平常子婦。吾大犯罪人，何於行事之間，竟喜矯同立異。觀耶穌與聖母，曾亦自知慚愧否。

求主寬宥前愆。定志將來善守公規。

第二端 謙遜甘貧 聖母身爲天主之母。至潔童貞。今乃受行古禮。任人視若尋常不潔之婦。聖母之謙遜深矣。蓋聖母所重者實德。不重虛名。惟求聖德悅樂主心。不願美名稱揚人口。內有盛德。而外辭美名。是誠何如謙表也。夫取潔獻禮。按古教例。富者獻羔羊一頭。又或班鳩或鴛鳥一翼。貧者獻或班鳩或鴛鳥二翼。聖母前曾受三王黃金之禮。今卽購羊以獻。事亦不難。然見吾主樂爲貧人。自身亦甘受貧苦。素爲貧人。卽盡貧人之禮。行貧人之獻。此皆醫人稱豪誇富。徒事驕奢之病也。聖若望有言曰。爾自謂充裕。自謂富有。詎知爾實爲哀憐之輩。內外空虛。默照經三篇故吾願爾心存謙下。工務神貧。如是。則實德克修。無愧爲聖母孝子矣。

第三端 虔誠端肅 聖母於殿前行取潔禮、奉獻儀物、其心最虔、其意最誠。步履之端莊、舉止之恭肅、皆爲人所不及。有古賢名弟慕德者、謂西默盎蒙聖神默牖赴堂、而於聖母巾帨之間、識其爲天主聖母。猶言聖母在堂、動靜起居、威儀容貌、足令人知其內蘊奇德。惟天主降生之母、乃得至斯。何則、聖母在堂、如日覩聖三、思主有之尊榮、無對、念身受之恩德、無窮。於是欽崇感謝、愛火炎炎、流露於形色之間。問爾於赴堂瞻禮時、凡內外功行、果能效聖母萬分之一乎。抑不能如聖母之虔誠端肅、而心身怠惰乎。頌聖母之德、求聖母之佑。

祝言

十七日 聖母取潔續義

定像 想見聖母在堂、謙恭祈主。

特求 求主賜我寵佑，洞明聖母取潔奧義，做聖母之儀型。

第一端 聖母敬主 聖母可不行取潔之禮，而仍行之者，其間奧義甚多。今特首揭之曰敬主。敬主有二義，一、遵行主命。蓋聽命者，即非本分中應行之事，亦行之不辭。人若惟於不行而有罪者行之，於不行而無罪者即不行焉。則是居心陋劣，而獲罪之端，恐即於是開矣。二、聖母效法吾主之表。日前聖子不須受割，乃竟自甘受苦。今聖母不須取潔，而欲肖似聖子，亦自甘受辱。吾欲遵主聖訓，成爲完善之人，蓋以此二意，先體味而躬行之。

第二端 聖母淑人 聖母取潔又所以淑人也。淑人有二義，一、免招人尤。夫聖母誕生聖子，人盡知之。而聖母之爲童貞主母，則人不知之也。倘不行取潔之禮，恐詫異者既多，效尤者亦將不少。聖母不忍

以己之故，墮敗聖教定令奉行必謹也。此訓我事有本不可行者，然不行將陷人於失，則行之可也。事有本可行者，然行之將引人於惡，則不行可也。二、聖母欲遺人德表，蓋炫異矜奇，乃世人之通病。而聖母欲以非常之品行，範圍於平常規矩之中。且訓人以上主之寵恩，掩藏庸俗人之耳目。此皆所以貞純其德，吾人所當留意者也。於此二者，先聖先賢俱善能則效聖母。吾何獨不知黽勉乎？求主助佑，而今而後，凡我所行，樂與人同。

第三端 聖母修己 聖母取潔，更所以修己也。修己亦有二義。一、增己潔德也。所謂增潔德者，非謂聖母潔德有所不全，而欲補之。實謂聖母因效法耶穌，不以取潔爲己至潔之玷，故爲是以滙潔德之源，朝潔德之宗，使其潔德愈覺皜然也。按聖師之論，聖母聖產，愈著其

童貞之耀。聖母取潔，益增其潔淨之華。故我於語言行事，亦宜滙主德之源，以盈我德之缺。庶幾事半功倍，沾益更爲無窮。二、加己善功也。此爲以上諸義之總旨。蓋聖母無取潔之責，而其所以赴堂恭行斯禮者，無非欲崇己神靈之業，增己道義之功也。試問我於尋常職分之中，能無怠忽乎。素習之功修，果能精進乎。觀聖母之勤於修己，能不慚愧乎。今當奉聖母爲法式，求其轉達助佑。祝言

十八日 聖母獻耶穌於主堂

定像 想見聖母盡誠盡禮，獻耶穌於聖父。

特求 求主賜我聖寵，能虔誠獻我所有，得以專行主旨，悅樂主心。第一端 聖母進堂之情景 聖母懷抱吾主，躬入聖堂。憶昔三歲時，入堂自獻，十餘年來，砥礪清修，蒙主寵錫，則當日之心虔神慰，自有

出人意表者。且當日堂中所遇之奇，天主所享之榮，皆爲從來所未有。蓋從來賢媛淑女，哲士達人，登斯堂者，不知凡幾。然未有童貞天主之母，更未有人而兼主性之耶穌。且從來鶉鴿牛羊，牲牲旨酒，獻於斯堂者，亦不知凡幾。而未有除免世罪天主之羔羊，常活之犧牲。總之嚮日斯堂，天主惟受世人敬禮。今日斯堂，天主乃得天主欽崇也。我也每往聖堂，行瞻禮，與大祭。雖未得捧主於手，豈不能懷主於心乎。苟知效法聖母虔誠之德，自可與分聖母神樂之恩也。賀聖母登堂獻子，大彰天主光榮。凡我赴堂拜禮，可偕達味聖王曰：吾輩將詣主宮，予且欣然。

聖咏一百二十一章

第二端 聖母獻耶穌於天主 古時義辣厄爾眾民居厄日多國，天主命之回鄉，國王堅不肯放。天主乃遣天神，盡殺通國長子，并令人

以後各獻長男，以誌往恩。既獻二親，獻禮贖子以歸。聖母之獻耶穌，比常人之獻，不啻萬倍全美。常人獻子，惟行禮以遵教規。聖母獻子，實奉聖子於聖父，爲萬民贖罪之犧牲，償普世罪人之重債。誠至美至富之獻也。是時聖母衷情，高深莫匹。及其獻主之餘，日內與人酬應，無非慎言謹行，尊其瞻視，歛其神心，一心對越天主。世有於瞻禮之日，縱情肆志，終日閒遊，以至珍之時候，爲獲罪之機緣。卽或修德之人，亦不知以瞻禮之日，怡情養性，裨益身靈，觀於聖母，急宜取法焉。

第三端 耶穌自獻於天主 聖母獻耶穌時，耶穌亦自獻於聖父，以補其榮，以贖人罪。蓋耶穌爲聖母首子，萬世諸人之長兄。其愛人之心，一生如是，無時稍懈。故在襁褓之中，已願爲吾人之犧牲，不惜捨

己性命，而爲古今諸獻之獨擅其勝者。斯獻也，諸天神爭觀之，聖父樂受之。賜世人無疆之福，開羣靈永生之門。思念及此，當如何感激，如何慶幸。亟求合於耶穌之獻，以全奉我神形於天主。噫，我之獻身事主，亦云晚矣。若猶遲疑懈怠，不思忠勤奮勉，果何以爲情乎。求聖母轉祈天主，賜我常存苦刻祭獻之心。 祝言

十九日 西默盎遇見耶穌

定像 想見西默盎抱耶穌聖嬰於懷中。

特求 求主賜我恩寵，得與分於聖人之神慰。

第一段 西默盎之品詣 當時都城中，有德義敬畏天主之士，名西

默盎。切望天主，將慰本國。聖神恒居厥心，許厥終前必親見救世者。路加二篇德義者，諸德之總匯，使人契合於主。敬畏者，保存天主聖

寵使人常合於主。因有敬畏之人。不但懼犯大罪。獲罪於主。且細微之過失。亦皆畏避。恐致離於天主也。此時先知古聖。悉已云亡。皆不獲親炙吾主。惟西默盎堅心切望。待天主慰顧斯民。勤修德義。常存敬畏。得於終前。親見救世恩主。此乃天主之洪恩。亦聖人之殊福也。吾苟誠求天主。增修實德。亦將不虛所望。惟在吾自勉之。而自求之耳。發倚主之情。審我平日所以有求不得之故。特加修我祈禱之工。

第二端 西默盎之神恩。是日承聖神啓牖。詣聖殿。適二親抱嬰入。欲行定禮。伊迓而捧嬰懷中。同上西默盎隨聖神默啟。趨赴聖堂。得見吾主。倘其是日稍有遲緩。不往聖堂。何從得與耶穌相遇乎。以是知爲善之機不可失。聖寵之光宜急用也。且天主許其終前。目覩救世。今且賜其手抱聖嬰。是所賜過夫所許矣。吾若於天主所許者多。

而所行者寡，得毋太吝嗇乎。聖嬰之外貌，無異常兒，司祭副祭等皆不覺察。而西默盎一見，卽知爲救世主。蓋世俗眼明之人，與天主寵照之人所見各自懸殊。彼視以肉眼，此視以信德。彼視萬物，惟見形形色色，心戀情牽。此於受造諸物，洞徹造物之奇妙，提其意向於塵俗之外，舉其心思於天國之間。今我身居何等，能勿求天主聖神，明我神魂之目耶。

第三端 西默盎之喜悅 捧吾主於懷中，充盈神樂。歌曰：請主如昔許兮，命僕安謝世兮，目覩救世者兮。爾攸置於兆民前兮，其來如光。普照異教人兮，因榮福本國民兮。同上歌中稱主爲救世眞光，榮福本國。蓋世間人皆倚賴主功，得其光照，遂出幽離死，而本國人民，因爲天主之民，亦藉增榮耀矣。歷觀西默盎亟願離世，惟思見主，并歡

欣慶頌吾主。其信望愛諸德，自是加人一等矣。玩味聖人之言，及聖歌之意，可獲無窮神益。向西默盎懷中之耶穌祈求。祝言

二十日 西默盎預言吾主來事

定像 想見聖母聽西默盎預言吾主受難。

特求 求主賜我明識耶穌降生之義，善用其救贖之恩。

第一端 其允爲多人淪喪哉。路加二篇救世之主，反爲多人淪喪者，

何故。因多人既知耶穌爲天主，而不肯欽崇，或妄用主恩，而不從主命也。由是可知，不但平常信友，徒聽訓迪，而不遵誠規，足以淪喪心靈。卽從事修途者，倘或違犯規則，名不副實，亦適以所受之聖寵，害己靈魂。且人受主恩愈多，而不能善用，其辜恩之咎愈重。余靈知喪靈之可懼，須痛改往日辜恩之失，定一勇毅志向，以後實行功修，不

致淪喪爾靈也。

第二段 其又爲多人振舉哉。同天主教降世，原爲振拔世人。人若用其救贖恩功，無有不能興起者。聖保祿宗徒曰：人間聖教之真實，而知之明，信之篤，以昇天國，是天主所欲也。且天主仁慈無限，或有失愛獲罪者，每反加聖寵，佑其悔過。或有失信背教者，每亦默佑其心，回頭向化。經紀主云：吾不欲罪人神死。聖教會中多少聖賢，相繼踵起，無不賴主振拔之功，且無不用己振作之力。吾何獨委靡不振，不思感激奮興，致負吾主振舉之恩。余靈戒之哉。不肯受吾主振拔者，必將淪喪也。

第三端 其又爲亂矢所集之鵠者。同上斯言也，不特於吾主身後驗之。蓋吾主自幼至壯至死，無不應驗此言。試觀降世數月，惡王卽欲

加害。傳教中年、頑民持石投擊。或鄙其訓誨、誣爲惑衆。或百計圖謀、肆行毒害。卒之棘茨集於頭腦、鐵釘集於手足、戈戟集於肋旁、無非驗矢集之一言也。今爾受主多恩、不思立功榮主、反而獲罪辱主、重傷主心、非以吾主爲矢集之鵠乎。夫世俗之常情、凡善人爲善、惡人每妬忌、而思加害。爾旣知此、當爾於進德加功、須有苦不辭、有難不懼。繩愆糾謬、一切思言行動、無不歸向吾主。以吾主爲修成之鵠、必思命中入彀。如是、則幸甚矣。須向爲我甘受苦難之耶穌求賜恩佑。

祝言

二十一日 西默盎預言聖母痛苦

定像 想見西默盎謂聖母曰、將有利刃刺爾靈。
特求 求主賜我聖寵、能實心實意體聖母之艱難。

第一端 聖母痛主苦難

爰有利刃刺爾靈。路加二篇西默盎此言、

蓋謂聖母見耶穌受無數苦難、釘死十字架上、其心痛極、如被利刃刺透也。夫痛苦根於愛、愛爲痛苦之分量。愛既深、則所愛者受苦、而愛者自痛。且所愛者之苦愈甚、而愛者之痛亦愈深。聖母愛耶穌之情、與耶穌所受之苦、皆非人口舌所能述。則耶穌受難時、聖母之痛苦、亦非人思念所能及。謂爲利刃刺靈、誠慨乎其痛之無以復加也。余靈、爾愛主之情何在。爾若愛之、則見吾主受人侮慢、被爾凌辱、能無抱痛於心耶。

第二端 聖母終身常痛

聖母之痛苦艱難、於耶穌受難時爲最。然

聖母極智、先事預明。其刺心痛苦、致命艱難、雖隱觸於此時。實隨耶穌與時而俱長、歷三十三年之久。噫、聖母之心、痛苦極矣、洵諸致命

之后哉。一日，聖母現於聖女彼利日，大曰：吾懷抱聖子，口親聖心時，預知茹答將行口親之禮，已如刀劍入吾靈。吾哺養聖子，乳飲聖子時，預見惡人將飲以醋膽。我已酸苦滿心。其餘如聖母同耶穌起居出入，所有之痛苦，亦可類推矣。大凡愈近主，則苦愈多。苦愈多，則德愈純。此爲進德之定理，崇修之真訣。天主欲聖母之痛苦，如此深且長者，意在斯乎。吾能不稍自勉力，克苦己身，以效法吾主苦難，及聖母痛苦於萬一耶。求吾主堅我愛苦之心。日中每思吾主與聖母之痛苦，以策勵我躬行。

第三端 聖母山頭極痛 爰有利刃刺爾靈，此言於耶穌受難時益驗。蓋吾主負十字架陟山時，冠茨冠，披紅袍，路途跌仆，滿面血流，卒之裸體懸於架上，聖母一一目覩。惡人譏笑咒罵之聲，及吾主祈父，

口云苦渴之聲。聖母亦一一親聞。嗚呼。此時聖母真萬劍攢胸。豈獨利刃刺靈哉。繼又近立架旁。視主死。送主終。誠以信德之堅。剛德之純。故含悲忍痛。始行其獻於主堂。終成其祭於山頂也。存想聖母之痛苦。默體聖母之艱難。發我衷情。祝言

二十一 天神夢告若瑟

定像 想見聖若瑟寐時。天神告以赴厄日多避難。

特求 求主賜我效法聖家。堅於信德。能抑制本情。忠行主命。

第一端 主命避難 若瑟寐時。天神告曰。起。携嬰及其母。逃避厄日。

多居於彼。俟予報汝。因厄落德將捕嬰而害之也。瑪竇二篇吾主在襁褓中。卽衝霜犯露。昏夜流離。以避凶鋒。苦莫甚焉。赫赫大主。而懼懼仇人之手。辱莫深焉。常情論之。天主於此。或殄滅惡王之性命。或

隱戢惡王之心思、或震雷霆之怒、顯神異之能、以保全吾主。豈不於吾主之尊、更爲相宜。然而人以謂辱者、天主適以爲榮。何也。因耶穌之謙卑、適以尊天主之崇高。耶穌羞辱愈深、天主尊榮愈顯。且耶穌受辱、不但致榮於天主、亦裨益於吾人。使人於修德之途、有所效法。受苦之際、得所安慰。見聖教之受艱、善人之被難、知所感激而奮興。謝主示我謙德之表。求主賜我勇德之恩。日後凡遇艱辛、歡然承受。

第二段 命傳若瑟 聖若瑟爲聖家之長、受聖父委託、有捍衛聖子及聖母之責、有使令聖子及聖母之權。其德固遜於聖母、而天神傳命、必於聖若瑟者、誠深重其榮位也。今之鐸德、有赦罪之權、祝聖聖體之能、吾人尊敬之、亦理所當然、不可任意輕視也。夫若瑟於寐時、天神告以携嬰暨母、偕往厄日多、并不告以何日返里、其故何哉。蓋

訓人不可離主與聖母，又不可貪安樂以違長命，更不可隨己私意，以選擇何地何事也。更觀若瑟聆天神俟予報汝之言，並不詰以何日來告。可知若瑟聽命之德，純乎其全矣。彼鄙笑尊長，固執己見，藐視長命者，深自思之。

第三端 聖家順命 若瑟連夜携嬰及母，往避厄日多。同上聖若瑟聞天神傳命之言，速卽就道，不別親鄰，不備資斧。一切天寒路險，異國他鄉之患，皆不慮及。聖母雖爲天主之母，究係聖人之淨配。故一聞呼喚，亦卽遵行無怠，毫無怨恨。不嫌主令之嚴急，不懼道路之阻且長。惟小心翼翼，眷顧聖嬰。嗚呼，聽命如此，誠不愧爲耶穌之忠臣矣。我自思之，每於聽長命之時，非厭其煩，卽怪其急迫。雖勉強應諾，亦多遲延了事，潦草塞責。彼聽命如瞽之訓，竟漠不關心。則可知我

於信忍諸德，猶未堅矣。求聖母聖若瑟轉祈賜佑。祝言

一十三日 聖家聽命之表

定像 想見聖母同聖若瑟往赴厄日多國。

特求 求主賜我聖寵，俾於順命之德，卓然不羣。

第一端 聖家聽命之純全 捨一己之欲，不矜己見之明，事無大小難易，惟以長命是行。是則聽命之不參己見，而其德乃爲純全。觀聖母與聖若瑟，因厄落德捕殺耶穌，主命逃避。聞命之後，初不問主，何不束縛惡王之手，而免伊等去國離鄉。又不問主，何不諭往三王交善之邦，而免伊等赴厄日多宿仇之地。更不問主，何不早宣斯旨，而免伊等披星戴月，行色倉皇，不得備辦一切。噫，聖母與聖若瑟之所以如此者，惟以主旨爲己行事之正的。故一聞主語，卽敬謹奉行，毫

無異說。觀於此，吾人當勉修聽命之德，仰法二聖之善表也。若行長命之事，而究其所以命之之故，則雖云聽命，實已參以私意，雜以私願。而聽命之功，已多虧缺矣。我於奉命行事之間，極宜去我私意，除我鄙見。偕吾主曰：父欲如是，悉繇於父無測之意。瑪竇十一篇

第二端 聖家聽命之迅速 若瑟與聖母既聞主命，毫不遲延。按聖史所記，若瑟卽起而傳命於聖母。聖母謙恭承順，懷抱耶穌，不待天曉，寒夜起程。其言曰：若瑟星夜起，携聖嬰暨厥母，遁至厄日多。瑪竇二篇觀此，二聖聽命之勤，又可爲我師表矣。須知當時二聖若稍遲其行，則禍誠有不堪設想者。正惟二聖聽命不遑，故吾主得免於難，而二聖之功爲莫及。今我於聽命之餘，每不能罷勉從事。雖有時間聲相喚，而意存苟安，殊多濡滯。最可慮者，因循既慣，卽良心不安，累

及於人，亦不稍顧。較之二聖，豈不相去遠甚。爾宜奇異二聖於若是艱難之命，聽之勤而迅速。自知愧悔，定志以後，宜則效之。

第三端 聖家聽命之勇毅 若瑟與聖母既聞主命後，無怨尤，無愠怒。懷抱聖嬰，遠逃異國。心志不爲撞擾，舉動不形憂疑。若是者，誠以聖母與若瑟知耶穌在己懷中，堅心切望，必克勝諸艱難，不致負屈也。我修聽命之德，苟能奉我愛欲，獻我明司，不畏艱難困苦，諸事依賴主佑。天主亦將藉長上之手，引我至天國本鄉也。爾宜時以此理憶念不忘，自能無憂無懼，無慮無疑。毅行主旨，克成大功。保祿宗徒曰：我於堅勵我者，無有不能。致斐理賓人書四篇求聖母聖若瑟助我洞明斯旨，恪遵斯訓。祝言

二十四日 聽命三級

定像 想見聖保祿宗徒訓人曰、爾聽命、宜以誠樸之心、如聽耶穌

基利斯督。

特求 求主賜我識明聽命之理、勤修聽命之德、

第一端 奴僕之聽命 凡聽長命之時、意有所畏懼、非畏懼不契主旨、惟畏懼不獲人心。因而在尊長前、勉爲循規蹈矩、及至私居獨處、卽恣行己意、不顧職分。如是聽命、與傭人奴僕放於利者之行無異。在主前毫無功德。其心志之卑陋、亦可想見。若向善與修道者、志在效法吾主、其聽命時之心思、愈固宜超出於此。然平心靜論、試問爾獨居獨行時、果能守規聽命、一如當長上面時之忠且敬乎。恐陽奉陰違、隨時難免斯弊、爾亟宜慚愧悔改、聽長上之命、盡除傭奴鄙陋之心。

第二端 世俗之聽命 世俗之人與長上交往，每以爲快事。誠以可免許多支吾，亦可多叨小惠。故遇其有事，務必善爲周旋。如是聽命，全屬本性，無聽命之真功實德。人世稱之爲明哲，天主實以爲貳行。此非修德者之所尙。然試問爾服長上之權，行長上之命，悅長上之心，誠爲天主乎？抑自爲計乎？意念間之長上，果如言語中之長上乎？背後之長上，果如當面之長上乎？恐面譽心誹，外喜內怨。自省之餘，可知聽命爲何如矣。思爾於聽命之德，尙多瑕疵。當自謙於主前，求其寬宥。定於諸凡行事，惟求悅主。

第三端 超性之聽命 凡人依信德，信天主欲以人治人，欲長上代己位，行己事，宣己命，使人屬於長上，一若屬於天主。如是存心行事，則其之聽命，可謂非聽長上之命，實聽天主之命。知長上原爲同類。

之人，其所以服下從令者，視天主於其身也。懷此信心，謹行長命。斯得聽命之真，成聽命之德，立聽命之功。樂天主之心，而合於達人智士之行矣。人果能從事於斯，則其功德實爲超越。卽行細微之工，亦必獲天主賞報。吾儕當汲汲以求，黽勉以圖之者也。謝主賜我明此道理。求主賜我全此修爲，增我信愛，加我神勇。向常享主面，時行主命之護守。天神求爲轉達。祝言

二十五日 聖家避難厄日多

定像 想見聖家往避厄日多一路備嘗艱苦。
特求 求主賜我聖寵，俾我卓然於聽命之德。

第一端 途中苦景 若瑟奉天主命，携聖子聖母往避厄日多一路
淒涼景況，殊足動人靜思。蓋聖子爲襁褓之孩提，聖母爲柔弱之處

女、寒夜奔逃、異常辛苦。風號曠野、霜染征衣。二聖於此時、爾愁我冷、我畏爾饑。見聖子瑟縮堪憐、要亦相對淚零、歎顧復之不能周備矣。噫、天主待己所愛之人、何竟如此嚴肅也。然天主待二聖如此嚴肅、而二聖之德、反因主嚴肅而益彰。且抱耶穌於懷、見耶穌於目、覺諸苦無非甘飴之味。是誠何如德表也。吾人爲捍衛耶穌、及敬愛耶穌之故、雖受千辛萬苦、亦當怡然自樂。不忘吾主山中之訓曰、爲義而被窘難者乃眞福、爲其已得天上國。求主賜我常存爲主耐苦之心。

第二段 耶穌苦心 聖嬰在聖母懷中、身雖無恙、而心中之愁苦多矣。見聖母與聖若瑟爲己跋涉長途、歷遭困躓、其苦一也。愛二親之情愈摯、則憂二親之苦愈深。況當時有千萬嬰孩、亦爲己而慘死、其苦二也。聖嬰之心、至仁至愛、原欲普救羣生。而惡王反毒恨深仇、必

盡殺之而後快。其苦三也。至於風霜冰雪。衣食不全。居處不安。猶其苦之次焉者也。余靈須知爾平素欸待耶穌。較之惡王害主。使主歷受艱苦。其情亦猶是焉。思念及此。若不體諒吾主苦心。而自行克苦。豈理也哉。豈理也哉。

第三端 聖家客況 聖家居於厄日多。身極貧乏。潛修靜處。人莫之知。然於天主目中。最爲尊重。天主心中。最爲歡洽。厄日多。國邪教盛行。異端充斥。聖家則欽崇天主。盡其禮。事奉天主。盡其誠。厄日多人驕奢淫佚。放辟邪侈。種種惡習。流而忘返。聖家則守諸德之範圍。立衆人之儀表。蓋訓我不論居何位。處何地。與人交際。當效聖家之端方堅定。不爲流俗所移。尤須整躬率物。潛移默化。使親炙者薰德而爲善良。彼夫身在教會。且日居主宮。得聖神恩寵。薰陶涵育。而猶不

免招人淪落也。哀哉惜哉。求聖母聖若瑟助我日勤修省。隨地隨時效其善表。祝言

二十六日 諸聖嬰孩致命

定像 想見嬰孩慘殺情形。其父母呼天號泣。特求 求主賜我忍耐世艱。安心聽命。

第一端 惡王忿怒 阨落德覺被三王攸給。怒甚。瑪竇二篇三王允
阨落德既究新王虛實。後回反命。嗣蒙天主阻止。自別道歸。阨落德
爰以三王爲欺詐。不勝忿恨。遂欲殺耶穌。因欲殺耶穌。遂致盡殺白
冷嬰孩。其故何哉。爭名貪位故也。蓋爭名貪位者。心多猜忌。事有不
遂己意。每疑爲人欺侮。如阨落德之於三王。心本不良。已欺三王。而
反謂三王欺己。譬之眼帶墨鏡。不謂鏡質本墨。而謂所視之物皆墨。

不亦誣乎。究其病根，不過一幕榮戀位之心，而流毒遂至於此極。甚矣，私欲惡情，苟不及時早滅，則其禍必有甚於火之燎原者。余靈當慎之又慎。

第二段 盡殺嬰孩 王急下令，命卒廣行白冷，及厥隣壤，盡殺凡二週以下嬰孩。同上此等嬰孩，皆不知事，不知主，不知教。無知被難，何以榮之爲致命者聖。蓋惡王爲主而殺之，嬰孩爲主而死之，是皆屬爲義致命者也。夫吾人茹苦建功，不僅在患難之鉅細，且在心意之誠正。須知有許多艱苦，既非吾選擇，亦非吾自取，然不得不受者，如天時之燥濕，氣候之寒燠，病苦之困厄，職任之勞瘁，種種皆是。我若爲主安心忍耐，亦立功補過之善機。聖會祝文云，諸嬰孩致命者，不以言而以死顯爾名。其口訥訥無言，其死稱揚主榮。猶言凡人敬主

修靈、不宜僅以言語、更當加以實行。余靈勉之哉。

第三端 殺嬰何益 昔時日勒米亞先知云、喊聲連天、悲哭弗絕。同

上當時白冷與四近隣壤、皆痛子冤屈夭死、哀聲滿野、慘怛難名。然抑知諸孩雖死、誠有無窮之利益榮福。聖若望金口曰、倘無此死、孰知斯孩異日非辱主殺主之類乎。則惡王殺之、適所以榮之。夫厄落德本虺蜴爲心、豺狼成性、欲殺一孩、忍殺千萬嬰孩。豈知所欲殺之一孩。早已他避。而繇此一舉、遂令人知救世者已生、而救世者之名益著。且令人恨惡王之嗜殺、而惡王之暴虐愈彰。欲滅主命、反揚主榮。厄落德之毒謀詭計、亦何益哉。世上固有災招无妄、冤戴覆盆者。然安知非天主鍾愛其人、欲玉成其德、而使之先受苦辱乎。余靈當悟徹此理、苦辱災難之來、安聽主命。慶賀諸聖嬰孩榮福。祝言

二十七日 聖家旋歸故國

定像 想見聖若瑟携聖子聖母旋歸故里。
特求 求主賜我脫卸世緣，時能翕合主旨。

第一端 聖家作客他鄉 聖若瑟偕聖母往厄日多而居，待厄落德亡。瑪竇二篇嬰孩致命後四年，厄落德亡，相傳又後三年，聖若瑟有還鄉之命。七年作客，舉目無親，想其與聖母亦難免望故鄉而興歸去之歎。然有一念自慰曰：吾在斯，乃天主所命，是以雖居異國，常覺安舒可樂。此訓吾人不論何職何地，時常時暫，皆當安心聽命，不忘長上，正所以代天主位，而措置各事。地位縱或頻移，職任惟求自盡，克除私念，隨遇而安。不然，多默更比曰：妄想他適，以得平安，悞人多矣。師主編一卷九章求主賜我心無依戀，隨在務契主心。

第二端 聖家旋歸故里 天神告若瑟曰、携孩暨厥母、往義撒厄爾地。覓殄孩命者已逝。同上聖若瑟與聖母羈寓厄日多、多年薰陶隣里、感化者諒不乏人。守望相助、和好久敦。一旦棄此室處、別離爲難矣。況風塵跋涉、幼年耶穌、既不能襁負而走、又不可徒步相隨。以常情而論、得無愁悶形於聲色乎。乃二聖聆命後、竟告別朋儕、携耶穌毅然就道。卽旅況蕭條、亦毫不爲慮。蓋訓我當奉命遷調時、不宜戀何人與我友善、何地與我相宜、何物於吾利便、難於決捨、而瞻顧徬徨。惟當效法聖母與聖若瑟、情超物外、心脫世緣。如是、則攸往咸宜、亦何在而不樂也。

第三端 聖家退居下邑 若瑟聞亞格老嗣阨落德父位、懼入其境。後因天神致告、至加理勒亞省、居納匝勒府。同上天神告聖若瑟、覓

殺耶穌者已死，聖人似可無憂矣。乃猶懼入其境，何也。蓋善人之心，雖在平安之地，仍多戒慎，常恐貽害吾主，有累己靈也。今觀聖若瑟於疑慮中，祈主光照，而得天神回示。正訓我凡行事，宜謹小慎微。在艱虞之際，當望主啟牖，求主導引。否則，游移浮躁，後悔恐難幸免。納匝肋下邑也。聖若瑟携耶穌暨聖母，捨京都省會，而居此叢爾微區，遂成耶穌納匝肋諾之稱，其有得於吾主卑以自牧之心者，不亦深乎。自念我身，亦宜合主聖心，效聖人懿行。求聖若瑟作我事主繕靈之主保。祝言

二十八日 聖家赴京瞻禮

定像 想見聖家跪伏殿中，虔恭祈禱。

特求 求主賜我於聖體前，有活潑之信德，與熱愛之心。

第一端 聖若瑟往行瞻禮 伊父母每年上日路撒稜如瞻禮規。路加二篇如德亞京都有大聖殿一國人奉天主規令男子每歲赴殿瞻禮者三卽巴斯卦大瞻禮及五旬與支篷二瞻禮。五旬者巴斯卦後五十日卽今聖神降臨瞻禮。支篷者係如德亞人記憶祖先出厄日多國後於曠野間蓋篷而宿赴堂之數固爲不多然以程途計之實爲不少。虔誠如聖若瑟者遵規常往必以不能多往爲歎也。我遠離聖堂不過數步且與主同一宮殿而主之全靈全身又恆在聖臺俟我往謁加我恩寵我能副主期望時往敬拜而頌禱乎。夫勢處便易機會又多乃竟如此疎忽辜負主恩不大可惜哉。須常體味主言曰爾來就予。瑪竇十一章又曰吾心愉悅乃與人偕居。喻經八篇定志此後公拜聖體外務必多行數次慎無懈怠。

第二段 聖母偕往瞻禮 伊父母往日路撒稜。同上觀聖經之語，可知聖母雖無遠行之分，而亦與聖若瑟同赴瞻禮。蓋聖母心中，不獨急行分內之事，卽分外之工，亦勤行不怠。以期光榮天主，裨益己靈，遺表他人。其懿行實可爲修德者之至範，亦可開諸神師之定訓。誠以人苟欲進修凝道，凡誦經默禱，克己苦身，仁愛謙良諸德，皆須分外加功。若善工止限以本分，則心已鄙吝。恐天主寵恩漸減，而本分之工，亦將不能盡。危孰甚焉。謝主待我寬洪，求主恕我吝嗇。思何以擴我事主修靈之量，而自勉之。

第三端 耶穌亦往瞻禮 耶穌年十二歲，無往瞻禮之責，乃亦偕往者，此其急務主事，遺吾人以當效之表也。試思當時聖母與聖若瑟引耶穌赴京。耶穌在路，如何沉靜，如何端莊，及其登堂，如何熱愛，如

何虔恭。在堂內、或俯伏、或長跪、或坐或立、誦經默想、又如何全心全意、向慕天主、尊榮天主、并其謝主寵恩、獻己性命、爲贖罪之犧牲。更如何爲本國人民、及爲天下萬民祈求、凡此皆躬行之善表、令我效法。使我凡赴堂及與祭時、外貌當知所歛抑、內心當知所恪恭也。試問我平日、果能則效其萬一乎。想諸天神當時見聖家瞻禮情形、亦必驚奇歎美。求其助我能法此表。 祝言

二十九日 耶穌獨留聖殿

定像 想見聖母聖若瑟尋覓耶穌。

特求 求主賜我聖寵、俾我心靈締結耶穌、至終不失。

第一端 耶穌獨留日路撒稜按教宗額我畧之言、吾主行蹟、每含至意訓人、其自留都城、不告雙親、一任雙親心憂。正訓人先務天主事、

先求天主榮。而本性之情，雖出於至公至正者，亦宜有所不顧。且訓修道者，死於血肉之情，變其愛親常情，爲超性神情。所謂變常情爲超情者，非謂殄滅其情，乃謂據於信德，而妙用其情，使其情更爲有益。世有遵道而行，半途而廢者，多繇昧於此義，不能悟其理，而忠信守之也。謝主免我物欲之迷。求主賜我堅恆之德。倘以親戚之故，受魔鬼誘惑。當思主言曰：凡愛父母，踰於愛予者，非予徒，而弗享予。瑪

寶十篇

第二段 聖親三日痛苦覓主 瞻禮旣闋。共七日伊等返。乃童耶穌獨留日路撒稜。厥親弗知，度在同行者中。迨行竟日程，乃訪求於親族及相識者，不獲。返日路撒稜覓之，同上聖母聖若瑟，全心愛慕耶穌，以耶穌爲己之生命。今不見耶穌，心中傷痛，不可名言。噫，吾人獲

罪失主，反優游自得，不知尋覓。足見衷情冷淡，弗克一心愛主。聖賢訓曰：失耶穌者，不但犯大罪離主，卽獲小罪疎主，亦爲剪除神靈之慰，撤去契主之飴。往昔聖賢及精修求道之人，皆悲憐此失。多默更比曰：吾儕之過犯惡習，致吾沉伏難起，少得仰思天上之事，實爲吾痛責之資。師主編一卷二十一章求主賜我，雖不能充盈神慰，究不失救靈真樂。宜務日死於世，而常活於主。

第三端 聖親獲見耶穌於聖殿 聖母與聖若瑟尋覓吾主。三日後，乃見在聖殿，端坐司教者中，載聞載問。聖母語之曰：兒，曷使吾輩若茲，爾父暨予悲痛覓爾。主答曰：曷予覓哉，弗知有吾父之事，予當與之。同上當知聖母與聖若瑟尋覓吾主。正訓人不論如何失主，必當痛苦尋覓，以期復得見主。吾主亦訓人當先公義而後私情，究不能

以父母昆弟親友之情，而致失事主修靈之業。蓋事主爲吾人宗向，修靈爲吾人要務。彼本性之情雖重，猶其小焉後焉者也。再者聖母聖若瑟尋獲吾主在聖殿，此又訓人靈魂有罪，失去神樂必赴堂經痛告，乃可重獲安慰。試問吾果嘗遵此訓乎。自思之，自勉之，可也。

祝言

三十日 耶穌自殿歸家

定像 想見耶穌與二親携手同歸。

特求 求主賜我沉靜端莊之德。

第一端 去日路撒稜。耶穌十二齡，論道於司教者中，聽者駭異，爲其聰穎，爲其應答。同上吾主於此，似已可興傳教之工。然吾主不欲，故仍如同年之孩童，隨親歸里，抑歛已愛主救靈神火，潛修一室。待

後領聖父之旨，始行出世誨人。吾主此行，所訓人者三：一、成物當先成己，淑世宜先淑身。潛居爾室，勵志精修，成作聖之基，求希賢之詣。此修道者，必以初學爲始也。二、未上有上司意旨，不宜急圖試用。惟宜志務救靈，匿采韜光，卽遮掩己之才德也，守時待命。三、旣受一職，或居一院，毋涉塵世之喧譁。蓋世無穩妥之區，惟獨居修省，與主交遊，乃爲樂土。我自知多有不符主訓，多獲愆尤，急宜謙卑求佑。定志日後，或居或行，務期矜平躁釋。

第二端 回加理勒亞 前日已想見聖家在堂之容儀，今試卽其歸家後之模範思之。夫聖母與聖若瑟，日共主處，朝夕起居，莊敬溫柔，固足動人靜想。而吾主與二親，晨昏侍奉，謙恭孝愛，尤堪令人深思。且吾主自幼至長，凡工作偶暇，飲食餘閒，彼此相談，無非降生贖罪。

榮主救靈之奧義。而聖母與聖若瑟日間行事，亦惟是舉步不忘主旨，動念必合主心。此中淵微意致，誠足爲我躬修之寶鑑焉。保祿宗徒曰：汝等端肅，見示於眾。致斐理賓人書四篇觀此，可於日中行事後，反心查閱，凡語默動作，不合主範者，務當速去爲要。

第三端 下返納匝勒 天主子降來人世，方其初生，選境遇之最爲貧苦者，卽馬槽是也。及其稍長，選里居之最爲卑狹者，卽納匝勒是也。故時人言及此邑，則鄙之曰：自納匝勒，何能出美物。若望一篇吾主居處如是，正所以責世人，而砭其傲病也。蓋人情好事矜張，喜向名區而托足，樂寄華屋以棲身。且有藉辭廣化斯人，而實則求顯於眾。觀及吾主，曾亦汗顏自愧乎。夫以全美之主，尙逃羣避俗，隱迹藏修。而我乃行違其表，不知養晦葆真，非徒致辱天主，且剷除功德，自

損身靈，不亦愚哉。急宜真心悔改，向聖家求賜恩宥。祝言

三十一日 耶穌隱居下邑

定像 想見納匝勒城中有一卑小人家，吾主與聖母聖若瑟隱居在內。

特求 求主賜我聖寵，明識吾主隱居之義，而仰法其行。

第一端 吾主隱居之奧 吾主降世，非僅爲受難釘死，救人永命。且爲傳教誨人，引人繕靈敬主。然如此絕大事業，限於三十年後。依平常識見而論，吾主正當及早顯世，急行聖父之命，用昭過化之功。乃竟幽居下邑，在三十年中，無人顧問。此吾主隱居之奧也。倘爾見主如此行踪，必將如當時之人謂主曰：請示爾於世。若望七篇恐將廢時失事，則主必斥爾猶無知識焉。蓋吾主密行聖父之旨，乃所以訓

世人及諸修德者，樂道慕義，晦名隱迹，不求聞達也。求主賜我明徹此隱居之奧，俾他日年衰身病，臥守一室，勤行祈禱，克苦諸工。道雖不傳於世，功可裨益於人。如是，良足慰也。

第二端 吾主隱居之故。欲明主隱居之故，當知吾主降來，以贖人罪，以治人病。而人之罪病，無不根於驕傲。故吾主一生所訓所行，胥以抑傲崇謙爲本。主嘗曰：法予，予性良善，心謙遜。瑪竇十一篇主又曰：神貧者乃真福。五篇主更曰：自上必被黜。路加十八篇倘主訓人以言，而不導人以行，則人因傲病根心，縱或明其理義，究莫凜其箴規。必羣相曰：吾主教人卑以自牧，輕世甘貧，何乃自享光榮名譽也。於是將吾主之法言嘉訓，置若罔聞矣。吾人屢見吾主謙卑至極，尙難抑吾傲心，不肯屈伏人下。若非吾主身先立表，而欲吾持謙克傲，

豈可得哉。宜急務芟除傲病之根。求主賜我真謙之德。

第三端

吾主隱居之表 斯豈非梓人。豈非瑪利亞之子乎。瑪爾谷

六篇 天主子臨格人世。似爲梓人子。且自爲梓人。居於陋室。運斤伐

斧。削墨引繩。多默更比曰。喜人不知。悅受人藐視。此二者皆人性所難。而吾主甘心處之。三十年久。則其聖表。誠足爲神聖所歎異焉。然當知吾主助聖母負薪汲水。偕若瑟度木掄材。其榮主救靈。實不遜於異日活死起癱。發聾振聵。諸功力。蓋德之修成。不在事業之輝煌。惟在承行主命。故雖執業卑微。苟能誠心熱愛。亦可有造於賢關聖域也。經曰。爾於諸事。宜超然行之。辨德經三十三篇向隱居救世之主。求賜佑加勉。祝言

正月月省之思 謹行月省之功

定像 想見吾主曰、清爾所掌產業之計。路加十六篇

特求 求主賜我聖寵、明識前月之善惡、而急行修改。

第一端 謹行月省之緣 一月之內、定期定候、退避日常事務、行修省之功、察前月之進退、謂之月省。賢聖神師、多以此訓勉吾人。蓋善行此工、天主必加寵恩、而吾人修途之精進繫焉。自我上次月省以來、一月之中、爲人作苦已多、不知因時自省、寔屬太愚。且我避靜中之善志、或多遺忘。平時神業、亦多怠忽。修德凝道之功、未免疏惰。恐一旦逢艱險之誘、無力支持。逐一思之、可知月省之不可不謹慎以行焉。況吾人居世、不啻曉煙風燭、一月之中、死亡者不知凡幾。若我此番月省、爲一生末次、豈不尤將精心銳意、以修整我身哉。感發恐懼願望之情、求本月主保助佑。定志每月、及時務行退省之工。

第二端 謹行月省之法 月省之法。約歸有四。一、畏懼。恐視之輕易。

而不能忠敬以行。經曰：畏懼爲上智之始。聖咏一百十篇二壹志修

省前夕。盡其心思。以圖善行此工。預備默想。又擇題之更能啟我明。

動我心者。三、夙願。將就寢。滿望得此內省之益。神力加勇。神業加修。

得愈顯主榮。愈益神靈。四、力求。赴堂與祭。倍切虔誠。亦可領聖體。加

行苦刻。以邀所願之恩。此四者事非重難。而所係非淺。尙其篤信行

之。偕達未聖王曰：主我心已備。訓我承行爾旨。聖咏一百七篇一百

四十二篇 以上二端。卽爲今日默想之題。後五月默想題目見下。

第三端 謹行月省之工 此月省之工。要在審察靈魂之景況。而明

識何事宜改圖。何修宜增繕。修道者旣行此省身之工。而又訴心於

神師。待其指引。亦善舉焉。至其條目工夫。一、澄心靜慮。置身於天主

臺前。二、求主光照，望得識己之明。三、細心省察前月之言行動止。四、重定善志，整治躬修。五、將我善志獻於聖母，求其轉獻於主，轉求賜佑。以此諸端，謹慎恭行，而修德之途，不見前進者，我不信也。向本月主保虔祈。 祝言

正月首瞻禮六 熱心敬禮主心

定像 想見吾主顯露己心，謂我曰：汝視此心，如何愛人。
特求 求主賜我熱誠敬禮聖心。

第一端 敬禮聖心之歸向 敬禮聖心之歸向，有有形者，有無形者。有形者，即耶穌血肉之心，結合於天主物爾朋者，宜用敬天主之敬以敬之。無形者，乃耶穌之至愛，而心爲斯愛之官司，斯愛之宗主。從可知斯敬禮之歸向，爲耶穌人性最尊之一體，天主性最美之一德。

聖心與神愛是也。思及於此，宜感發熱衷，竭誠敬禮，以盡斯首瞻禮六之意義。蓋斯日之儀制，一，原爲涵養聖心會友之虔誠。二，爲光顯敬聖心之典禮。三，引人感念聖心之恩德。四，訓人獻聖心以一月之始，以承一月之新恩。求主增我愛敬聖心之熱。日中，屢誦曰：盡甘耶蘇聖心，賜我愛爾日深。

第二端 敬禮聖心之緣由 其緣由有在吾主者，有在吾人者。在吾主者，一，爲報吾主無窮仁愛。蓋主心有類我心，我有德於人，我心自樂人，不忘我德。吾主於我，施無窮恩愛，爲我受無數苦辛，亦願我憶念之，而稍慰於心。故受難前夕，授宗徒成聖體權，二次語之曰：行此以憶我。路加二十二篇二，爲補吾主所受之凌辱。蓋吾主極愛吾人，奈世人概多負德，卽吾主特寵之人，亦有不免傷其聖心矣。其緣由

之在吾者，一、爲培養我內修之功。二、爲盡我感恩之職，以副吾主之願。三、爲望聖心充盈聖寵於我，及我所受託之人。以此緣由，逐一思之，當何如切意虔情，以崇聖心之敬禮。亦當何如精心果力，以引他人敬禮聖心。今恨我日前之冷淡，求主增我後日之熱心。專務恒與吾主、心心相印。

第三端 本日敬禮之工夫 欲於此首瞻禮六，加意虔誠敬禮聖心，所當行者三。一、平常信友，是日敬禮之工，尤宜行之勤恪。二、沉靜心神，潛思聖心悲傷，及其恩德，以圖酬報。三、益增神業，如敬拜聖體，與拜苦路等是。且預籌月內將修何善，以蓋前愆，以慰主心。以此諸條，仔細推思，堅定善志。求本名聖人，或本月主保聖人轉達天主，賜我躬踐力行。 祝言

卷二 二月

月省之思

地獄

見卷三第四十一題

首瞻禮六

聖心之至愛

見卷五第二十一題

初一日 正心誠意

定像 想見聖保祿宗徒訓人曰：凡爾諸行，悉當爲天主光榮。

特求 求主賜我聖寵，俾於諸事，悉能正心誠意。

第一段

誠意之本旨

我儕在生，或聚一堂，或居一院，頗有耶穌隱

居納匝勒景象，最要者，不可虛度此生。故凡事皆當正心誠意，歡向天主。庶可將我平常之行事，舉爲超性之事功。欲臻此境，非誠意不可。夫心有所發之謂意，誠者專其心之所發。發意專向於善，則其意亦善。人於發意間，欲立超性之功，須有超性之向，然尤當有天主寵

愛於其靈。且人於一事，能存不一超性之向。於是能於一事，立不一超性之功。蓋人有靈性，行事必有意向。向乎主，則爲超性之功。然吾儕每因曹曹不察，不思心之所向。於是本性多虛浮之意，行事多無益於身靈。悲夫。求主助佑，定志此後，諸凡行事，專心向主。

第二端 誠意之緣由 我於行事中，當慎心之所用意之所注。其故頗多，今特略舉其三。一、至要也。我行爲之功過，寵愛之增減，與夫榮福之得失，概由我意向之善否。二、至宜也。我身靈皆屬於主，則我內外諸行，巨細俱當歸主。保祿宗徒有言曰：爾或飲或食，或行他事，皆宜爲天主光榮。致哥林多人前書十篇三、至易也。不論處何境，居何地，行何事，時能誠意正心，歸向天主。逐思諸緣，自當奮勵，自晨至暮，務常誠我忠悃，多積聖功。況修道者，靈魂恒存主寵，動作恒守院規。

正心誠意之機，尤多且便。謝主賜此諸恩，時可以誠意一端，作我私省察之題目。

第三端 誠意之用 其用約有二，人當習慣行之。一、定善願之經文，包含行事之諸意者，晨起時，誠心誦之。二、日中行事，恐有虛偽偏私之念，亂我善心，每以其誦句反復誦之。問我於斯二者，曾否黽勉以行。思我晨興之意，念何歸，日內之衷情何向，所誦善願之經文何在，所作善志之工夫更何在，聖類思在生，歲月無多，因結契主心，至誠无妄，得於平常之事，立超性之功。不數年間，德隆功盛，出人意料之外。我可奉爲法式，并求其轉達。 祝言

初二日 獻耶穌於主堂 瞻禮日

定像 想見聖母在堂，獻耶穌於天主，耶穌在聖母手中，亦自獻於

聖父。

特求 求主賜我認識耶穌與聖母之心，易於仰法。

第一端 默思聖母爲我何爲 聖母遵古教獻主首子之例，以己極愛之子，獻於天主，爲贖罪之犧牲。後以五銀錢贖回，殷勤哺養，以成他日山頭之祭。誠足動人驚奇，感謝愛慕之心。又當思聖母無取潔之本分，而亦往受取潔之禮，甘被人視爲平常罪污之婦女，此更示我謙遜聽命之表。從此可知聖母榮主救靈，守規謙順，超出諸聖人聖女之上。今我於敬主救靈，守規盡分諸端，每多畏難苟安。較之聖母之懿行，豈不愧爲其肖子乎。求聖母轉祈天主，賜我剛毅之心，堅勵我志。思何事天主所欲於我，而我以爲難者，急宜黽勉行之。

第二端 默思耶穌爲我何爲 誕生四旬之嬰孩，卽已穎悟全開。在

聖母手中、自獻於聖父、爲贖人之價值、爲祭主之品物。甘願捨己生命、傾流聖血、以償人罪債、補主光榮。由是天主聖父鑒其誠、納其獻、看愛子之聖容、霽嚴威於人類。而吾主自此度三十三載、躬作犧牲之命、日日如當受死、至終被釘架上、溯吾主一生、自誕生馬槽、迨埋葬墳墓、無日非祭獻己身、以求天主光榮、以冀吾人成聖。故修道者、可於此知所取法。何則、修道之人、自矢善願以後、亦奉己身靈於主、自當歡欣踴躍、勉效吾主至德儀型、重獻心志於與祭及領聖體時、更於此時、示爾忠貞慷慨之情。

第三端 我爲耶穌聖母當何爲 前二端、想耶穌與聖母爲我各有所爲、今我亦當有所爲以報之。報之何如、往聖堂中、謹獻身靈於主。另於祝聖聖燭、及瞻禮與祭時、藉聖母之手、賴聖母之功、願以耶穌

聖心愛主愛人之火，焚化我心靈，以作全燔之祭。昔聖母以五銀錢贖主，以後恩勤顧復，待及時，任其見售於人，以終其祭。思念及此，更當感激吾主五傷，作贖我身靈之價。謹守五官，慎厥躬修。克欲制私，自強不息。立功補過之死靡他。蓋吾主獻身於聖父，公然不隱，全而無缺，永而無終。此莫非示我當效之則也。謝耶穌與聖母之儀表，求其恩佑。 祝言

初二日 耶穌隱居時聽命之表

定像 想見耶穌助聖母聖若瑟，殷勤工作。

特求 求主賜我識主聽命之德，而知效法。

第一端 耶穌聽命之完全 聽命爲真謙之據，人非謙遜，必不能悅主。人非聽命，必不能謂真謙。故主於隱居之時，特以聽命爲訓人之

首務。夫降生救世之天主，乃於親手所造之人，事不問巨細，行不問難易，而皆柔聲下氣，力役服勞，毫無勉強，毫不因循。則視世人之陽奉陰違，口是心非者，迥不相同。聖史路加因聖神默啟，書屬下之一語，二篇以括吾主事親三十年之行蹟，以示吾主聽命之全，深望天下萬世之則效。我儕當發羨慕感激之情。凡聽長命之時，效法吾主之表，益加奮勉。

第二端 耶穌聽命之緣由 凡人外形所爲，皆由內念所注。故卑賤者之聽命，非心有所懼，卽意有所求。若吾主之聽命，實因天主聖父既以斯人爲我親母，爲我鞠父，則我屬其權下，當聽其命，一若聽聖父之命。如是始證我愛我父，此吾主聽命之真情也。從此可知長上者，係天主所使以代其位，授其命者也。我能於聽長命之時，以爲卽

聽主命。則此聽命根於信德、而爲超性之工、最有功於天主之前、最有賞於天堂之上。今爾當細察爾之所行、凡長上之命、昔所已能聽者、今仍奉行惟謹否。昔所未能聽者、今當速順無違否。求主特加助佑、定志日後不棄長命。

第三端 耶穌聽命之功績 耶穌爲天主聖子、以聖子之尊、而聽聖母及聖若瑟之命、卽所以聽天主聖父之命。則其聽命之功績、誠爲無窮至極。試思吾主自幼至壯、前後三十年之久、語言動作、無一非順親聽命、卽無一非積德累功、無一非爲我人儲聖寵之寶藏、旣豐且富也。予靈、爾自離家棄俗、身入修途以來、豈非冀道德之加修、神功之益進、勤學耶穌之卓然於聽命乎。當知潛居幽院、遠避紛囂、不必立炫俗之事功、不必行驚人之苦刻、惟循規蹈矩、諸事聽命而行。

斯生前之福寵、身後之榮光、可預決出人一等也。謝主賜我既明此理、并求主佑我、能行此道。祝言

聖灰禮儀無一定之期、早在西曆二月初四日、遲至三月初十日、倘在二月初四日、則初四初五日之默想、當移於耶穌聖心瞻禮後、卷六六月之前、如在二月初五日後、則初六等日默想之題、當取於卷六六月、自封齋日起至耶穌聖心瞻禮、以耶穌受難復活等行跡、爲每日默想之題、迨耶穌聖心瞻禮後、繼用卷六六月之默想、至六月底止。

初四日 耶穌隱居諸德

定像 想見吾主謂我曰、予今豎表、爾視以師。若望十三篇
特求 求主賜我效主隱居時所有良善、端肅、孝愛諸德。

第一端 耶穌隱居時之良善，吾人潛修一室，當務之德殊多。故吾主於隱居時，所以垂訓後人者，不第聽命一德。天主聖神於古新聖經，每稱吾主之良善。誠以良善之德，在人靈性上大著雄豪。凡具是德者，心志超於物表，不爲榮辱所淆。卽有時偶被人欺侮，依然神恬氣靜，不失內靈之安和。今我慣任血氣之性，每因一事見挫，一言受辱，輒悻悻然不悅於心，不豫於色。較諸吾主良善之德，不亦仁暴天壤哉。主嘗曰：法子，予性良善。又嘗曰：良善者乃真福，爲其將獲安土。求主佑我法主良善，有不合於良善者，致力除之。

第二端 耶穌隱居時之端肅。端肅與良善，相同而亦相異。相同者，因端肅與良善，均可悅樂人情，汲引人心也。相異者，因端肅足顯德行光輝，尤能感人於善也。吾主隱居時之端肅，雖離赫赫，實爲天主

之威儀。故其出而交接，則周旋皆中矩，入而操作，則左右無愆。他若出言泯浮躁，舉足絕輕狂，存心不放縱，用意無偏私。動靜起居，視聽語默之間，無一不見其莊重。是何如是之嚴肅整齊也。保祿宗徒有言曰：汝等端肅，見示於眾。致斐理賓人書四篇我今三復此訓，求主使我端於體統，復端於心術，而由是勉爲端人正士。

第三端 耶穌隱居時之孝愛 孝愛者，係人子於其親，竭力盡情，以孝順而愛慕之也。吾主降世爲人，念念不忘於聖父者，固不必如我人以誦經祈禱，爲足伸孝愛之忱也。然聖史路加記吾主傳教時，雖僕僕風塵，不遑飲食，猶且登山祈禱，徹夜求主。六篇則其於隱居時，恆求弗輟，從可想矣。蓋吾主聖心之孝愛，無日不以父名見聖父，國臨格，父旨承行爲懷也。先知依撒義亞曰：孝愛之神，安息於彼。十篇

其誠然乎。今我欲舉神魂向主，聊表孝愛之情，亦惟師法吾主祈禱可耳。兼之勤行各項神功，日久月長，斯孝愛之道，庶乎得矣。向諸德之表，及至良極，飭之耶穌，求誘掖我也。祝言

初五日 耶穌隱居時智寵彌增

定像 想見吾主與聖母聖若瑟同居一室，動靜咸宜。特求 求主賜我愛主之熱心，庶能日進於德。

第一端 耶穌在人前彌增上智 聖路加紀耶穌隱居度生，增加上智，漸增厥齡，益受寵愛於天主及眾人前。二篇據保祿宗徒曰：天主聖智之寶藏，蘊於吾主聖躬。致哥羅森人書三篇原夫吾主之聰明睿知，常是無窮，不能增益。今言其增加者，誠以其盛德積中，光輝發外。由微而顯，由隱而明。聖學之昭彰，不啻與年而俱長。譬之於日照

臨終古，其光無增。然自卯至午，愈高愈耀。吾主之聖德，略似之。其勝依時，更著於襦襟時。少壯時，更盛於孩提時。觀夫此，吾儕奉教之人，及凡修道者，皆當夙夜匪懈，急於修成。務使德業日新，蒸蒸日上。進。今我自問，我果如是乎。抑或徒有虛願乎。凡世俗操業習藝之人，尙知用心前進。何我於救靈事主，乃不知自勉，哀哉。求主助佑，使能日進德修。

第二段 耶穌在主前彌受寵愛 耶穌充盈聖寵，若望一篇今言其益受者，誠以耶穌論其位，則實爲天主，行事有無窮之功。論其勞，則類乎吾人，用力有不等之別。如十二歲步履至堂，異於四十日懷抱至堂，四旬嚴齋，異於一日大齋，諸如此類。聖經言其益受寵愛於天主，及衆人之前，卽謂不但衆人覺吾主德業進修，意爲之悅，卽天主

亦見其功行聖善、心爲之歡焉。今我可以此二者自問、一、我平日修爲、果能無怠無荒、有與年俱進之象乎。二、行事意念、果能盡美盡善、無順己自便之心乎。自知無德、亟宜加功。庶幾詣臻純全、既邀主寵、又蒙人愛。

第三端 耶穌德修增於隱居時 上智日加、聖寵日益。吾主之增德修也。然其德修之增、不在聲名赫濯、功業輝煌之際。而在家庭服役、日常動作之間。此蓋訓人或居世俗、或居修院、出入往來、與人交接、苟盡職安分、誠意潔衷、則潛德克修、多膺主寵。從可知吾儕在世、切勿患才疎學淺、未讀多書、不能振聵發聾、廣傳聖教。亦勿患職小位卑、常留一地、不得建功立業、愈顯主榮。惟宜素位而行、嗜義如渴。主曰、汝當爲全人、如在天爾父爲全美。瑪竇五篇求主賜我聆其善訓、

效其聖表。 祝言

第一 封齋時當務之工 聖灰禮儀 瞻禮四

定像 想見亞當被逐出地堂，天主謂之曰，爾原爲灰土，將歸於灰土。

特求 求主賜我謙卑痛悔，持齋苦刻，用副聖教慈心。

第一端 謙遜 人須記，爾原爲灰土，異日仍宜歸於灰土。創世記三

篇此係天主語亞當之言，今幾六七千年之久。亞當既獲罪，天主罰之，禍及子孫。謂之曰，因爾食，予禁果，必致地成荒穢。須顏汗珠流，方可餬口，及歸於所出之土而後已。蓋爾原爲灰土，爾仍將歸於灰土。天主既責亞當之罪，并定其罰。而又以末後二言，溯其由來，告其畢竟，何也。曰，抑制其傲，感發其謙也。從可知謙遜，乃補過者第一當有

之情。亞當始受斥責，尙有推辭。及聞斯言，乃默無以對。謙恭領受主罰，九百年行補贖之工。賴有將來之救世主，得免下墮。吾人因亞當而受罪，且亦自犯罪愆。故必須勤行補贖，求主寬宥。是爲封齋時首先當務之事，尤宜以謙遜爲懷。思肉身之卑陋，靈魂之罪惡，作吾補過之基。求主賜吾善於認己，去傲存謙。定志今日與祭領主，亦存此意。

第二段 痛悔 人須記，爾原爲灰土，爾仍將歸於灰土。聖教會藉司祭者之口，每逢是日，以聖經此語，勉其子民。神父與教友擦聖灰時，逐一告以斯言。猶曰：人乎，爾須記，不論任何事，有何榮，因爾罪惡，將死變灰土。今若不痛悔補贖，日後自灰土復活，身靈將同受永刑。聖教會凡遇封齋首日，必以此語訓勉，詞雖婉，而義甚嚴。蓋欲我真心

痛悔、爲封齋時第二當有之情。倘我苦刻補贖、能兼痛悔謙卑之意、自可望主鑒我微誠、而施赦宥也。經有云、吾主不棄慘悔謙抑之心。聖咏五十篇定志以真謙真悔、領受聖灰。曰、求賜我真全痛悔、主俯聽吾等。

第三端 齋素 普天下聖教會、以今日爲始、司祭者彌撒中向主曰、天主、爾以形齋遏抑罪過、提振神靈、賜人諸德諸恩。彌撒序經是可知齋素之意向、與齋素之利益、而吾應自勵矣。夫齋不獨在棄絕甘旨、菲食減餐。尤貴在遏祛私欲、抑制肉情。我若能神齋與形齋兼守、心齋同口齋並持、則必無血氣過強之慮、嗜慾易縱之憂。並可望主矜憐、宥我往失。庶幾道德加修、蒙主福寵也。故齋素以外、尤當思戒絕何病、克去何私、勤修何德、樂行何功、是爲至要。求主賜佑。祝言

第二 耶穌赴山園 瞻禮五

定像 想見吾主同宗徒赴山園，途中極形憂感。

特求 求主賜我勇敢，能爲主任勞，及忍耐各種憂苦。

第一端 耶穌同宗徒經責多亂溪，陟阿利伐山，入熱瑟瑪尼園。若

望十八篇，瑪寶二十六篇，路加二十二篇，此園既爲吾主平日祈禱

之所，主知如達必將引衆來捕，然仍毅然直往，謂徒曰：欲世人知予愛父，故遵予父命，起往哉。若望十四篇余靈思之，我主爲何往彼。將迎敵也，將被難受死也。聽吾主之言，觀吾主之行，何其勇，何其謙歎。原其故，以切愛聖父也。我則反是，一見微苦，非特不勇往以迎，且畏而避之。如是，可追從吾主耶。爲吾主麾下之兵耶。我今愧悔，決意勉力，期變我心之懦弱，補贖前日之怠荒。

第三端 耶穌語徒曰。坐茲。待予之彼禱。瑪竇二十六篇吾主將禱。首先預備。因往幽靜之所。遠離世務。卽其親密之人。亦皆屏却。諄諄相囑。醒寤同禱。此所以訓我善行祈禱之工也。善行祈禱若何。未禱之先。首擇合宜之地。屏絕雜念。維思主訓。曰。坐茲。待予之彼禱。卽收斂心志。一切俗事。不令入余心靈。卽或偶來纏擾。亦必立即驅逐。如是。方爲善禱。懇切求主。賜我斯恩。得思向時祈禱。苟有未善之處。急宜設法改去。

第三端 携伯多祿雅各伯若望三位。瑪爾谷十四篇或問吾主何故另携三徒。同往山園祈禱。其故聖經雖未明言。然按解釋聖經者。咸謂吾主因甚愛此三徒。如前於大博爾山。特賜之見主顯容奇蹟。共得其樂。今乃在阿利伐山。使彼見已臨終痛苦。俾能稍分其愛。余靈。

爾亦極願爲主愛徒。近侍主側。奈何偶遭微困。即不能安心忍受。且敢怨恨相加。抑知艱苦之來。乃吾主召我近侍主旁也。若欲近主。而畏任苦難。乃自誤也。當熱心求主。賜我善想主苦。堅我志慮。肩負苦架。忍受暫時艱困。以隨吾主之表。克成吾主愛徒。 祝言

第三 耶穌園中憂悶 瞻禮六

定像 想見吾主謂三徒曰。我靈愛甚至死。

特求 求主賜我困悶之時。含忍聽命。締合吾主聖心之愛。

第一端 心始怖怯憂鬱。瑪爾谷十四篇。瑪竇二十六篇。人之所以犯

罪者。蓋以靈魂三司胆敢叛主也。故吾主受難贖人。所受之苦。亦自靈魂爲首。吾主聖靈愛苦。極大極深。受造之物。力不能勝。其憂苦之鋒。極爲銳利。俾聖靈三司。咸受其痛。吾主此行。上以補聖父所受之

辱下以徵己仁愛之大。聖保祿宗徒云、主爲愛我而捨生。致加拉他
人書二篇誠哉是言也。如德亞人雖盡其恨毒、嚴加極刑、終不能傷
吾主聖靈。而吾主自以僅受肉軀之苦、爲不足。故甘心將內靈向見
天主之福、暫時停止。俾憂愁煩悶驚怖諸情、盡集於心、而受莫名之
苦。噫、愛人之情、何其極也。我靈見主如是仁善、感謝之餘、尤宜竭盡
心力、永圖事奉、可也。

第二端 我靈愛甚至死。瑪竇二十六篇吾主此言、猶云、吾靈愛極、幾
將致我於死也。夫吾主至誠、言必無虛。從此亦可知聖靈之愛、至於
至極。須思吾主聖靈、甚愛之故有三。一、因吾主爲人中保、天主聖父
將萬世萬民極重極多之罪、盡委其身、付之肩任。二、聖身一切將受
之難、鞭笞茨冠十字架、各等利刑、莫不歷歷在目、徹鑒於心。三、雖吾

主受盡艱苦，捨身傾血，乃仍有無數之人迷於罪惡，辜負救世洪恩。吁嗟余靈，此皆吾主憂鬱之緣由，宜逐一默思之也。試問爾思言行爲間，亦嘗使吾主憂鬱否？更問爾棄俗後，尙尤背負主恩否？極當憐憫吾主苦心，痛悔前愆，定志自今以後，勤修不怠，再不敢稍致聖心憂戚焉。

第三端 吾靈憂甚至死，無輩偕予在茲，偕予寤醒。同上吾主先以己憂，告其親愛之徒，囑之偕己寤醒，意欲稍分己憂。隨後往求聖父，虔行祈禱之工。此係吾主人性之行，訓吾於憂苦時事，有可爲者，且有當爲者，可爲者，卽以己愛懣之心，告諸有德之人，藉彼溫語良言，得以少慰。然僅行此事，必無超性之力，可以濟艱。故更有當爲者，卽趨赴天主前，求之助佑。如是，乃爲安妥。夫疾病不告醫生，必難療治。憂

苦不懇師友、徒自悲傷。然惟咨嗟悼歎、逢人告訴、而不思振作心神、祈求上主、亦非所宜。余靈爾曾明吾主之訓乎。宜思何以仰慰主心、而解其憂。祝言

第四

耶穌山園祈禱

瞻禮七

定像 想見吾主跪伏山園、謙恭祈禱。

特求 求主賜我恆守祈禱之規、善於從事。

第一端

耶穌少前行、跪伏曰、父、倘可、免予飲斯爵、請諾。瑪竇二十六

篇吾主祈求聖父、異常謙恭。既跪且伏、若不敢舉目仰視者。此蓋洞

悉聖父之尊大、及己人性之卑微。且己身當償人罪債、亦若爲負罪之人。試觀其向聖父曰、父、倘可、免予飲斯爵、請諾。聽其言、想其心、其孺慕之情、概可見矣。吾人祈禱時、舉止屢次失宜、其故何哉。因不思

天主之尊高、與自身之卑下耳。定志此後、凡行祈禱、必先自問曰：吾今何往、欲與誰言。如是存心、庶克謹慎威儀、必恭敬止、勉之慎之。

第二段 倘可、免予飲斯爵、請諾、第請弗如予願、惟若爾意。同上此吾主克制本情、順從聖父之命、尤爲超奇拔萃。夫吾主人性、全似吾人、旣洞悉受難情形、臨終景況、自不禁痛心疾首、向聖父哭泣哀求、望其動一念之慈、免己受萬般之苦。然必仍曰：父、倘欲予飲斯爵、惟若爾意。猶言父、倘欲予受斯苦、願遵爾旨、雖死不辭。後果受難釘死、聽命至終。從可知吾人凡遇患難憂危、無不可求主釋免。但當不忘順從主命、抑制己情。如日誦經云、爾旨承行於地、如於天焉、是爲最美。全獻我心身、遵行主命。此後不論遭何境遇、須存信德、聽天主上智之措施。

第三端 禱畢還視三徒。同上吾主祈求聖父，三次還視其徒。訓勉之餘，復往祈禱。雖身入愁城，心神疲倦，仍不弛其虔誠，不改其言語。曰：吾父，倘必欲予飲斯爵，惟若爾意。此吾主訓人，凡行祈禱之工，不宜忘愛人之事。凡行愛人之事，不可廢祈禱之工。蓋愛人之事，賴祈禱而更易有功。祈禱之工，以愛人而更可悅主，且訓人欲善行祈禱，不在言語繁多，文詞深奧。惟能懇摯吾情，堅持吾志，雖一二語言，斯亦足矣。萬不可重複久長，而生煩厭也。天主聖父，定將罰己聖子，以代吾人。向之虔誠切禱。祝言

第五 耶穌臨終困苦

封齋後第一主日

定像 想見吾主伏地祈求，徧流汗血。
特求 求主賜我於神靈之戰，剛毅而恆久。

（第一端 憂鬱愈深，至將死，禱愈長。路加二十二篇凡人將死，身魂苦於分離，故其時不勝痛楚。若吾主之死，瑪爾谷聖史記其終前舉大聲。百夫長見之歎曰，此人果爲天主子。十五篇可知吾主之死。無臨終之苦。然吾主欲盡受世人所受之苦，則臨終之苦，不在山頭斷息之際，而在園中祈禱之時。蓋其痛苦，非由筋力之疲，實由內靈之戰。內靈極願受死，以行聖父之命，而人性多畏，有無限憂愁。於是一身上下，內外交攻。心中抑鬱哀悲，自不覺困苦無聊，身魂如將決裂也。然要知吾主甘受此苦，實欲輕人臨終之痛。欲人於臨終時得邀主寵，順聽主命。以忍諸艱。余靈異日爾與此肉身分離之候，恐亦不免憂愁煩悶。今當先獻爾聽命之心，願行主旨。以爾終時之苦，合於吾主終時之苦，求主護助爾於是日。倘得明司不全昏憤，使爾亦如吾

主之用力於祈禱神工，幸矣。

第二段 徧體汗血流地。同上。吾主山園祈禱，身受臨終痛苦，憂鬱之餘，通體出流汗血，漸及徧地。聖伯爾納鐸解曰：徧體出流汗血者，是吾主全身血淚，哭吾罪過也。又吾主憂鬱甚深，一身上下交迫，至於徧流汗血，此訓人勇於神戰，抑制肉情所欲，隨從靈性之意。凡事出於天主聖命，肉情雖覺厭惡，總宜奮力勉行，不可畏難苟安。再者原祖獲罪之後，天主降罰斯地，枯槁已久。今吾主汗血徧流，大爲灌溉。於是人罰得以補贖，吾心得以潤澤。足見主心之慈愛無窮，我又當如何感謝哉。定此後，凡遇心憂之際，神戰之時，宜將吾主之表，作我準繩。

第三端 時天神降勉。同上。吾主苦懇哀求，得聖父遣天神降勉。時吾

主聖身，衰弱已甚，天神增益其力。吾主聖靈，憂苦難堪，天神堅勵其心。頌其聽命之德，讚其克己之功，稱其寬仁，揚其智勇。言聖父之光榮，與兆民之永命，皆係於斯爵之飲等語。故斯爵之苦，吾主雖不免於飲，而其祈禱之效，已可概見。余靈爾於斯世，亦有當飲之苦爵，當負之十字架，雖冀免而不得。然果得天主加增爾力，如遣天神勉勵爾心，則飲苦爵而覺甚甘，負十字架而不覺其重。在天主臺前，功隆德懋，豈不美哉。是在爾殫精竭慮，善自求之耳。向苦於終時之耶穌，誠求賜佑。祝言

第六 補贖之要之式 瞻禮二

定像 想見吾主謂眾曰，爾等倘不知悔改，必將皆死。路加十三篇
特求 求主賜我真心悔過，勤行補贖。

第一段 補贖爲天主之命 天主授人補贖之命。可謂至顯至公至嚴。人不行補贖。主不曰恐將死。乃曰必皆死。是何故歟。一、因我等盡屬罪人。失主聖寵。除痛改補贖外。無可得生。二、肉身常叛靈魂。常欲誘之犯罪。保祿宗徒曰。爾若克治肉身之私。乃得常生。致羅瑪人書八篇是知吾人補贖之工。誠爲至要。其補贖之輕重。悉係罪過之淺深。且補贖雖宜行於終身。尤宜勤於封齋內。古多隱修大聖。恒於曠野間。嚴行守齋守夜。苦身諸工。今我於默想中。可將此自思自勉。我之守齋。既遠遜前聖謹嚴。且多蒙聖會寬免。所望勤行節制。勉加苦刻。凡日用所需。務必相機酌損。以我所守之齋。較吾主所守之齋。自遜謙抑。定志封齋內。行何補贖。不聽肉身推諉。以仰副聖會命人齋戒之心。

第二段 補贖爲修成之務 補贖固係天主所命，另在修道者，尤當不憚辛勞。何則，抑制私欲，禁遏偏情，以及有時不惜己力，圖救人靈。如是諸功，非專務修成，及明補贖之旨者，不可得而行也。古昔聖賢居於曠野，日勤夜寤，虔行苦工者，甚多。卽現今修道會中，半夜起身，誦經祈禱者，亦不乏人。吾旣難與之比較上下，然所可稍自勉者，卽此聞鐘急起，不惜纖微勤勞。另於祈禱時，力拒睡魔，以免心神厭倦。其事雖細，其行頗難。吾果於天主前力行不怠，亦苦工之一也。求天主輔助，定志勇於夙興，勤行祈禱神工。

第三端 補贖爲吾人之利 聖教信德之端，人既有罪，若在世不行補贖，必將行之於煉獄。古聖奧斯定曰，或行苦工以補贖，或受厲烈之火煉，悉聽吾人自擇。觀於此，旣知補贖之益，亦多苦刻之機，能不

奮發自勉、以償罪債乎。古來諸聖、多用苦鞭苦帶苦衣、自苦其身。我縱不能全效其行、然豈不能克治五官、以裨神靈。如跪不倚櫬、坐不靠背。出門遊行、目不回視。與人聚晤、口無爭言。此類功行、視如甚小、然積日累月、死而後已。實可謂畢生之補贖、不斷之苦工。求主賜我克明此訓。 祝言

第七 耶穌還顧三徒 瞻禮三

定像 想見三徒憂寐園中、吾主謂之曰、寤禱。
特求 求主賜我能遵主訓、熱心祈禱。

第一端 吾主還視三徒、皆寐。乃謂伯多祿曰、西滿眠、弗克同予寤半晷。瑪竇二十六篇、瑪爾谷十四篇、吾主禱時、還視已徒者三。此示人爲上者、勿忘伺察屬下之人、誦經默禱守規與否。而在下者、亦當虛

心服從，任其查閱。經記三徒皆甚憂寐，則伯多祿向時之雄心壯志，欲出人頭地者，今已成爲空夢。試問爾避靜時，默想時，所有善願，所有大志，或獻於主，或懷於心者，今皆何在。非與伯多祿等乎。經又記吾主謂伯多祿曰，西滿眠。猶言我爲師爲主，尙且祈求，爾乃眠乎。不能半時偕我禱乎。伯多祿素優應對，今聞此語，默默無言，蓋亦知咎無可辭矣。余靈，爾於神業之工，應受此責者無數。凡遇知心好友，日夜晤談，不知疲倦。至欲默禱半晷，便覺長似小年。此何爲哉。今於主前，自謙自訟，定志加勉焉可。

第二端 寤禱免陷於誘惑，爾心毅，爾軀綿。瑪竇二十六篇此吾主示人神戰之訓。寤者何，防守也。防魔計術，守己心門，知以遠避誘惑。禱者何，依望也。依主德能，望主寵佑，得以克勝誘惑。如是，則心既不怯，

力更能強。彼私欲偏情之擾，庶幾不爲我患也。主曰：爾心毅，爾軀綿。此訓人勿因心有善志，遂泰然意足，以爲德業已成。世有修德之人，當宴安無事，覺心志毅然，及憂患臨身，遂委靡不振，心靈且因之莫保。如是者，良可慨焉。吾主在山園中，愁深似海，早已示宗徒偕寤偕禱，以分其憂。今見其相對曹然，垂頭酣睡，不盛氣怒容以責之，反柔聲怡色以訓之，此非聖心之仁良乎。求主賜我遵其懿訓，法其芳型。

第三端 爾輩寐歛。定期人子當被付於罪人手。已矣，付予者近。起，偕予出遊。同上吾主始赴山園，想及將受之苦，不勝怖怯抑鬱。今諸患已近，偏坦然無憂，勇往出遊。此明示人祈禱之效也。夫人不能虔心祈禱，何怪其柔懦無勇乎。人遇憂危困苦，自當請計於天主，祈加寵佑，得增神力，以勝諸艱。卽於平日行事，亦當善爲之。清晨之默想，庶

幾涵養心靈，堪進於德。非謂默想祈禱，則所爲必能盡善。惟默祈之後，能愈勇於行，愈甘於苦，愈勤於業，慎思此義，詳記此訓。祝言

第八 茹答負賣耶穌

瞻禮四

定像 想見吾主受茹答敬禮。謂之曰：友，至此爲何。

特求 求主賜我虛心畏懼，不敢自恃。

第一端 茹答十二徒之一，引兵卒，暨司教使者，皆持兵器來。伊預告之曰：我攸親，卽是捕之，謹押送。瑪爾谷十四篇須知茹答一罪，包含多惡。吾主選之爲聖教棟樑，彼乃自甘爲羣凶之首，不亦悖乎。明知主行靈奇，而引兵卒來捕，若謂主不能脫逃人手者，不亦昧乎。佯行敬愛之禮，以快仇恨之心，使惡眾認而執主，何其術之狡而詐。恐兵卒中途失主，自身不得其利，囑以謹慎押送，更何其心之貪而殘。總

之。茹答惡徒，恩將仇報，惟利是求，實爲萬世叛主之祖，反教之宗，鄙人之尤。吾人置身修途，不知遏止偏私，名爲修德立功，實則縱情肆欲。卒至病根滋蔓，一敗塗地，其亦茹答之流派歟。慎之慎之，勿使爾於修途如茹答之心多邪慝。

第二端 茹答近耶蘇曰：亞物臘彼遂口親之。耶蘇謂之曰：友，至此爲何。茹答以禮付人子。瑪爾谷十四篇，路加二十二篇。吾主性良，茹答心硬，二者俱爲甚奇。茹答於吾主佯行敬禮，脣親其面。吾主早知其爲仇，而不忍以仇相待。仍稱之曰：友。冀其一念之明，自反諸己，得以認罪逆，而深痛改。繼乃詰之曰：至此爲何，非欲其自審所行，翻然醒悟，知所悔改乎。謂之曰：茹答以禮付人子，非示己早知其詐，胡乃佯行敬禮，過傷人心乎。特是茹答如聾弗聞，全不介意。此所以當日山

園中，卒付主於惡黨也。余靈想吾主如此性良，當深感激而增愛慕。見茹答如此心硬，當矢謹慎，戒絕驕矜，蓋德行之途，雖年歲久長，亦不可不慎也。

第三端 友。至此爲何。茹答以禮付人子。見上昔聖伯爾納鐸常以吾主此語，借問己身曰：伯爾納鐸至此爲何。今汝亦宜仿而自問曰：某至此爲何。爲何生世，爲何奉教，且爲何進修，爲何居斯地位，受斯職任。果爲稱心適意乎，抑爲肆志妄行乎。必將曰：皆非也。爲事奉天主，克苦己身，以修成聖德耳。又試問今日爲何，宜深修省。後日爲何，宜嚴防禦。前日爲何，應亟痛悔，而速改遷。如是設問，亦補過修功之一法也。又經紀主曰：茹答以禮付人子。汝當自謂曰：某，汝乃主所鍾愛施惠者，汝行敬禮，似爲熱心，人皆信汝爲善良。誰識汝乃包藏病心，

辜負主恩、好行詐僞。將以欺主乎、抑將以欺人乎。不知主不可欺、人亦不可常欺也。求主助我善應主召、進修實德。祝言

第九 耶穌仆眾醫耳

瞻禮五

定像 想見兵眾來擒吾主、聞主語言、仰天而倒。

特求 求主賜我明悉主之德能、彌深依戀。

第一端 耶穌前行、迓眾曰、覓誰。眾曰、耶穌納匝勒諾。耶穌曰、是予。是

予二字甫出主口、悉却仰倒。若望十八篇 茹答已與吾主行禮、眾兵

既識耶穌、似可急行擒執矣。然無一人往前下手、猶待吾主自迓、兩
相答問、舒泰自如。蓋吾主全能約制其間、欲人知其倘非自願付於
仇手、雖千萬兵卒、無能爲也。吾人默想主苦、思及此理、能無動感激
之情耶。吾主此時、不動雷霆之怒、不發驚震之言、惟應以是予二字、

而付能力於片言中。眾兵聞之，無不仰天而倒。蓋言是子者，卽謂子爲耶穌。納匝勒諾，因聖神受孕，生於童身。子爲天主眞子，降世爲人。上天下地，悉宜欽敬者。然仆眾之耶穌，卽爲拯吾之耶穌。當思其亦謂我曰：爾之救贖，是子。爾之中保，是子。爾心之愛，是子。以及正路真實永命，皆是子也。

第二端 伯多祿砍司教首僕之右耳。耶穌曰：休。乃輕捫厥耳，愈之。

加二十二篇當伯多祿砍司教首僕右耳時，設兵眾因之復讐殄戮，一時殺機，何堪設想。乃吾主祇出一言，兩面皆寂默無聲，相與靜觀厥行，安聽主言，共爲吾主仁善權能之證。而吾主在眾前行聖跡，一如平昔之幽閒。訓宗徒，一如平昔之溫厚。語兵眾，一如平昔之鎮定。噫，吾主之德能，浩大莫匹。吾當私欲亂動，偏情擾攘之時，求主亦命

之曰、休、可也。此僕從欲手擒吾主、而吾主手愈其傷。蓋不欲人緣己受禍、亦不欲宗徒得拒捕之名。其慈愛仁良、不更顯哉。彼蠻夷野族、若見斯舉、亦當知感。胡斯兵斯眾、竟無一動心改悔者。可知人溺於私欲、雖聖跡亦無用也、可不慎哉。

第三端

耶穌語伯多祿曰、收劍、父錫予斯爵、予豈可無飲。若望十八

篇人侮我、我亦侮人、非主徒所宜行。以此制勝於人、不足爲榮。適以取咎。依吾主聖訓、身當窘辱、惟有良善忍耐以應之。主曰、收劍者、訓我收我唇鎗、收我舌劍、收我忿恨不平之氣。主曰、父錫予斯爵、予豈可無飲。此乃吾主恭敬愛慕孝順聖父之言也。我若遭逢患難、不論巨細、宜以此言誦之於口、維之於心、以自勸勉。凡得病痛、失財物、遭困厄、皆爲予當飲之苦爵。惟有承行在天大父之旨、效法救世恩主

之行，如是可耳。謝主爲我不辭苦難，甘心受死。求增我愛敬孝順之情。祝言

第十 耶穌受執徒奔瞻禮六

定像 想見兵衆束縛吾主，宗徒捨之而奔。

特求 求主賜我常附於主，永不遠離。

第一端 爾輩操劍持干出捕予，如捕賊然。予日日於爾輩前，講教聖殿，而不擒執。斯時定屬爾輩時，并屬魔顯能時。瑪竇二十六篇路加二十二篇從來人之傷心，不特因人辱己之事跡，抑且因人辱己之情形。蓋人存疑我之心，見於形色，致旁觀者亦因而疑我。是乃人所難當，而最易生怨者。惡衆執主，國人觀其兵仗，鮮不謂爲擒賊捕盜者。吾主首自言之，此訓人於受辱之際，當思其表，而有以自慰也。繼

謂斯時乃定屬爾輩時、并屬魔顯能時。此蓋吾主於暗中開釋禁阻、使惡眾得以擒執。此所以兵眾洶湧來前、克執吾主也。吁嗟余靈、見吾主爲我甘心受難、須痛悔我罪、以期無負吾主救贖洪恩。

第二端

時眾緊緊繫耶穌。

瑪竇二十六篇

吾主子身受眾羈縛、異常暴

虐。或牽頸、或繫手、或細身、押解而行。眾人沿路或推或挽。前後左右譏笑誼譁。致吾主行不安步、苦何如也。然當知吾主甘受此苦、實爲吾人之益。吾人得罪天主、久爲魔縛。今賴吾主得以解脫。而邪魔之強橫、反爲吾主拘攣矣。世有被擄者、不論因何受繫、想主綁縛之苦、可自慰而得其恩寵。爲義被難者、身居縲紲、同主囚繫、不啻得鈕印綰綬之榮。專務修德者、賴主被繫之功、情繫事主、不但脫去名韁利鎖、世俗牽連、并將肉身諸偏情、凡能纏繞其心者、悉行截斷。思念及

此，我能不感激奮興，心繫於主，而益緊其締結哉。

第三端 時徒皆離主而奔。同上宗徒捍衛吾主，與之同難，本非吾主之願。爲宗徒者，惟有記憶吾主之言，靜待其被難受死。至三日後，得見其復活之歡，如是可耳。奈何將吾主前言，一概忘却。山園中偕禱之囑，無一能聽。及見主被擒，遂皆驚惶四散，以致心志俱灰，信德惶惑。而向之所謂偕主致命者，已作罷論，是誠何也。我靈默想至此，勿徒過責宗徒。蓋世俗常情，時當安樂，則相與聚處。時值患難，遂各自分離。如此者，所見皆是。卽吾奉事天主，亦每有與於見主顯跡之時，有味於偕主同餐之候，及誘惑一來，艱難始遇，則前日之善願，不知何往。嗚呼，吾主，爾見斯徒斯友，如是驚劣無恆，不知聖心當如何傷痛哉。我宜思有以慰爾焉。 祝言

第十一 耶穌解送教首 瞻禮七

定像 想見吾主身纏縲紲，立於教首座前。

特求 求主賜我語默得宜，又能忍耐人言，抑制忿怒。

第一段 司教首及會集者眾，皆推究希獲妄證，陷以死刑。然誑證者多，厥證不符。瑪竇二十六篇，瑪爾谷十四篇。吾主之仇，聚集人眾，推究其行，欲證以罪而不得。知吾主之行純粹至極，令人無指摘之可加。修道者思及於此，凡動靜行藏，亦當循規蹈矩，使人察其言行，無罅隙之可議。吁嗟余靈，撫躬自問，爾舉止果何如哉。自擬爾之動靜，旁人當有何言。卽萬幸克免人言，然平心靜想，果於主前能無愧乎。當自謙自責，而今而後，益勵功修。

第二段 司教首問耶穌從徒若何，傳教若何。耶穌答曰，予明講於世，

予恒示人於公堂及聖殿眾集之所。私地無出片言。奚爲詢予。詢聞予訓者。渠知予何辭。若望十八篇教首所問者二。而主所答者一。何也。誠以欲論從徒。則或離或叛。言彼善。實有所難。言彼不善。則主心弗忍。至於傳教。則主知問者之意。惟欲得聞。以資詆誣。告以詢諸眾人。隱示己已洞悉彼心。且甚恃己言無失。故不妨任人察訪也。從可知吾人或緣愛德。或因規矩。當訴人過犯於長上。爲其人之利。則可若尋常無事。其人無善堪稱。則勿稱。至於其人之短。則勿擅論。再者言語之餘。或私談。或公論。更當謹慎。庶免失言。如是。則雖有訾毀。亦司取證於眾。此皆吾主之儀表也。求主賜我。或言或默。俱得其宜。

第三端 言竟。侍一僕掌耶穌面曰。應教首如是。耶穌曰。予答如有未善。爾證厥未善。如善。奚爲傷予。同上噫。萬物之主。天地大君。在大眾

前、廳堂上、受僕隸毒掌其面。吾主何不赫然震怒、以顯罰之。夫吾主聖面、爲天神所快觀、聖父所喜視。今受斯僕恥辱、惟溫良厚重以語之、則所以補人驕傲之罪、抑人忿怒之情者、至矣深矣。又吾主受苦時、聖經屢紀其默然不答。今之所以有辭者、欲免人疑其言之有過、以致失禮於教首。且示人於冤抑之間、果可直言自白、不妨辯之必明。惟恭敬尊長之儀、仍不可弛也。祝言

第十一 耶穌被人定罪

封齋後第二主日

定像 想見吾主身如犯人、受教首審問。

特求 求主賜我言語真誠、行無虛僞。

第一端 司教首又曰、予呼活天主名命汝、汝果天主子、當明語吾等。耶穌曰、爾已言是我。又與爾云、異日、爾目將見人子坐天主右、乘雲

降來。寶二十六篇吾主於茲垂訓吾人，凡事係於己身者，皆默然不答。事有係於聖父之光榮、人靈之利益、及信德之道理者，則直言不諱。雖性命有危，亦不顧惜。誠以先知諸聖預言救世者之光榮，時人目覩吾主如是謙抑，未免致深疑議。當知吾主榮辱時既分有先後，自可萃於一身。故言異日乘雲降來，以申明之也。余靈須知當默而默，當言而言，非易事也。必也善於思維，心志和平，性情果斷，而後可。吾每缺此三者，言多錯謬，或緘默失宜。慎思此理，勿忘此訓，尙其定志，勉於將來。

第二端 教首裂裳曰：此人今出深辱天主辭，寧須更問證人。同上可惡哉！教首之詐僞也。聞吾主之言，知不能誣之以罪，乃佯作怒狀，惡聞辱天主之聲，示己敬主之誠。又裂裳以招眾怒，期由眾口議以死。

罪。夫教首欲殺吾主，必先加之以罪者，用服民心也。方其未問之前，早已自幸得計，以爲若答非天主子，則責伊向日之言行，煽惑人心。若答以是，則誣以僭越天主之尊，而成罪案，其行詐之術，可謂巧矣。不知自誤實甚。蓋殺主之罪，傳至天下萬世，蓋法正不得辭其咎也。吾於行事之間，雖不致干大戾。然語言不實，心口不符，外樸而內奸，貌誠而心僞，此皆詐僞也。天主其悅之耶？亟將此種行爲，深惡而遠避之。

第三端 辱天主辭，爾輩明聞，判當如何。僉曰：決可死。同上決斷者何人，驕盈媚嫉，挾私害德之徒也。受決者何人，天主子，聖中之聖也。且爲何事受決，爲宣明道義，認己爲天主子也。世有善良之人，每受詭譎欺侮。天主許之，正所以行淵微之至意，遂慈善之深心。如吾主因

蓋法暴戾，受判受死，適以補聖父之光榮，救兆民於罪惡。且吾主爲人類再生之亞當，肩任原祖與普世人民之罪。是死罪雖決於眾人，而其實乃定自聖父。吾主安得不心甘心愛，以順受之乎。余靈獲罪者爾，可死者亦爾。今天主子坐爾罪，代爾死矣。爾將何以愛之，且何以報之。身雖不死，肉情與之偕死，可也。求順命至死之耶穌，賜我克臻斯詣。祝言

第十三 補贖緣於罪惡 瞻禮二

定像 想見聖伯多祿謂日路撒稜人曰，宜補贖而回心，以得罪赦。

宗徒行實三篇

特求 求主賜我聖寵，能從宗徒之訓。

第一端 罪過之多 吾主追溯生平，如進修求道以來，或初領聖體

以後凡天主誠命、本身職分、統所居之地、所誓之願、一爲核計、恐亦爽然自失、駭獲咎之已多。夫一罪之重、原祖致萬世子孫受累無窮。細微之愆、梅瑟達味諸聖被譴非小。而我之罪惡、旣大且多、在天主目中、醜陋更難言狀、尙有何望於主乎。況吾主嘗言小過如片言浪語、亦將詰問。可知絲毫小失、亦難逃審判威嚴。觀此而謂補贖非至要至急之務耶。趁此封齋良時、當忠勇奮行、向主前自訟自承、定志於此主日內、作何苦工、求主輔助。

第二段 罪過之惡 罪過之惡、在主前者三。一、背叛。天主有命、人不之從。天主有戒、人不之慎。是與反逆無異。二、侮慢。視暫時卑陋嗜欲、重於天主無窮美善、且重於天主至嚴之法律。不羨其賞、不畏其刑。三、辜恩。凡人三司五官、勢位資財、皆係天主所賜。今用以犯罪、則是

辜負主寵。此三者實爲主前至大之惡。卽罪之細者其惡亦不堪言。卽令人犯一小罪。可以救普世萬民。及地獄眾靈。而罪實不可犯。何則。萬民之苦。猶輕於一小罪之禍。而諸靈之光榮。天主猶不足準小罪之侮辱。天主罪之爲惡。固甚大且重。然不僅此也。凡罪惡之增與損。每視人受恩之多與寡。憶爾所受諸恩。思爾平生之罪。又可知補贖爲至急之工矣。經曰。苦工時已至。可贖前非。日課辰時經定志動情。不畏補贖苦辛。

第三端 罪害耶穌 吾主任普世萬民之罪。聖父乃以普世萬民首犯視之。且以義怒之威加之。如依撒義亞言爲我罪過而粉碎矣。五十三篇從可知鞭撻茨籬吾主者。我罪。掌擊唾污吾主者。我罪。卽飲以醋膽。釘以十字架者。亦皆我罪也。余靈爾同如德亞人呼殺吾主。

請釋巴拉巴者、亦屢屢矣。爾同比辣多兵卒、以巨釘釘主兩手、釘主兩足者、又屢屢矣。何則、縱私違誠、以干重咎、何異釘主十字架乎。因循怠忽、以罹微失、何異加主痛楚乎。言念及此、可知大罪固不宜犯、卽小罪亦不宜犯也。我安得不口懼招尤、步防失足、勤修功德、以補前愆乎。聖賢於此、不禁自健其手、自苦其身。我宜思何以效之。向被難之耶穌、求賜補過立功。祝言

第十四 耶穌終夜受辱

瞻禮三

定像 想見吾主在兵卒僕役中、受種種侮辱。

特求 求主賜我知謙抑之可珍、而能爲主愛慕之。

第一端 乃或唾厥面、瑪竇二十六篇司教等既得決主死罪、遂各分散偃息。幽主於獄、委兵嚴守、慎無逃逸、一如罪犯者然。嗚呼、榮福之

王。至於此地。辱何如哉。然或者可得片刻之安。則亦事理之常。豈知兵等百般侮辱。竟有多人唾污其面。倘非經史明紀。誠出後人意料之外。世間窮賤人所至難當之辱。吾主受之。不避不辭。世人之傲。當同魔鬼在地獄。受無窮之苦。今主欲補此罪。若是恥辱。不爲太甚。奈何人受一毫之挫。竟不知含忍也。吾主又爲賤隸侮辱。終夜不安。吾人當疾病時。或居兒童中。或入僕役內。或嫌夜之永。日之長乎。認己過惡。願行補贖。細定苛刻之工。求主助佑。

第二段 或捫厥目。瑪爾谷十四篇世有掩犯人面目。使不見刑具。免其驚慌者。是存仁厚心也。至於捫目。使僕人便於侮慢。吾主以前。未之有聞。蓋吾主令儀令容。溫良莊重。衆在目前。無端凌虐。未免無謂。故掩主聖目。始得恣意戲侮。然世之掩障主目者。亦多矣。如犯罪人。

忘主無微不照，而肆意妄行，以天主爲盲瞽。卽向善者，行事間不思天主在監，心思念慮，雜亂紛紜，如謂主不之見者，此類皆是。余靈旣知主目之明，無物可蔽。當求主去我目之昏朦，得視其光明，見其愛情，行其聖意也可。

第三端 披頰多掌，曰：測披汝者誰。瑪竇二十六篇想吾主兀坐小櫬，手被縛，目被掩，四圍兵卒僕役，或唾面，或搥背。按先知依撒義亞預言，亦有披其鬚髮者。譏曰：爾自謂爲基利斯督，爾誠先知者，可語我披汝者何人。尙有種種侮辱詬詈，聖史闕而不紀。余靈於此，試問受如此辱者，係何人，因何故，且受之有何心景，有何情意。逐細思想，可少動爾心否耶。專務修德者，避靜時思謙遜三級，志欲與吾主同受賤辱，不願得人世尊榮美譽。於此可考其實情實行，果能如何。卒求

諸天神，代爲轉祈，賜得有若望苦修十字架聖人之志氣。曰：主乎，吾所求者惟爲主而受苦受辱也。冀願與聖人同此奮勉。 祝言

第十五 伯多祿三番背主 瞻禮四

定像 想見伯多祿在教首墀間，偕僕役向火。

特求 求主賜我明於自知，不敢自恃。

第一端 伯多祿在下墀向火。守門婢視之曰：爾偕耶穌納匝勒諾伯多祿曰：否，我不識斯人。瑪爾谷十四篇經紀伯多祿遠跡隨耶穌，後進掌教之墀，雜僕向火。昔言寧偕師致命，至終弗背者，今聞婢女之言，乃竟背主，恥孰甚焉。思念及此，可知人性劣弱，誰不當戒慎乎將來。然而事有旣然，必有其所以然。欲知伯多祿背主之由，聖史概謂厥有四故：一、妄恃己力；二、怠於祈禱；三、不避罪機；四、過喜視聽。卽經

所謂欲視事終是也。余靈回思爾曩時陷落。前日顛蹶。何莫非四者之中肇其禍乎。當想日後何能免陷於惡。求主啟迪。

第二端 言竟出墀。鷄初鳴。適他婢見之曰。斯人果從耶穌。伯多祿矢

曰。不識是人。瑪竇二十六篇。瑪爾谷十四篇。伯多祿性情忠直。不認主後。心覺不安。速卽出墀。聞他婢言。心更惶怯。乃發虛誓。前日認主爲基利斯督。活天主子。今呼天主聖名。證其不識是人。始而虛語。繼而虛誓。罪惡蔓延。愈多且重。蓋惡情之偏。或饕飲食。或喜視聽。或驕矜。或忿嫉。一順從之。卽易連累。有失之毫釐。謬以千里之患。切勿謂姑遂我欲。以順此心。我爲斯惡。將不過此界限。庶不致昏於自知。而可免自欺之禍。奧斯定有言曰。偏情猶火。火未嘗曰。斯可已矣。此聖人閱歷之言也。余靈爾知閱歷爲何如。悔改前非。無使罪根深入爾

心。

第三端 有頃，旁立者俱曰：爾果是斯人徒。伯多祿詛咒而言：不識彼人。言未畢，鷄再鳴。瑪竇二十六篇不滿一時，伯多祿背主者三，發虛誓者二。末次矢誓，且詛咒自身。時吾主與之相離，不過數步。聞如此背叛，安得不心痛耶？然吾主何以許宗徒之長，聖教之基，如此陷落。且筆之於史，使天下後世之人咸知。其故有四：一、欲教宗之貴，合於深謙之德，能易於憐憫他人，不致過於苛刻；二、使人知聖教立於如是脆弱之基，永遠不虞顛倒，決非人力之功；三、示人不論位何等尊，德何等崇，本性一無所能，時當怙恃主寵；四、勉勵罪人之望，雖陷落，可望復得振起。余靈驚奇天主上智贊美稱頌。

祝言

第十六 伯多祿痛泣前非

瞻禮五

定像 想見伯多祿慘哭苦泣，痛悔己非。

特求 求主賜我仰法宗徒，深心悔罪，熱愛耶穌。

第一端 主回目顧。路加二十六篇吾主慈善，真口舌難宣。身受千般

侮辱，竟自忘其苦。而念及門徒之陷落，加以神恩，佑之悔悟，乃回目顧之。是一顧也。責門徒失忠，顯己心至仁。而伯多祿痛悔之端，遂於是開矣。天主於罪人，其心仁慈，往往如是。故達味聖王時求主曰：主，回視我而矜憐我。聖咏二十四篇當想伯多祿在教首墀間，三番背主，已將愈趨愈下，而猶不自知覺。吾主醒之，開其心目，此所以畢世不忘主仁也。余靈記已往之年，主曰回視我者，不止一次。我當深心感激。凡有獲罪於主，定志速赴主前，求主垂憫。

第二端 伯多祿乃憶主云：鷄二番鳴之先，爾三番必背予。瑪爾谷十

四篇伯多祿記憶主言，乃天主聖寵之神效。瞬息之間，伯多祿心中雲霧頓然消釋。明識己罪惡深重，追憶吾主訓誨殷勤。凡晚餐間，山園中，吾主諄諄之語，宛如一一在耳。於是衷情勃發，不失望，不挫志，生悔罪之心，決改過之意，而爲萬世痛悔往非之表。蓋主寵之人人靈魂，光照其心，增益其力，使其見世物之空虛，認己罪之醜惡，動其改惡遷善之念。於是且悲且慰，且向慕主，不禁潸然泣下。得洗滌其私欲偏情，而脫離世幻，依附於主也。輕世金書曰：求主賜此聖寵，靈乃足矣。卷三十六十章

第三端 卽出門慘哭苦泣。路加二十六篇伯多祿背主之罪，既重且深。而其痛悔之誠，亦真且篤。故將犯罪之所在，犯罪之交接，及一切犯罪之機緣，急速遠離，不稍遲緩。一得幽居獨處，中心傷痛，見於聲

色。咨嗟涕泣，至死無能自己。其所以流淚悲歎者，非因陷於罪戾，自深慚愧。實因得罪至仁之主，致傷其至善之心。吾主見之，所以嘉其惻誠，悅其涕淚。不但赦宥其罪，且賜其前日所許之恩，一無減少也。吾人既如宗徒之獲咎，亦當效其真誠痛改，追念己罪，默思主慈，自深熱愛謙遜倚望之意，而毅然進善。是亦轉罪爲功之一道也。偕聖伯多祿同謝吾主赦罪之恩。祝言

第十七

耶穌遞送比辣多

瞻禮六

定像 想見吾主兩手被縛，兵眾送往比辣多官衙。特求 求主賜我欣勤事主，至終無倦。

第一端 天既黎明，撒責首及老長者再集，共議殺耶穌。瑪竇二十七篇司教等心急，臥不安枕，於是蚤起，黎明時業已齊集，問爲何事。曰：

議殺吾主，以鑒其狠毒之心。噫嘻，惡人之爲惡，豈不勝於善人之爲善哉？吾人誦經拜主，晨興祈禱，應無懶惰。乃或有人因循偷安，反不若如德亞人之急於爲惡，殊堪浩歎焉。試觀商賈逐利，梯山航海，沐雨櫛風，雖所得無多，尙且不辭辛苦。何吾人求永生之福，盼天國之榮，獨不思勵精策怠，得無視若輩而自愧耶？定志自今以後，務於修靈之工，黽勉從事。

第二端 縛送般雀比辣多都院。同上耶穌爲真天主子，其手多行靈蹟，多施惠於人。今何以見縛？曰：代人贖罪，補人妄用自主之權之惡也。惡眾縛之何爲？曰：便於付送比辣多，令受十字架酷刑也。送之者何人？曰：不顧身分，混於兵民廝役，專心殺主之撒責也。其餘民眾，日前或受主恩，或聽主訓。今見此情形，有疑議者，有毀謗者，更有從風

而靡隨聲和附者。吾主愛人心切，被人縛送，雖萬苦萬死，亦願受不辭，甘願爲天主歆享之犧牲。思念及此，當哭吾主爲我所受之侮辱。重獻我熱心善志，願終身依附之焉。

第三端 衆人不進都院，恐將受污。若望十八篇撒責及老長者，皆當時所謂明達之人。謹遵教規，不入異教人屋宇，恐染不潔，其人似乎細行且矜矣。獨何以百計千方，虐害無辜者之生命，干犯滔天大咎，而中心絕無疑懼。其昏迷顛倒，胡竟至於斯極乎。世有熱心人，亦有修道人，根本之德，每疎慵懈怠，至微末之務，則行之惟謹。且有急於自擇之功，而忽於本分之事。更有外示人善表，而內縱私情。此其識見之謬，深堪痛惜。余靈求主免我斯病。 祝言

第十八 茹答失望而死 瞻禮七

定像 想見茹答還司教銀錢，自縊而死。

特求 求主賜我聖寵，恆心恃主，終不失望。

第一端 茹答見主既決死案，惡厭己非，將三十銀錢還撒責首及老

長。瑪竇二十七篇茹答貪三十銀錢，許售己師，度主自可脫免仇手。

及見主甘忍凌虐，將受死刑，乃怨己謀拙，心甚愧怍。視向者所貪之銀錢，不啻心中之卷石。遂憤恨咒罵，將所取之銀，交還司教。凡人隨私欲而自貽伊戚者，亦大抵如是。人當獲罪之前，惟求身心適意。至獲罪之後，失靈魂之平安，受罪惡之禍害，不免抱愧主前。於是所好之愉悅，不知何在。而悔恨之心，因之紛來。不徒犯大過爲然，卽犯小過，亦無不然。自認前非於吾主足下。輕世金書有曰：節欲抵平，循欲則愒。一卷六章此一語，詢可爲我行事之規箴。

第二端 我犯罪、付義血。彼云、於我等何與、爾自籌之。同上撒責首等誘掖茹答爲惡。茹答自認己罪、望其有一二良言溫語、少慰己心。不料撒責首等絕人傲物、竟謂之曰、爾罪於我何與、爾宜早圖。余靈、違犯規誡、不顧心德、不畏獲罪於主、每思欲人愛戴、望人敬重、亦自欺之甚矣。蓋人於外面、或有稱我服我之詞、究其心、鮮有不輕視而竊笑者。世之好人逢迎、喜人褒獎者、亦祇見其性之懦弱耳。求主賜我畏懼犯罪、不因人而致失神樂、亦不因人而冀得心安。

第三端 茹答委錢聖殿內、出自縊死。同上惜哉茹答失望之罪、乃其諸罪之最重者也。想己罪不能得赦、妄臆天主非無窮仁慈、是其心第一巨惡。抑知人罪雖重且多、總不能超過天主仁慈之無限、使茹答效伯多祿之行、趨赴主前、謙心悔改、誰云不能得罪之赦耶。吾儕

世人皆有陷落、且陷落甚深。倘不幸有斯陷落、當謙卑痛悔、倚賴主慈。則自可冀得寬免、偕改過自新之靈、同有天福之分。求主堅我望德、時與達味聖王向主曰、吾藉主永不負屈。聖咏三十章 祝言

第十九

耶穌受人誣罔

封齋後第三主日

定像 想見民衆齊集比辣多衙前、囂囂訟主。特求 求主賜我能忍受他人妄言、安心契主。

第一端 比辣多出曰、爾輩訟何辭於斯人。答曰、斯人若不辜、必不付汝。若望十八篇如德亞人所奉之教。比辣多向不尊重、今見衆人遵守教令、不進公廨、亦不之怪。自行出外、聽衆訟詞、在比辣多、雖出於心多忌憚、然爲人上者、於此可知事苟無關輕重、有時可俯順輿情。且吾輩於此、可知見人素習善行、寧可與之相同、不宜與之相反。是

則比辣多之所爲，可以奉作師表也。如德亞人對比辣多曰：斯人若不辜，必不付汝。猶言吾等將耶蘇付汝，可知耶蘇必非善良。善良者，奚爲付汝。其辭之狡猾傲慢，至於此極。噫，日前斯眾讚歎吾主曰：其行全，令聾者聽，卽聽。瘡者言，卽言。瑪爾谷第七篇今誣之爲罪人。可見斯民之無良，人言之難靠，不足爲憑也。我今定志，頌主謙良含忍，輕世名譽光榮，終不繫情於人之褒貶。

第二段 比辣多曰：依本國律，爾輩處斷曰：吾等萬無可殺人。以驗耶蘇所預云：當被死如何。同上如德亞國有殺人之律，無十字架之刑。今其人謂無可殺人者，一欲羅瑪總督決此獄，使人知案情愈爲重大，吾主愈爲負罪之人。二欲以殺主之怨，委於官長。三欲主死於十字架，因如德亞以十字架爲最凶最辱之刑。彼云無可殺人，其辭似

謹而謙、意實詐而惡也。詎知天主聖意、先知預言、用皆成驗。而吾主因此得成愛人之願、受千萬苦辱、以成救贖之功矣。夫世事循環、每見惡人得意、善人受害。而天主措置其間、致成美事。有信德者、惟安行主命而已。

第三端 是煽惑本國人心、又禁納稅於國王、又自稱國王。路加二十

三篇吾主訓人甘貧、和睦、仁愛、謙良。嘗謂眾曰、明經士暨法利塞坐梅瑟座、故凡語爾者、宜遵行。瑪竇二十三篇又法利塞欲試吾主、有

納稅之問、及出視稅錢、主卽謂之曰、責撒肋之物、獻責撒肋。瑪竇二

十二篇又吾主以五餅二魚飫眾之後、若望六篇知眾人欲強之爲

王、卽獨身急步登山。其所謂煽惑人、禁止納稅、自稱國王等、皆非實事。誣主者、不亦虛妄而無耻乎、吾主受人詆誣、纖毫不動聲色。何量

之寬、忍之大也。吾苟內省不疚、有時師長責我、他人謗我、正可知所取法焉、求賜我含忍之德、祝言

第二十 補贖緣於罪害 瞻禮二

定像 想見聖若望宗徒謂老第則亞主教曰、熱爾心志、勉行補贖。

默照經三篇

特求 求主賜我聖寵、勤行苦工、以補前罪之害。

第一端 犯罪失天主之聖寵 天主寵愛、爲靈魂享見天主之左券。人於領洗時、所得天主至珍之寵錫、一獲重罪、卽失此寵愛、遠離天主、爲天主之仇、成魔鬼之役。聖奧斯定於此、不勝涕淚交流、惟深愛主之情、勤行補贖之工、藉以自慰。卽萬幸免染重罪、然不免多獲小罪、故亦必倍加苦刻。思及於此、能不動我欲行補贖之心、以效法聖

人乎。夫小罪之害，雖不致失主寵愛，然寵愛亦必因之稍減。若恒犯小罪，靈魂少得新寵，必減天堂榮福。今我罪過既多，則所失必非淺鮮。乘此封齋時候，急補靈魂之失。悔我罪惡，愧我事主不忠，復定我志，慎行封齋內第一瞻禮二所示之工。

第二段 犯罪失超性之生命 超性之生命，卽靈魂與天主，因愛德而相聯合也。人獲重罪，乃與天主決裂，絕此生命。於是靈魂離主，如身已死亡。凡所動作，皆不能立功於天上。卽德業神工，亦無裨於常生。故人一日在此境，卽虛度一日。一年在此境，卽浪擲一年。吁嗟余靈，倘明信德之光，當何如惋惜，思補其缺耶。至論小罪，雖不殄絕靈魂生命。然實致靈魂，如樹之少發其花，少結其實。功行少得其值，少能見悅於主。蓋人本性劣弱，善中每暗匿疵瑕。故聖人每多行補贖，

殷勤磨琢，以增神業。我何能不思則效耶。動情定志，可做前端。

第三端

犯罪失靈魂之美麗

人靈既獲罪，天主目中不堪醜惡，達

未聖王因聖神默啟而言曰：實爲可厭可憎。

聖咏十三章須知一罪

之凶，天神變爲魔鬼，自天堂降至地獄。若犯多罪，在主前更成何物耶。永遠更當受何罰耶。我既不免斯禍，當何如驚惕，一生不斷補贖。蓋不知我之補贖，能與我之罪過相準否也。且按信德之理，人之細過，爲靈魂之污玷。而絲毫不潔，靡可入天堂。默照經二十一篇我於平日間，靈魂殊多沾染。苟不思勉行苦工，將在煉火之久暫，必與我罪過之多寡平均。余靈思之哉。若能明知受煉獄瞬息之苦，何如慘瞬息不見天主之容，何如痛。必將補贖苦工，視爲甘飴矣。聖母爲仁慈之母，罪人之托，專心致志，向之虔求。

祝言

第二十一 耶穌被官審問 瞻禮三

定像 想見吾主在比辣多前身極謙卑言多鄭重。

特求 求主賜我聖寵俾恒爲天國良民吾主忠臣。

第一端 比辣多問曰爾爲本國王否耶穌答曰予國非今世國若是

予臣予民俱出力使不被付於若人予國允非在茲。若望十八篇衆

訟吾主禁納稅及惑衆等情比辣多知皆虛誣置之不理惟問吾主

果爲王否主云我國不屬此世蓋指聖教會而言也聖教會爲國雖

在世實不屬世其基根於天後將歸於天而爲榮福無疆之國吾主

嘗謂門弟子曰爾等先求天主國。瑪竇六篇是也吾因聖洗之恩得

爲聖教會之子天主國之民或因聖召之恩得爲主親近之臣如此

莫大福寵可謂天國已臨格於我矣然必須固國基報國恩得聖教

心思，遵天國制度，身雖居世，心繫於天。如保祿宗徒曰：吾儕之生命活於天。致斐理賓人書三篇須向主曰：我願爾國臨格。定志脫離我心於世幻。

第二端 比辣多曰：然則爾信國王。曰：爾自說予爲國王。予生於人世，作真實證，真實人聽納予言。比辣多曰：真實何。既問再出。同上惜乎比辣多心志之浮，既問主何爲真實，胡不待主既答而出。吾也撫躬自問：平日豈無類此之病。每於初行工夫，或念聖神降臨誦，或誦聖母經，亦似問主真實，欲知聖意。然不知靜心以聆主旨，傾耳以聽主音，而倉卒動作，毫無頭緒。如是者，屢屢矣。是亦爲愛慕真實者之行乎。亟於主前，深自愧悔。效法先知撒莫厄爾曰：請主啟諭，予耳權聆，予胸忻納。衆王經一卷三篇

第三端 比辣多曰、詳察斯人、果無可罰辜。同上比辣多求道之心雖浮、然性情正直、閱歷頗深、與吾主答問之餘、知其所謂王與國者、無患於羅馬國王。故明言無辜、以辨其誣。使比辣多稍自強毅、果於決斷、必不置主於死地。特因志氣軟弱、過於畏葸。惡黨探悉其偏、遂故作猖狂、卒逼之於莫大之罪。定主最凶之案。如邪魔欲害人靈、往往窺人之隱、探人之私。於其心力柔弱之端、誘而攻之、設使人稍不防禦、必遭其禍害。終不知伊於胡底。噫、可畏哉。求主賜我剛毅與超見之恩。祝言

第二十二 耶穌默不置辯

瞻禮四

定像 想見惡眾在比辣多衙前、高喧大噪、吾主默默無言。特求 求主賜我謹口慎舌、不陷於語言之失。

第一端 撒責暨老長誣時，主默而不答。馬竇二十七篇，吾主默然不答者，其故有三：一、顧本身尊位。天主聖子爲審判萬民之主，今因被人妬忌，受多端誣罔。聽訟與控訴之人，自知其誑，何必爭辨？二、補人脣舌之罪。凡飾非詐僞，妄言虛誓，譏誚訕謗，怨譁咒罵，種種罪惡，賴主默受苦辱，得以赦宥。三、爲人立表，備人聖寵，使人仿效其行。蓋吾主願歷試人間境遇，歷受千萬苦難，欲人不論處何境地，居何患難，有所師法，有所怙恃也。謝主聖恩，求主因己緘默，賜我謹慎出話，定志日內不出妄言。

第二端 比辣多曰：爾不聞訟汝事情者衆。耶穌罔措一言，官大異，同上比辣多所以異。吾主之默者，亦有三：一、因吾主守默之形，無畏意，無恚恨，亦無傲慢，故比辣多見之，不以爲怪，反駭異之。二、因吾主守

默之境，有足異者。當眾口喧嚷，欲致主死。官有意解救，冀其出一二語以白仇誣，以助己弱。而主竟弗置對。比辣多安得不深異之。三、因兩造動靜，絕然相反。如德亞教首巨室，皆爲民之師長，雜於兵民中，喧囂噪鬧。而吾主雖拘縲繼，仍是心平氣和，安閒厚重，一如耳無所聞，心無所慮。此比辣多所以深爲奇異也。然吾主聖心之默，有更可奇者。當眾人騷擾之時，吾主潛心沉默，獻己身靈。聽聖父命，以救贖普世。爲愛吾人，而願受萬苦。爲愛仇人，而代之祈求。聖父見聖子之默，亦殊珍異之，而親愛之也。我今獻吾主緘默之功於聖父。求救我口舌之罪。

第三端 主惟默無出言。路加二十三篇人當效法主默之故，其義亦有三。一、效法主默之機最多，自晨至暮，往來酬酢，與人語言不合，意

氣不投，受人譏評訕笑，口不能明斥之，心甚欲隱諷之。又或立言新巧，吐語離奇，使聞者以我爲多智。此皆可默而不言，效法吾主之機也。二、效法主默之工甚易，既不能如吾主講教誨人，歷受諸苦，則苟有辭說，效主靜默可也。且吾之靜默，不必如吾主有性命之危，倘於此而不效法，將於何事效法耶？三、吾人靜默之緣，與主相似。願主徒之地位，補口舌之愆尤。立善表於人，獲寵錫於主，此類皆是。自悔蹉跎，多能效法，而未則做。求主憐憫。祝言

第二十三 耶穌受惡王欺藐

瞻禮五

定像 想見吾主在厄落德王廷，被眾侮辱之如失顏人。
特求 求主賜我能識爲主受辱之貴，而知自勵。

第一端 厄落德夙聞耶穌奇異諸跡，得見歡甚，望目睹主行奇異。路

加二十三篇 阨落德荒淫無道，殺大聖若翰。今見吾主甚喜者，望其面行奇異，非求回心悔罪。不過欲見聞新異，以娛耳目。若是之人，望天主展其德能，賜以奇寵，不可得也。謙遜之靈自擬不應得主異恩，萬事惟圖榮主。卽求主殊恩，亦惟願增廣信人之數，愈顯主名之榮。若而人者，主乃寵照之，而賜以神恩。余靈因爾無此心志，未能堅切，故鮮得主逾常之錫。多年身置修途，猶不及他人精修於德。如經所謂行與言，俱顯於天主及眾人前也。路加二十四篇急宜遏絕偏私，日日死於自愛，事事以主爲向。

第二段 爰舉多問。主惟默無出言，撒責首及明經士在旁聳訟愈熾。同上。吾主在阨落德王廷，行止甚爲可奇。教首諸人呼噪喧天，吾主不難數言以塞彼口，而竟默然。阨落德欲見奇跡，吾主不費舉手之

勞、可行之以順其意。且於此可得安全免難，而主更寂然。噫，主之行爲如此，誠超越世人本性，較喚死者復生，更覺奇異矣。時人與阮落德之徒，不識此等奇行，反視爲愚癡，斯真愚癡人哉。又凡人之偏情，喜矜己才能，樂聞人褒讚。吾主當惡王前，絕無舉動。此不但折惡王之驕氣，且戒人以釣名沽譽。今我謝主聖訓聖表，求主賜我聖寵，常能師法之焉。

第三端 阮落德暨護臂武士兵卒，僉欺藐。又衣以白衣，還送於比辣多。同上吾主爲榮福之王，天主聖父之上智。阮落德與其士卒侮之如狂，衣以白長衣，狀如失顛，行於日路撒冷街衢。時四方來城瞻禮者，人民稠密，觀之無不粲然。吁，嗟余靈，見吾主如是情形，當務法其實行。想主爲諸德之聚，全德之鏡，引人得常生之路。當奮發則效之。

肖似之，服其裳衣，執其儀仗。雖不必爲癡人之事，然因愛主之故，願被人視爲癡人，受諸侮辱輕慢。往昔多有聖賢，德行至於斯境。汝曷不黽勉而行也。今當驚奇讚頌，感謝吾主諸德之表。求主助我師法於萬一。祝言

第二十四 耶穌被眾人棄絕

瞻禮六

定像 想見吾主在比辣多公堂，被惡人棄絕，高呼釘殺。

特求 求主賜我聖寵，永不以受造之物，並列於天主，而心志猶豫。

第一端 比辣多曰：今有巴拉巴有耶穌，二者爾欲釋誰。瑪竇二十七

篇比辣多明知吾主無罪，狗眾殺之，心實不忍。然又恐不順民情，必招眾怒。是以百計圖維，思脫卸己身。先送主於厄落德，而厄落德送之還。後又思本國例，每年巴斯卦瞻禮，隨民願釋一獄犯。乃選一稔

惡巨盜名巴拉巴者，問於民衆，當釋何人。料想國人受主無數異恩，必爲求赦，豈知計復不行。此後雖多籌畫，究因其性太弱，竟不免殺主之罪，自害身靈。噫，吾主嘗曰：一人弗克兼役兩主，誠哉是言。從可知我人既願修德立功，又不忍去私過欲，斯徒費經營，毫無實益。汝今謂主曰：我願全心愛爾，思何物分我心者，力圖斬絕焉。

第二端

撒責及老長勸民請釋巴拉巴，問死罪耶穌。因皆大呼曰：殺

此釋彼。

彼指巴拉巴也。瑪竇二十七篇，路加二十三篇，吾主當衆民

前，被官府比於稔惡巨盜。若謂二者孰上孰下，何人可釋，其耻辱吾主，已屬出人意想。乃蚩蚩之氓，爲人慫恿，竟同呼殺耶穌，而釋巨盜巴拉巴。一似吾主之可殺，有甚於巨盜者。噫，吾主受屈若此，人之無良，何竟至於斯極哉。思念及此，猶可恕人之薄待我，長上之小用我。

乎。回憶一生，同如德亞人呼殺此釋彼，視主不如罪魁者，不知凡幾。當謙卑痛悔，定志此後，再不放縱私欲，釘死吾主。且自視爲至卑之僕，抑制傲心。

第三端 比辣多於座際，伊婦遣使曰：爾於彼義人無與。我今日爲彼夢間，獲見多異。同上此婦之夢，或謂由天主而示，或謂由魔鬼而生。我謂此夢，實爲天主之特恩。蓋比辣多欲釋主，則眾人之怒莫解。欲殺主，則滔天之罪難逃。今聞此夢，譬在黑夜，而得燭火之光，知所行止，不至進退維谷。惜其不能果斷釋主，以致獲咎被黜，功名莫保，終於失望而自斃。吁嗟余靈，凡爾遇物欲纏繞，心志昏迷，爲善去惡，躊躇靡定。護守天神，與師長朋友之懲爾惡，指爾路者，亦多矣。是皆天主之殊恩也。問爾用之何如。求主賜我剛強果毅。 祝言

第二十五 比辣多圖釋耶穌 瞻禮七

定像 想見比辣多與民論讞欲釋耶穌。

特求 求主賜我聖寵能恆持主召之恩躬修無倦。

第一端 比辣多謂眾曰然則耶穌所稱基利斯督宜如何。眾再大聲

曰當釘當殺。瑪竇二十七篇比辣多爲地方牧伯手握生殺之權。明

知吾主無罪欲釋之而不得乃竟下問其仇誠可謂愚極弱極深堪

痛惜。然其不知如何處置吾主者我知之矣。將爲除免世罪之犧牲

救贖吾人之價值。將爲吾靈之飲食我心之歡忭我修成之儀範我

臨終之仰望。爲比辣多者欲知如何處置吾主亦問其職分可也。眾

曰當釘當殺。噫吾主嘉言奇行斯民亦嘗蟻附蜂從何以事之結局

竟如是哉要知因此一語如德亞巨室之陰謀於是見先知之預言

亦於是驗。蓋既曰釘之，遂終於釘之而已。耶穌既將被釘，則學耶穌者，亦當同之被釘。卽釘我五官之私欲，釘我三司之偏情，釘我七罪之隱慝。凡害我靈，累我心者，亦無不釘之。

第二段 官曰：彼究行何不善。路加二十三篇比辣多斯言：原可挽回眾心，追憶吾主傳教之時，所施諸惠，如瞽者能視，聾者能聽，癱者能行，更有賴主救援，得免獄魔之虐。儔眾間，必有多人身受其德。然忘恩之人，雖官之辨雪，亦無用也。今試自問：我生平，更問我自入修院以後，沾主寵恩無數，轉念之際，亦破我昏迷，振我心志，日進於愛主事主之功。乃至今依然疎懶，何哉？當究其病根，致力芟之。恨如德亞人之無良，痛己心之負德，熱吾衷情，廣我意量，致身事主，報答主恩。

第三端 比辣多曰：我果不見釘殺之辜，將罰而釋之。同上比辣多於

大眾前，明言吾主無辜者三。今欲罰以裸身之辱，鞭笞之苦，是又不通之至。其心欲釋主，特罰之以平眾心，以消眾怒。殊不知判主受鞭，適所以開其受釘之端。因羅馬國例，凡釘死十字架之犯，必先加鞭笞之刑故也。余靈爾所行之不通，與事之乖舛，如比棘多者，亦復不少。意欲愛主，心求進德，而其實則否。喜謙抑，甘刻苦，德之進也，爾則畏之。好聞譽，徇本情，德之賊也，爾則懷之。是猶欲釋主，而又罰之。欲憐主，而又鞭之也。噫，求主赦罪賜寵。祝言

卷三 三月

月省之思

死候

見本卷第二十七題

首瞻禮六

聖心之潔淨

見卷五第二十二題

第二十六

耶穌繫受鞭笞

封齋後第四主日

定像 想見吾主被人解去衣裳，繫於石柱。

特求 求主賜我識主受鞭之苦，倍深愛主之情，益堅進修之志。

第一端 鞭笞之酷

比辣多命鞭耶穌。

若望十九篇鞭笞之刑，當時

最嚴最厲，用於盜賊奴隸之刑。吾主受之，尤爲酷虐不堪。一、因比辣多意鞭後可釋，故令兵卒盡力鞭責，冀動民衆慈心。二、因吾主肌膚極爲細膩，徧流汗血後，尤爲軟弱。今受此刑，其痛比尋常，何止倍蓰。三、因兵手極毒，鞭數極多，且見主默不出言，故輪班鞭撻，更形狠惡。

相傳共用鞭有三種。一、柔荊條。渾爲尖刺。二、牛筋條。梢繫鐵齒。三、鞭鐵索。上下堅勁。當吾主未被笞時。見之豈不戰栗。然因欲補贖我罪。故勇入公堂。甘受其苦。一如在山園中所定願受苦難之意。今吾於前定之志。或委靡不振。或棄置不行。事未措手。心已焦勞。求主賜我剛毅之德。如逢憂疑畏葸。無顧本性之情。惟力行本分所宜。

第二端

鞭笞之慘

比辣多命鞭耶蘇。

若望十九篇

如德亞國律。笞

不過四十。今惡眾鞭吾主。不下五千四百有奇。健卒數班輪流迭責。直至手臂力疲。堅繩幾斷而後已。嗚呼痛哉。肌膚盡裂。全體剝傷。骸骨多露。滿地血流。誠有如先知依撒義亞所歎曰。吾視其容。實非人像。美貌威容。盡已消耗。欲知其名。痛苦之人。是也。我靈獲罪多多。累主身受劇刑。我猶能漠無動念。心如頑石乎。當倍發憐憫愛慕感謝。

效法諸情。堅定心志。日後不論行何苦功。遇何苦境。不忘主繫柱受鞭。而更知所努力也。

第三端 受鞭之故 吾主甘受鞭笞之故。繇其無限愛情。吾主愛情如火。炎炎不息。如見有可爲之事而未爲。見有能受之苦而未受。則此心總覺慊然。人有愛火於心者。乃可悟之。吾主愛人。自願以極貞至潔之軀。受惡人重鞭痛責。補古今天下老幼尊卑。種種污穢己身之罪。此罪之惡。最近禽獸。實以天主之肖像。辱在泥塗。雖僅一犯。已借惡人之手。鞭撻吾主聖身。况頻犯乎。卽捨大過而論。如順五官之快適。貪肉身之晏安。種種小罪。皆致吾主身受鞭笞之故。思念及此。當深謙下之心。動痛悔之情。奮忍苦耐勞之志。以酬吾主無窮之愛。報吾主無量之恩。向繫柱受鞭之耶穌。傾發我感謝愛慕憐憫之情。

祝言

第二十七 補贖緣思死候 瞻禮二

定像 想見一修道人臥病將死。

特求 求主賜我聖寵、俾生勤補贖之工、死爲簡越之人。

第一端 補贖爲臨終之慰 畢生立功補過、是爲我臨終之慰。設有修道者於此臥牀將死、或謂之曰、子終期已至、諸事已畢、然幸可自慰者、才學兼優、令名廣播、身雖將死、人猶如生。爾想此言、果足慰其心乎。彼將曰、爾言諸事、無裨於我靈魂、胡足慰我也。嘗有大德士臨終、謂左右曰、我爲人長上、素膺大任、皆爲空虛。我善能講教、人皆樂聞、亦爲空虛。我修德立功、斯爲實事、斯爲我所有。嗚呼、余靈既知人死時、所慰者惟生平之功德。亟宜與吾主同荷十字架、釘死世俗偏

情、勤行苦刻神工。聖多默更比云、凡全輕世務、切願進德、愛守規戒、忍受苦勞、勤於聽命、克制己私、并爲愛基利斯督而受諸逆境者、將有福終之厚望。師主篇一卷二十三章求主賜我善終、復振我心志、勉行封齋內瞻禮二所示之神工。

第二端 補贖爲臨終之望 修德之人將死、有時心中憂戚者、非因

將失世物、每緣多獲愆尤。經曰、卽於已赦之罪、毋弗憂懼。辨德經五

篇又曰、人不知爲主愛、抑爲主憎。辨德經九篇故人必先苦己身、自

報主仇。庶臨終時、可望主慨然憐憫。經亦曰、以補贖之工、主伴爲不

知人罪。知識經十一篇昔聖喜辣戀將死、覺有疑懼。旣而奮志自壯

己胆曰、余靈、爾從耶穌肩負十字架、於今幾七十年矣。離此濁世、赴

主臺前、何畏之有。我靈慕聖人之死、須效聖人之生。乘此封齋時、急

爲補過立功。聖多默更比曰：汝在壯時，能行多善。然我不知汝在病弱時，能何爲耶？將有時焉，欲得一日一辰，以遷善改過，然我不知能求得否也。師主編一卷二十三章動情定志，彷彿第一段。

第三端 補贖爲臨終之樂 農人至秋穫時，豐盈有慶，已忘東作之勞。且前日愈覺辛勤，則斯日愈形歡忭。善人終時之神樂，何以異茲？蓋善人一生勤修不怠，兀兀窮年，迨至終期，必收己德行之效果，領己功勞之賞報，獲主所許之榮福。思念及此，心靈當如何喜悅。回想前日之苦工，必以未能多行爲憾。及升天見主，享無窮真福，更將自賀生前所行之補贖。昔聖伯多祿亞爾剛大拉，一生苦刻，極爲謹嚴。死後身繞大光，現於聖女德肋撒曰：因我所行之苦工，獲如此大榮。今我求聖人聖女，轉求天主，加我神力，奮勉前修。祝言

第二十八 耶穌茨冠苦辱 瞻禮三

定像 想見吾主坐於小櫓，身披紅袍，頭戴茨冠，手執竹杖，被眾兵戲侮，僞拜如王。

特求 求主賜深悔己罪，及熱愛吾主之情。

第一端 茨冠敝袍竹杖之辱 吾主受鞭笞後，渾身糜爛，無處可以受刑，惟聖首尚安全無恙。惡黨不容吾主有一肢不苦，遂思一新式酷刑，加吾主聖首，以快己心。按瑪竇與若望二聖史所載，兵卒以紅袍披於主身，又織棘圈戴主首上，使右手持竹竿，跪其前而戲啗曰：『亞物如德亞王。』後唾其面，以竹杖撻主首，以掌披主頰。瑪竇二十七篇，若望十九篇，我靈於此二聖史所記，逐句深思，哀歎吾主，真如依撒義亞先知所謂飽飫侮辱。二篇試問受此侮辱者，究爲何人，何爲

至此當感發衷情。堅定我善志。勿令我思言行爲。有負吾主爲我甘受苦辱之心。

第二端 茨冠之痛 惡黨旣織棘圈。戴吾主首上。瑪竇二十七篇。猶以爲其痛未曾深入。遂以竹竿擊茨冠。令棘刺深入於腦。嗚呼哀哉。吾主斯時之苦。尙堪設想耶。吾主先受鞭笞嚴刑。嗣受茨冠劇苦。而不卽斃命者。亦其靈異之能。不使受刑絕無所覺。乃使忍苦不至於死。俾能終釘十字架。備受諸艱。是則吾主所受之苦。誠從來所未有也。須知吾主受此茨冠之苦。爲補人頭顱所犯之罪。爲贖人腦髓所有之惡。我嘗忘主在監。種種邪思傲念。逆主傷人。出自頭內者。皆致吾主受茨冠之由也。今當憐主痛楚。悔我前非。定志慎於思念。再不敢獲罪於主。

第三端 吾主含忍 主受惡黨各種毒刑、慘酷至極。乃竟不發一歎、不出一聲。噫、吾主含忍之德、誰能測其萬一哉。試思吾主在蓋法處、被人掩目欺侮。今在比辣多衙內、受兵僕等輪流肆虐。或唾面、或披頰。而吾主絕不少偏其首、以示不忍。人欲取其所持之竹杖、主則與之。人以竹杖授主、主則受之。其含忍之德、誠無限量哉。我於平日間、遇有小挫小患、卽中懷恚忿。遇有虛聲僞譽、遂心滿意足。是則何謂耶。倘不忘飽飫侮辱之耶穌、非惟不樂人世之榮譽、且不願我在一人之上、而願置我於衆人之下矣。蓋爲耶穌之徒者、其心思意願、固當與世人有霄壤之別也。問爾自忖何如。耶穌所受諸苦辱情形、天神無不目覩。今偕天神向主訴情。 祝言

第二十九 比辣多携耶穌出外示衆 瞻禮四

定像 想見吾主身披紅袍、首戴茨冠、立於眾人之前。

特求 求主賜我聖寵、熱我愛主榮主之心。

第一端 耶穌戴棘刺圈、披敝紅袍。比辣多携之出外、謂眾曰、人乃在茲。掌教等人、更大喧譁曰、釘之、釘之。若望十九篇吾主全身剝傷破裂、滿面血流。比辣多見之、惻然動念、諒眾人見之、亦將動情憐赦。於是携主示眾曰、人乃在茲。猶言我審斯人無辜、今受苦如是、可以已矣。豈知掌教人等驕傲妬忌、怙惡不悛、雖殺害天主、貽禍萬世、亦不之慮。故高呼釘殺、嘔嘔不已。吁嗟余靈、聽比辣多語言、而咀其味。看吾主之情景、而究其故、亦當動心感激。想私欲之偏、爲禍最烈、能不戒慎恐懼、杜漸防微乎。宜與達未聖王求主曰、仁慈之父、看耶穌聖面、憐恤我。聖咏八十三篇赦我罪、賜我恩、使我行事之間、心目如常。

見吾主。

第二段 人乃在茲。見上默想至此，當思天主聖三，亦以此言語我。聖父曰：人乃在茲。斯人也，乃吾先許於亞當亞巴郎達未諸人，實係吾所親愛者。茲爲愛爾，救贖爾，自謙自抑，受此凌辱艱辛。爾當聽其命，而欽崇之。聖子曰：人乃在茲。吾也。自天降世，爲贖爾罪，醫爾病，療爾傷，代爾受艱，作爾中保。爾當體我苦難，立功補過，不負我爲爾救贖之心。聖神曰：人乃在茲。斯人也，因吾仁善之功，生於貞女之胎。今因愛爾，情甘戴此棘圈，以當榮冕，作爾神靈之配。爾如愛之，當近之，隨之。此神妙之親，將結於十字架上，而成於天堂永樂之所。余靈聞聖三之言，爾將何辭以對，思之思之。

第三端 比棘多曰：爾者接釘。眾曰：吾國有法，依法應死。以自謂我實

天主子。若望十九篇。吾主敷教時。嘗指摘掌教等人之詐僞。故其宣聖道。著德表。行異跡。大都喚醒彼等之迷。鍼砭彼等之病。久已昭彰衆人耳目。今伊等必欲殺主。實爲此故。乃諱而不言。以掩己媚嫉之惡。可知泊於嗜欲。惑於偏私者。往往誣劾他人。掩飾己非。或怨在上之不明。或恨他人之不公。謂己所作所爲。惟圖愈顯主榮。保護正教。究其實。無非根於驕傲嫉妬諸病。求主賜我免獲斯咎。思言行爲。悉務真誠。祝言

第三十 比辣多復訊耶穌 瞻禮五

定像 想見吾主形狀極慘。容儀極肅。立於比辣多前。

特求 求主賜我忠勇之心。不因情面而獲罪於主。

第一端 眾曰。依法應死。以自謂我實天主子。比辣多聞語大驚。 若望

十九篇比辣多一聞自謂天主子一言。不但不以爲罪。且以爲其中必有真情。故不勝驚懼。蓋以異教人識見。謂吾主平素言動。皆超越尋常。或者係尊神子降世。殺害之者。必受報復。因大爲駭異。非真信爲天主子。而彌深寅畏也。夫比辣多身居教外。素不信主。猶疑神明在目。不敢罹罪。何吾人崇奉聖教。日信天主。知主無微不照。無惡不罰。乃竟肆意妄爲。毫無忌憚。豈不昧哉。今當謙卑愧悔。日後慎我言行。不忘上主臨鑒。

第二端 比辣多再入公堂。問耶穌曰。爾何方人。耶穌不對曰。不對我。盍知我有釘汝權。并有釋汝權。耶穌對曰。倘允命不降自上。爾萬億弗克屬予於爾權下。同上。吾主生長之區。比辣多早已明悉。今復問爲何方人者。欲知主爲誰之苗裔也。惜其心思不正。志氣多驕。是以

吾主不對耳。蓋吾主之淵微奧妙，以及降生救世諸義，惟心謙志潔者乃得聞知。吾主雖不明答所問，而其斥官之妄，貶官之傲，已隱認已爲天主子矣。余靈爾於祈禱時，不聞主語，不見主光者，因心思邪僻，難獲聖寵乎。抑志氣矜夸，事主不忠，妄用爾自主之權乎。求主憐憫，寬赦前非。日後默禱誦經，務期虛心預備，潔志恭行，庶幾有問必應。

第三端 比辣多盡力圖釋。如德義大呼亂喧曰：爾或釋斯人，明著弗愛帝王。人謀篡王位，斯必帝王之仇。同上比辣多既聞主語，憬然覺悟，用盡心力，計圖釋主。誰知如德亞人開闢羣噪，謂如是顯係不愛帝王。比辣多心搖志亂，惑於眾論。由是胸無把握，將前此所有一點良心，埋滅幾盡。而所謂畏神之意，雪冤之情，全行拋却。釋主之心既

願。斯判主之心遂起。噫。何如是之昏愚柔懦耶。然默想者。勿徒過責夫比辣多也。蓋信友中或圖名利。或重面情。不顧身靈。致陷於殺主之罪者。不止百千萬億。卽修道之人。天主拔之於世。脫名利之牽纏。無面情之連累。固爲大幸。然亦未始無虞也。戒之慎之。按特求之意向主矢願。祝言

第三十一 比辣多決主死刑

瞻禮六

定像 想見吾主俯從官斷。甘受死刑。

特求 求主聖寵。使我克治肉身私欲之偏。

第一端 比辣多將水對眾盥手曰。斯無辜人之血。與我無與。爾輩自顧。眾齊聲答曰。吾輩並吾輩子俱任受之。瑪竇二十七篇爲人上者。有循行法律之職。若不盡其職。則爲禍有不可勝言者。如比辣多之

判吾主，是已。當教首等人訟主之時，比辣多明知主爲無辜。倘能一秉至公，斥其誣妄，則百姓認識吾主爲冤抑，必不從教首之強勸。亦何至出此誓言，而到今受罰哉。默想者於此，正有當知之訓。設有時長上堅持規矩，懲我過失，拂我偏私。我切不可心懷不悅，違背其言。蓋我行多愆，必須規戒。如身有疾病，必待醫治。倘惡醫士飲我以苦口良藥，豈理也哉。謝主賜我精明上司，引我修靈德路。凡遇有所戒飭，宜欣然從之。

第二端 比辣多欲遂民願，付耶穌任憑戮殺。瑪爾谷十五篇，若望十

九篇，比辣多言吾主無辜者再四，今仍徇眾判釘死者何哉。誠以雖知教首詆誣，惡眾妬忌，而心志怯懦，不能極力剖白，以釋放吾主。噫，古來冤獄，莫甚於斯。比辣多識見甚明，何竟陷於如是大罪。從可知

修靈一道，最爲可危。世有大德之士，行詣爲人欽慕已久，卒乃陷於異端荒淫等過，以致叛逆聖教者，大抵因私欲初萌時，不知阻止，故至罪惡叢生，心神瞽亂。語云：從惡如崩，信然。謝主賜我免陷斯惡，求主堅我聖召，輔我前修。凡遇偏私，務當及早芟除。

第三端 携耶穌出外，負十字架。若望十九篇十字架乃天主聖父所定，作聖子救贖世人之具。時人心術不良，聖父因以成己聖意，卽以聖子之死，大彰自己之光榮，普贖世人之罪惡。而吾主之心，自初生以至當時，亦惟冀行聖父之旨，此外別無他願。則其荷十字架時，誠何如喜躍也。余靈爾思吾主之表，可知爾受惡人之欺凌，理應忍耐。受長上之譴責，更宜謙承。以吾主十字架，常置目前。則世苦非但不以爲苦，且以爲甘也。向背負十字架之耶穌，誠求賜佑。祝言

第三十二 耶穌負十字架登山 瞻禮七

定像 想見吾主肩負十字架，一路壓跌難堪。

特求 求主賜我聖寵，俾恒隨吾主，勇行十字架之路。

第一段 武士解耶穌所披紅袍，衣之本衣，引之釘十字架。行至加爾
瓦畧山，偕行之二盜，同赴受刑。瑪竇二十七篇，路加二十三篇，觀聖
經所載情狀，可知吾主真爲飽飫苦辱之人。試思吾主既受至卑之
刑，又偕盜賊同行，死與盜賊相等。解去絳色敝袍，穿平素之衣。此衣
卽前日榮耀入城所服之衣，使人認識，增其羞恥。噫，此皆訓諸信人
及諸修士，凡欲肖似吾主，必須甘受凌辱，忍耐苦勞，負吾主十字架，
執吾主儀仗，爲吾主從徒。問我於斯，有何情意。欣慕乎，抑畏懼乎。保
祿宗徒曰：因吾主耶穌，我於斯世，斯世於我，彼此已如釘死。除十字

聖架外，吾絕不願有何榮顯矣。求主賜我臻斯德詣，時時勉之。

第二端 行際有濟助。納人名西滿者，返自田間，眾執之，任以十字架，

令荷於耶穌後。路加二十三篇吾主自山園祈禱，出多汗血，已是頓

憊不堪。嗣被惡眾引赴各署，往返多勞，更覺疲倦至極。後受鞭笞，

冠氣息將絕，愈形力乏。負此重大十字架，行走在路，傾跌者三。惡人

恐其死在半途，不得見其受釘之歡。因強西滿助背十字架，至於山

巔。有心人於此，能無興感。蓋當時千萬人中，豈無因吾主聖蹟，而曾

得病痊者乎。豈無因吾主寵光，而幸獲奉教者乎。何以卒無一人敢

行出首，爲主聊效一臂之勞，一肩之助。聖心於此時，將如何酸且痛

哉。我於困苦謙卑之路，或因情面，或爲艱難，不敢相隨主後。撫躬自

問，果何以爲情耶。愧悔之餘，重獻我心志，此後願忠勇於主事。

第三端

濟肋納人西滿亞立山與魯甫之父，自田間返，過其地，強之

負耶穌十字架。

瑪爾谷十五篇

西滿初背十字架，雖覺勉強，既而得

主寵照，兼得信德恩光，助負登山，一如吾主弟子無異。不出怨憤之言，不露慚愧之色。聖史備述其事，父子名姓俱揚。相傳三人末後，皆臻聖域。故西滿服吾主之勞，共吾主之苦，不過片時，而獲主酬報，享受光榮，實無窮期。余靈思念十字架所含之榮福，當深爾珍重愛慕之情。多默更比曰：因此苦架，可至天國。人靈之救，在此苦架。人之永生，在此苦架。人得衛護於仇敵，亦在此苦架。上慰之流溢，在此苦架。人心之毅力，在此苦架。心神之快樂，俱在此苦架。德行之根本，在此苦架。聖德之成全，在此苦架。靈魂之救，永生之望，莫不在此苦架。師

主編二卷十二章求主賜我能識苦架之珍，更賜我能欣荷十字架。

時從主後。祝言

第三十三 耶穌途中顧訓都城婦女 苦難主日

定像 想見城中婦女隨主流淚慟哭，吾主回頭警訓。
特求 求主賜我聖寵，使倍切我憐愛吾主之情。

第一端 城中人民羣隨，并有婦女哀號甚慟。路加二十三篇時隨從者眾，不過欲觀吾主之死，以快耳目，以新見聞。惟其中有一等婦女，素識吾主，素慕吾主者，今見吾主受死，實不勝其哀慟。彼乘興而來，興盡而返者，烏知陟山受死之耶穌，卽賜人永生之耶穌乎。今在封齋期內，果有許多向善精修之士，追念吾主受難事蹟。幸我亦在其中，日以數刻之時，獻於吾主，潛心靜想主苦。然試問此時之心情意念，果能如當日之婦女動憐憫，發熱愛，深痛悔之情，感救贖之恩乎。

當懇切祈主，訓我默想主苦，庶得聖愛與諸德之泉源。且今封齋之時將畢，吾主受難之日愈近，當倍切虔誠，務善行我默想。

第二端 耶穌回顧語之曰：京都之女，勿哭子，當哭爾，當哭爾子。同上
吾主處痛苦難名之境，自忘其苦，而懇懇屬意於人。告以來日之禍，訓以痛哭之緣，教以力行補贖，冀免於難。噫，吾主仁愛之德，何如是之厚，如是之廣乎。我也身逢困厄，即全不顧人。惟望人注意於我，憐憫我而助佑我。否則怨氣上騰，訾誹交作。如是，我之愛德，較之吾主，不啻天壤之別。耶，當自深愧忤，今而後不忘吾主之表。擴充我仁愛之心腸，不惜我一己之利便，照顧我昆季之急需，不願人因我而少受煩數。

第三端 主曰：以茂樹受罰如茲，枯朽將何如。同上
吾主爲天主真子，

眾聖之王，思言行動，皆含至德。其德根於純愛，如樹之開花結實。吾則塵埃糞土，卑污罪人，具損壞之本性，加以一生多罪，如朽木枯枝，理當刀斫斧伐。乃天主聖父罰聖子終身貧困，畢世苦勞，受眾人無數磨折，任惡類百端殘害。如此種種苦難，皆爲吾主茂樹之罰也。若天主欲以罰聖子者，罰吾人，吾人豈可怨恚。然而幸矣，天主慈愛無窮，罰聖子受苦，賜罪僕蒙恩，使人藉聖子聖血寶死之洪功，將神靈與之契合。則雖細微善行，亦可悅主，亦可獲享常生。如是，而吾猶嫌規誡之嚴，補贖之苦，不知稍自奮勵，豈理也哉。向至仁至愛至慈至悲之耶穌，深悔痛改，并發憐愛之情。祝言

第三十四 補贖緣思審判

瞻禮二

定像 想見己身如在吾主座前，護守天神與魔鬼胥證予善惡。

特求 求主賜我聖寵，俾能恒隨保祿宗徒之訓，自審我行。致哥林

多人前書十一篇

第一端 補贖審主判之威 審判時，首可懼者卽主判之威。何則，判我者卽耶穌真天主，我乃輕慢凌辱，用其所賜之恩，爲加伊苦辱之具。迨死後赴其臺前，想彼審判之嚴，能無恐懼。今日之主，爲寬仁慈憫之主。及至審判時，已爲報復公義之主矣。主嘗謂人之浪言，亦難逃鞫訊。瑪竇十二篇古聖若伯早明此理，故曰：主降地審判，予將曷爲。若伯經三十一篇余靈，爾因愛情冷淡，心志昏朦，不知過失之多且重，反而悠然自得。赴主審判之時，能免驚惶無措乎。彼時爾所欲爲者，今及早圖之。承認爾事主不忠，及辜恩負德之愆，謙卑愧悔，獻爾補贖神功，一如封齋內，首瞻禮二之所示，可也。

第二端 補贖減罪過之債 審判時，又可懼者卽罪過之債。蓋我一生負罪，既重且多。而主之判我也，亦嚴且密。凡思言行動，及一切浪費時日，缺少善功，并善功行之不善等過，主將一一研審。另於修道人，日日受主異常恩寵，日日有進德修業之責，主亦無不持籌握算。聖濟彼良曰：審判之嚴肅，依寵恩之深厚。吾主亦曰：凡多與之者，必多責之。路加十二篇噫，是可畏也。在昔苦修諸聖，想及此理，每憂罪債靡償，不禁恆哭前非。嚴行補贖，藉以少慰。余靈自知爾罪債非輕，若不急行補贖，以求稍減。迨日後聽主審判，將若之何。今封齋之日，三分已去其二，宜加倍奮志力行。與達未聖王向主曰：懇主勿面臨，而正視我諸罪。祈銷我諸逆行。聖咏五十篇

第三端 補贖免永死之案 審判時更可懼者，卽永死之案。吾人在

世孰不願獲常生而免永死。然此案定自吾主。常生之案爲何，如善靈在世勤行補贖。死後升天，與天神享無窮之樂。苟補贖稍有所缺，亦必於煉火受苦。待償清所負，然後升天。永死之案爲何，如惡人在世不知行補贖。永後墜獄，同獄魔受無盡之苦。余靈爾切願在天主簡者數中，爲天主特寵之靈。離世後，直昇天國，卽享天榮。然此權操在爾手，卽善用主寵，勉勵躬修。務期德造純全，行臻精粹。立功補過，克己苦身。斯乃必由之路，必用之法。誠能如是，死候之樂，亦大矣哉。勉之望之。 祝言

第三十五 耶穌嘗苦膽被褫衣瞻禮三

定像 想見吾主在加爾瓦略山上，被惡人解去衣裳，飲以苦膽之酒。

特求 求主賜我聖寵，益熱我愛慕耶穌之情。

第一端 行至加爾瓦畧所。若望十九篇吾主選此山爲釘死之區，含有多義。一、昔天主命古聖亞巴郎，祭其子依撒格於此山。二、當時如德亞大盜巨犯，受刑皆在此山。三、據聖師所論，古聖諾厄葬原祖亞當骸骨，亦在此山。故有加爾瓦畧之稱，譯言骷髏之所。夫亞巴郎與依撒格之祭獻，爲吾主祭獻之預像。今吾主成其祭獻之實事，自甘受盜犯之嚴刑，爲彰聖父之光榮，爲贖世人之罪惡。而卽於原祖入土歸灰之地，除死之根由，還人之永命。噫，天主處事神奇，果非人之聰明所及料。思念及此，尙其稱頌而讚美之。務於萬事中，不忘天主宰制，而順服之。

第二端 飲之以苦膽之酒，伊嘗而不飲。瑪竇二十七篇當時俗尙，凡

臨刑者、以沒藥和酒飲之、使昏其知覺、以減苦痛。惡眾於吾主、欲倍加荼毒、置苦膽於酒而飲之。主受而嘗之、不欲終飲。其嘗之之故有三。一、受惡人不及加之苦、而自苦其口。二、補贖人飲食失節、過求甘旨之罪。三、示人尅味之表、勉人勿過分嗜好、奢侈飲食、其不欲終飲者、不欲減其知覺、庶於被釘時、能全覺嚴刑之痛也。求主赦我饕餮不節之過。定志以後、稍行苛刻於飲食。

第三端 耶穌被人褫衣。按羅瑪律、凡受十字架刑者、解衣裸體而釘、欲其苦辱相兼也。吾主嘗苦膽之後、惡人欲急解其衣、祇因鞭笞時全體剝傷、衣與膚血、已相膠黏、無從解脫、故用強力褫之。於是皮裂血流、痛比鞭撻更酷。吾主欲在眾人前、重受痛辱、乃訓人事主、不論有何困乏、受何羞恥、總不宜畏却。須視如已死之人、雖脫盡世有、亦

不辭焉。此世物之捐離、或在於事、或在於心、乃吾主明訓、無人得免。
主嘗曰、人不絕所有、且不絕自身、不得爲吾徒。路加十四篇、瑪爾谷
二十四篇、彼身在修途、而猶趨俗尚者、自問何如。宜愧悔謙卑耶。求
主却卸我私欲之偏。祝言

第二十六 耶穌釘一盜中

瞻禮四

定像 想見吾主臥於十字架、惡黨用大鐵釘、釘其手足。
特求 求主賜吾憐憫主苦、與痛悔己罪之情。

第一端 釘耶穌時適正午。瑪爾谷十五篇耶穌被釘之地與被釘之

時、皆天主聖父於無始之際、預爲擇定。余靈、爾宜如身在加爾瓦畧
山上、目覩吾主受釘情狀。見武卒等逆諸民衆、咸立十字架旁。隸役
右手執鐵椎、左手持巨鐵釘、令主臥架上。主卽臥。命伸右手、主卽伸

右手遂將椎釘之。其聲丁丁然，響應山谷。右手既釘，筋絡收縮，左手不能至十字架釘眼。乃盡力拽之釘眼，而釘之。後又釘二足。嗚呼痛哉！主當此時，肢節有抽筋之痛，其苦不堪設想，而吾主不呼號一聲。此情此景，思之惻然，言之慘然。知聖史於此，惟曰釘之而已。餘不忍言，而亦不能言。第吾主受此劇苦極刑，皆爲愛我之故。思念及此，能不傾心愛慕，動情感泣乎？前聖於斯，多得其心，勇神慰聖愛之恩。我今宜趁吾主未懸空中，急將脣吻附於聖傷，吐我五衷熱愛之情。

第二端 吾主手足既被釘，痛至欲死，苦已不堪。然惡衆之心，猶欲百倍其苦。故將十字架豎於空中，致吾主聖身甚重，一時勢若下垂。於是釘創之處，凡呼吸之頃，其痛楚更難言狀。嗚呼！使人受此劇苦，卽片時已覺痛摧肺腑。而主受之，乃歷三點鐘之久。非皆愛我之故乎。

思念及此，凡在教信人，修德善士，皆宜返躬自問。一、我所曾受之困苦，與凡能受之艱難，卽甚至捨生致命，較吾主十字架之苦，能相若否？二、我爲感吾主愛我之甚，至今有何可貴之行，日後有何當務之事。求主明示己意，欲我何修何獻，以酬其愛。定志及早爲之。

第三端

又釘盜賊二人於耶穌左右。

瑪爾谷十五篇

吾主不但受莫

名之苦痛，亦且受最深之恥辱。時惡人釘二盜於其左右，若以吾主爲盜賊之最惡者。且以吾主自謂天主子，若爲欺世惑民之巨犯。故民衆與教首爭相譏之曰：爾倘爲天主子，可自架下，吾儕將信。同上當思吾主固爲天主子，然其不欲下者，正欲死於痛苦，以終其全燔之祭。且欲居天地之中，作人中保，調燮上天下地。如保祿宗徒所謂：滅人死罪之案，是也。默想及此，我當跪伏吾主十字架前，虔誦云：耶

蘇基利斯督，我等欽崇爾，讚美爾。爾因此聖架，救贖普世。虔心切意，按特求之旨懇主俯允。祝言

第三十七 耶穌求聖父赦仇

瞻禮五

定像 想見吾主懸於十字架，仰求天主曰：父，寬宥彼，彼實弗識所爲。

特求 求主賜我善良仁愛之心。

第一端 主求聖父曰：父，寬宥彼，彼實弗識所爲。路加二十三篇昔亞

伯耳，無辜爲加因所殺，其血呼冤於主。主罰加因及其子孫。今如德亞人殺天主之子，義人之首，其惡較加因何止萬倍。今吾主臨終在卽，正當向聖父訴冤，求震雷霆之怒，以雪己恥，以戮己仇。誰知吾主竟大不然，甫釘於十字，懸於架上，若恐聖父將動義怒，故卽舉目仰

求曰、父、寬宥彼。且爲之諉罪、減輕其惡。曰、彼實弗識所爲。噫奇哉、主之善良仁愛、非惟人所不能及、抑亦人所不能料也。吾主爲聖德之源、受如是痛楚、反爲求赦、又爲之辭。而吾於毗睚小怨、不能效吾主仁愛、每悻悻於心、且無端責人意之不良。較之吾主、其悻何如。亟宜稱頌主仁、悔己無良。自今以後、總當強恕而行。

第二段 比辣多書一橫板、用如德亞厄濟亞辣丁三國字體、置之十字架楣上。曰、耶穌納匝諾如德亞王。若望十九篇比辣多見如德亞人恣意強橫、逼決冤獄、心殊悲恨。故以三國文字、大書特書、置主架上、意欲稍辱伊等。而此事適合天主之意、用彰吾主光榮。向日吾主所云、自謙必被陟之言、於此益驗。且諸先知之語、亦將因之有效。蓋謂主之福音、自如德亞傳至厄濟亞。今希臘國與羅馬古辣丁國

漸及普世諸國也。奇哉天主上智，每因人之禍心，成己聖意，顯己光榮，以裨益吾人。思念及此，我何憂疑於天主之事，而畏憚不前哉。速宜以神形諸有，置於主懷。卽有仇讐害我，艱難困我，當思此皆可增我德，可益我靈，而總不敢稍有怨心。

第三端 掌教語比辣多，勿書如德亞王。寧書其云，我爲如德亞王。比辣多曰，所書旣書。同上如德亞人誦架楣所書，觸彼傲心，深滋不悅。故請改書，耶穌自云，我爲如德亞王。意欲以吾主僭稱王，而受此刑也。比辣多向雖懦弱，而此舉殊形果毅。謂我所書已書，竟不更改。噫，此乃訓我默想中所有善念，及避靜內所定善志，不可輕易改移。當毅然力行，毋畏艱阻。苟有三仇隱計，託故推辭，誘我棄捨善工，或改換前志，可應之曰，凡因天主寵光默示，而決意欲行者，毋或更易。曰，

所書既書，卽所定已定矣。乃向求父赦仇之耶穌，望賜恆心堅志。
祝言

第三十八 聖母痛苦 瞻禮六

定像 想見聖母近立架旁，目覩耶穌懸於架上。

特求 求主賜我聖寵，憐聖母之痛苦，偕聖母而悲傷。

第一端 聖母痛苦之況 遵聖教之旨，今日專想聖母痛苦，與吾主同受艱難。欲稍知聖母痛苦之深長，可取譬以喻之。設有爲母者於此，慈愛異常，惟生一子。且此子品詣丰姿，人間罕有，視之珍如拱璧。更當年富力強，而殂於非命。受惡眾殘酷侮辱，茨冠刺腦，滿面血流，猛加鞭笞，遍體鱗傷，身無完膚。卒之手足被釘，懸於架上，歷三點鐘之久。種種淒惻情形，其母見之，而毫不能施救。噫，爲之母者，痛苦何

如哉。然吾聖母之苦，亦不僅此。自聞西默盎利刃刺心之語，懷此苦劍於心者，三十三年於茲矣。思念及此，而猶不動我憐憫孝愛之情，是誠何心。嗣後當體吾慈母之艱難，謹我修省，思有以慰之。

第二段 聖母痛苦之德 聖母之痛苦，正所以彰聖母之德。其德如何。一、抑制本情，無半句怨恨之語。二、翕合主旨，承行聖父欲聖子慘死之命。三、寬宏大度，超越爲母之常情，心切天主之光榮，及世人之永命，甚於愛子之生活。四、剛毅堅強，挺立十字架旁，視聖子之死，送聖子之終。五、慈善莫測，與聖子同心求主，寬赦戮殺之人。噫，聖母若此，真致命者之后，及修德者之表。我將於艱難困厄中，宜思有以效之。求聖母轉祈吾主，賜我恩寵，能法其行，使我諸愁諸苦，盡成立功修德之資。

第三端 聖母痛苦之緣 聖母無纖微愆忒。天主何以欲其備嘗辛苦。聖師解曰。聖母爲諸聖之后。自有超越諸聖之事。一。超越於肖似吾主。此卽先知依撒義亞所謂痛苦之人是也。二。超越於愛德之量。夫此愛德之量。證驗於爲主忍受艱難。三。超越於功之高廣。功者抑情克己。從事於用力之工。四。超越於祭獻之誠。爲榮主救人。亦不顧惜其心身。天主特愛聖母。欲賜之天府珍奇。惟有以十字架爲至寶。倘天主欲我與分其實。亦賜我以十字架。我可以苦難爲辭。而心生疑懼乎。正當自深欣慰。忠勇直前。想天主最愛之聖母。尙如是劬勞。則我亦當甘受艱辛。隨我慈母。向侍立架旁之聖母。認我過惡。稍慰母心。 祝言

第三十九 耶穌恩赦右盜 瞻禮七

定像 想見吾主懸於十字架上，在二盜中。

特求 求主賜我敏隨主寵，無失主恩。

第一端 左盜譏耶穌曰：爾倘爲救世者，救爾兼救我輩。右盜責之曰：

爾並屬罰例，猶不畏天主之威。路加二十三篇二盜生前同刑，死候

異轍。其事奇，其訓深矣。事之奇者，二人同釘吾主架旁，同聞求父赦

仇，同時超眾之仁，良含忍。乃一則至終怙惡，侮辱天主。一則隨聖寵

之光，開心明目，得悔罪救靈。如聖濟彼良曰：卽以所流之血，洗滌前

非。由是聖教會，亦以聖人之禮敬之。其人名第斯瑪西歷四月二十

四日爲其慶日。訓之深者，天主賜人所需聖寵，其間雖多寡不同，人

當善用之爲急。如右盜所受之寵恩，雖多且大，倘非順從吾主指引，

亦不得悔改而自救。故人於主寵之潛感，宜留神敏速隨之。庶不失

救靈進德之助。問我於今，果何如乎。自愧不忠不勇，多負主恩。懇求寬宥。定志改悛。

第二段 爾我受刑，乃理乃義。斯刑正當我愆。斯人實無辜，卽向耶穌曰：主，至本國時，請記我一念。同上右盜痛悔順服之誠，認過受罰。以謙下倚主之意，求主矜憐。是實獲主心之要訣。果能此道，不但能得前愆之赦免，亦可蒙主恩惠之洪施。然當吾主劇刑慘死之日，獨能識爲真主。則可知右盜得信德之恩，尤爲超卓。吾人劣弱，一生罪過甚多。果能效右盜之行，受罰不怨，自悔其罪乎。抑文過飾非，以重其咎。偶受應得之懲警，卽憤懣不平乎。撫躬自問，務期惡則改之，善則加勉。

第三端 耶穌謂之曰：我確語汝，汝偕予今日並享天堂真福。同上右

盜釘於十字架上，命在呼吸。回溯生前，轉念身後，實有失望與惡死之危。乃聞吾主恩賜升天之語，心中宜何如歡慰。於是知祈禱功效，實甚大甚奇。能以極惡無賴之人，忽變爲天主簡選之人。試觀右盜所求者，惟一念之記。而所得者，前罪之赦，善死之恩，與天堂之福。甚矣，祈禱之力也。故我雖罪惡深重，病根未去，爲哀憐之罪人。總不可疑主仁慈不施，疑我祈禱無益。蓋主之仁慈，視乎人之祈禱。其人之賢與不肖，不問焉。若我形神愈多苦患，愈當行祈禱之工。卽或心煩慮亂，不知所云，亦可偕右盜曰：請主記我一念。我乃貧者苦者，人求我與，主言豈欺我哉。賀右盜之福，求寬裕聽求之耶穌，救我罪過，援我升天。祝言

第四十 兵眾分衣爭笑

聖枝禮儀

今日默想注意者

二、續思吾主在十字架苦景。二、憶念吾主受難前六日，榮進都城。

定像 想見主懸架上，目覩兵分衣服，耳聞民相譏誚。

特求 求主賜我聖寵，俾我全心脫離世幻，惟依戀於天主。

第一端 耶穌之諸相識遠立。路加二十三篇今日聖教行祝聖聖枝，

及遊堂咏唱諸禮，記憶主當日入城，如元戎奏凱之榮。然先後六日，而主所受之榮辱，不啻霄壤之別。我爲心身之益，可深思之。前六日民衆來城瞻禮，聞主將跨駒入城，咸往迎迓，隨從者甚衆。若望十二篇今日兵役爭釘之，衆人皆侮之。卽其相識友朋，亦無不遙望而立。可知世態炎涼，患難之中，不足恃友朋之慰藉也。有志進德者，思及於此，可勿戀昆季之殷勤，與長上之憐恤。惟望天主知己苦患，求耶

耶穌作已陪伴。誠能如是，則可免恨人侮己，怨人忘己諸失。耶穌爲慰諸憂患者，求其垂憐。凡受人孤負時，當思其在十字架之情形，以之自勉。

第二段 兵卒將其衣作四分，各獲一分。若望十九篇前六日，都人士出迓吾主，自解披衣鋪地，以待吾主踐履，尊崇其高。今乃強褫其衣，剝傷肢體，釘於十字架。并在其目前，分其衣服，毫無忌憚。可知世事無常，世福無憑，世有皆虛，觀此益信矣。彼世之山川跋涉，旦夕勤勞，不避喪靈之險，以求虛妄之福者，果何心耶。吾主不戀世物，故見人攘奪所有，其心絲毫不動。吾履神貧之道，脫世俗糾纏，是乃天主之特恩，吾儕之殊福，深當感謝。求主賜我日進甘貧之德，却卸我私欲之衣。

第三端 徑走搖首，深辱曰：「倘爾爲天主子，可自架下，撒責偕學士暨長老并譏之。」瑪竇二十七篇前六日，民人踴躍歡迎，自白法熱村名至京都，祝頌之聲震野，曰：「天主降榮下福於達未之子。今日猶是斯民，乃羣相洶洶呼噪，曰：『釘之，釘之。』既釘之，又復搖頭爭誚，共相詬詈。前日降榮下福，無限褒崇。今日殺此釋彼，萬般凌辱。噫，人世澆漓，千古一轍，良可慨也。顧我爲救人之工，或行修己之事，而惟求世之令聞廣譽，名爲修德，而心志驕矜，思慕虛榮，不亦愚乎？夫崇修實德之士，尙難免世俗之譏評。若純盜虛聲，不但主前不得其功，且將爲人覷破，受人挪揄。細思此理，當自悔往日好名之非。凝神壹志，如見聖女瑪達肋納伏在十字架下，偕彼向主，訴我衷情。」祝言

第四十一 補贖緣思地獄瞻禮二

定像 如親聞親見地獄，有人呼號曰：噫，若可與我牛晷時，當急行

補贖。

特求 求主賜我聖寵，俾自地獄之思，知補贖之要，勤行補贖之工。
第一端 我有罪，應下地獄。我惟獲一重罪，即應受地獄之刑。若我
獲罪之後，天主即絕我生命。我自問今當何在。然天主延我歲時，待
我補贖，是非其逾格慈恩乎。無數靈魂，今在地獄，不斷呼號曰：在此
火燄苦甚。路加十六篇欲得片刻以補前愆，不可得矣。今我獲多罪
惡，致傷無窮美善可愛之大父，皆係此身之故。思及於此，能不嚴加
刻責，以勉行補贖乎。即或幸免大罪，主前亦不少報恩之責。況大罪
之債正多乎。若問何爲可償斯債，當勉效聖人類斯及聖女德肋撒
加功苦刻。求賜罪人歸化，不使終爲地獄之囚。須虔誦曰：於永死，主

救我等。求賜我等并兄弟親戚及恩人之靈魂，皆免永禍，主俯聽我等。定志倍熱我心，勤行封齋內首瞻禮二所示之工。

第二端 我多危，可下地獄。經曰：爾等若不悔改補贖，必將皆死。路

加十三篇。吾主有此懲警，因人染原罪後，傲病人心。且肉身私欲，誘人犯罪害靈，無時或間。若不苦刻，力爲除治，必致靈魂顛墜。是故思克傲病，必以謙遜。不知謙遜，雖有才學，必將如蟲蛙之棟，勢必崩折。思除偏私，必以克己。不知克己，必將如保祿宗徒所謂：始以神靈，終以肉軀。致加拉他人書三篇，言始以聖神之寵，行修靈之功，終陷於肉身罪污，而獲罪於主也。思己所有之危，自深惕勵，知聖教恒勸人痛改補贖，克己苦身，多含深意。今者已在聖主日內，齋時將盡，思何以加我德業，以符訓誨之心。向主曰：求賜我真全痛悔，主俯聽我等。

第三端 宜修德、免下地獄。天神路濟弗爾一獲傲罪、卽墜永苦、不能片時補贖。宗徒如答斯一縱偏私、亦遂陷於失望、終罹永獄。是則我欲免下地獄、不能不修心身、而行補贖。保祿宗徒曰、自以爲挺立者、慎毋顛仆。致哥林多人前書十篇又曰、吾自苦吾身、強其服役、毋致訓人道德、引人升天、自反下墮。同上九篇夫聖人堅於主寵、懋德懋功、尙思奮行補贖、免罹罪過。我欲免下地獄、敢不克治七罪、自怠修爲耶。求聖人轉祈吾主、賜我明遵其訓、師法其表。祝言

第四十二 耶穌託母於徒瞻禮三

定像 想見聖母與聖若望侍立架旁。

特求 求主賜我熱愛耶穌與聖母之情。

第一端 聖母近立耶穌架旁、及其妹瑪利亞額阿法、及瑪利亞瑪達

肋納。若望十九篇吾於此，有二甚奇之事可想。二事勢若不能相合，今皆著於聖母一身。是卽聖心之痛，與聖心之恆。聖母之爲母也，極慈極愛，其愛聖子，倍深倍切。今見其活釘十字，高懸架上，歷三點鐘之久，而不至昏絕架下者，此莫名之妙也。且其侍立架旁，雖利刃穿靈，能與聖子同心同德，同獻其祭於聖父，以救世人。其德之超卓，又莫識其奇。人皆謂聖母剛毅，爲天主聖寵之奇，然亦其平日忠信於天主之效。蓋天主加聖母苦難，聖母時能忠信含忍。信德之堅，恆德之果，早已充備心靈，故能有如是之奇。蓋天主加人恩寵，每按人之器量。人能於平常小苦，不負主心，則巨禍臨身，自可望主助佑，而免致顛蹶。當讚頌聖母，更務忠於細微諸事。

第二端 耶穌視母，並視所愛之徒。謂母曰：女人，彼爲爾子。同上吾主

將死、在極苦之中、乃竟自忘己苦、而念及聖母將來之景況。付聖母以貞潔之徒、使見徒如見已然。故謂母曰、女人、彼爲爾子。時卽賦徒忠誠孝愛之情、俾得畢生殷勤眷顧、不啻孝子之於慈母。此吾主示人當身處苦患之時、須心超苦患之上。忘己身、克己情、注意他人、施恩同類。亦訓爲子者、不論有何年歲、遭何困厄、不忘子職於其親。求主賜我聖寵、熱我愛人之心、及深我恃怙聖母之情。

第三端 次謂徒曰、彼爲爾母。從茲以往、徒奉之若己母。同上吾主既顧聖母、復念己徒。欲於未死之前、與以憐愛之表記。卽以己母付之曰、彼爲爾母。此語雖與若望言之、然實以慰天下萬世之人。因據解經諸師所云、若望表萬世信友、聖母爲我等之母、我等爲聖母之子。此乃吾主臨終之命。時吾主亦卽廓充聖母慈心、得廣愛羣生、爲眾

人之母，無異天主。聖父爲萬民之父。經云：從茲以往，徒盡孝事。我自今以後，亦當恭敬愛慕，聽從服事聖母，效法其德，頌揚其榮。賴其轉達，能勝三仇，蒙主寵錫，向聖母矢願，永爲孝子。祝言。

第四十三 耶穌哀號呼渴

瞻禮四

定像 想見吾主懸於十字架上，天下暗暝。

特求 求主賜我聖寵，俾熱愛吾主，及深痛己罪。

第一端 耶穌大聲曰：吾天主，吾天主，何捨去我。瑪竇二十六篇耶穌

未降生前，達未聖王預見吾主受難情形，此言早已筆之於經。聖咏

二十一篇今吾主大聲言之，欲於將死時，證己爲救世主，卽歷代先

知所預言者。亦示其痛苦至極，無絲毫之慰。故曰：吾天主，吾天主，何

捨去我。其言似有怨心，實則出自甘心。此訓我有時爲主光榮，遇艱

屯勞悴，可忘身靈之慰。惟有一事可慰我心，卽在無聊之際，中心誠服主命。如是，雖出咨嗟怨慕之聲，曰：吾天主，何捨去我，亦所不禁也。夫天主聖父，固未嘗捨己子。惟不予之以人世之安，免其暫時之死，故似乎捨之耳。然謂天主捨己子也，亦無不可。因天主不欲捨我人，故若捨己聖子，任其歷受艱辛，以免世人無盡之刑。思及於此，我宜如何深感聖父之愛，深謝聖子之恩。更宜求主賜我善於茹苦，卽遇艱憂，毫無安慰，亦不挫志灰心。

第二段 耶穌知諸事完畢，驗經所言，曰渴。若望十九篇吾主嘗謂經史預言基利斯督之語，隻字必將驗於己身。昔達未聖王述主受苦之狀，有曰：吾渴，而彼飲吾以醴。聖咏六十八篇吾主將死前，口誦是語，曰渴。侍卒聞而送醴，經言於是乎驗。吾主謹小慎微，聖經之言，事

有涉於己者，至死不爽片語。吾於職分，多所忽畧。於規矩，多所違犯。或諉之以事，屬細微，無關緊要，昧矣謬矣。夫吾主聖身，自山園被執後，受諸凌辱，片刻無休。鞭笞茨冠，血流幾盡。其曰渴也，亦情理之常。吾意聞之者，必將水漿以飲之。孰意惡眾竟飲之以醢。嗚呼！人在刑下，雖爲盜賊，人尙憐之。何吾主在苦，竟又加之以苦，至死而後已。余靈當憐憫吾主，而稍慰厥心。

第三端 爾時正午，普地暗暝，以及申初。瑪竇二十七篇從來日蝕，皆漸漸而晦，非立時昏暗。茲所謂普地暗暝者，乃忽然之間，昏黑如夜。此係異兆，並非日蝕。大聖額我略曰：萬物元行，皆證造物主臨格人世。其生也，當空顯異星。其行也，履海如坦途。其死也，太陽失光，地球震動，頑石自碎，坟墓自開。一死有如許奇異，無非示萬物慘傷，哀主

被難而死耳。而如德亞人之心，梗頑甚於鐵石。見如此多異，仍執迷不悟。世有溺於罪惡，不肯回頭者，與如德亞人無異。求主普化之。我得真光之照，出於幽谷，當深感激之情。務期善用主恩，向主虔祈賜佑。祝言

第四十四

耶穌吮醯臨終

建定聖體大禮

今日默想，續

思吾主苦難，兼憶本日瞻禮。

定像

想見吾主身懸架上，吮醯之後，曰畢。

特求

求主賜我聖寵，俾忠誠事主，俯仰無愧，臨終時可得泰然無憂。

第一端

耶穌吮醯後，曰畢。

若望十九篇吾主將死，自知無歉於心，當

行之事，悉已告竣。故喟然曰畢。畢也者，降世爲人，聖父之榮已補。世

人之債，已償。當受之艱難苦辱，已備受。聖父所命，經史所記，先知所書，滿矣全矣。曰：父，爾委予之工，予已悉行，今予詣爾矣。若望十七篇夫人於臨終，能寸心自證主之所欲，人之所求，聖召之所責，俱已奉行。私自歡慰曰：迄今吾行之向，吾心之志，爲天主之光榮，靈魂之拯救，德行之修成，吾平生遵循規矩，順承長命，矜式弟兄，雖覺艱辛困苦，然皆奮志力行。於今已矣，畢矣，將趨赴主前矣。噫，果如是，樂莫大焉。余靈，爾他日出離此世，能如是云乎？勉之望之。務期爲德詣純全之人，不可爲有始無終之士。

第二端 曰畢。同上畢之一語，吾主用以補山園與宗徒話別之言。曰：吾將去世，而歸吾父。若望十七篇今諸事已竣，主目正可瞑矣。特是主將辭世，離逃世人。斯人也，吾主愛之，甚於慈父之愛子，何忍離之。

若是其安乎。然不忍離之。將何法以施之。爰以無窮之仁愛。顯難名之奇跡。立聖體聖事於人間。則雖爲人捨命。仍能至天地窮盡。不離吾人。今日聖教記憶。吾主定此聖事之期。吾當加倍熱心。以受斯至重至奧之洪恩。以念斯至切至深之聖愛。日中屢憶主愛之奇。務宜虔誠敬拜。

第三端 曰畢。同上。吾主之所謂畢者。亦指前夕所行之事。言古教之禮畢。新教之禮起。書教之祭畢。寵教之祭起也。吾主以身爲天主羊羔。定彌撒大禮。作馨香祭獻。斯祭也。始於晚餐後。終於十字架上。天下後世彌撒皆爲斯祭之繼續。吾人欽崇天主。感謝主恩。補己罪過。求主寵佑。皆賴乎是。故吾主甚願與已徒行此巴斯卦禮。路加二十二篇而定斯大典也。今日聖教諸信者。亦行吾主之巴斯卦禮。領聖

體、食天主羊羔、記念主建定斯禮之期。我卽當預備我心、深發我信、望謙遜嚮慕之情、以恭行斯禮。向至愛之耶穌、求賜畢盡所願。
祝言

第四十五 耶穌付神而崩

瞻禮六

定像 想見吾主在十字架上、付託己神於聖父。天昏地震、萬物悲傷。

特求 求主賜我聖寵、堅我立功補過之心、痛哭耶穌苦難。

第一端 耶穌大聲曰、父、我神付於爾手。路加二十三篇曰、父者孺慕之語也。所以調劑臨終苦楚、益增倚賴之心。曰、我神付於爾手者、言前日爾手造斯靈、付我、合我身、以榮爾事爾。今將離此身、歸爾。我今付於爾手、置於爾懷、以待予復生之期也。余靈、此吾主付神於聖父

之言，實爲我日備善終之助，亦爲臨終時，人將以醒我之言。我當習誦而慎思之，庶幾臨終時，乃能誦之於口，而念之於心。聖亞大納削謂吾主向聖父曰，我神付於爾手者，其時亦以世人之靈，託於聖父。故我可合吾主之心而誦其言，且於每晚臨臥之際，敬誦此言。

第二端 言畢，俯首斷息而崩。同上吾主爲人背叛，受盡侮辱而死。然甫死，萬物鳴其無辜，揚其光榮，顯其爲天主子之尊。百夫長見主死後奇異，明知主死出於自願，卽曰此實義人。同上此實天主子。瑪爾谷十七篇吁嗟余靈，天主子死矣。自有此死，永生之害已除，永生之門已啟。耶穌死矣。自有此死，聖心被刺，血水併流，聖教會諸恩寵，遂從此流注。而人靈可得潤澤，至於世終。耶穌死矣。聖身懸在十字架，而聖靈已往靈薄，賜古聖人受享救贖洪恩。噫，聖靈聖身，爾爲愛

我受盡艱難。我將何言。我將何報。惟有朝拜爾。感謝爾。慶賀爾。諸難已畢。且與爾立約。日後死我偏私。死我惡情。及諸不合爾意之事。惟願合於爾旨。活於爾心。時深痛悔愛主之情。恪守端莊靜默之規。

第三端

吾主崩後。聖殿帷帳自裂。塚墓自闢。見者驚愕。且拊胸曰。此人真天主子。

瑪竇二十七篇。路加二十三篇。余靈注視吾主死後之

身。而潛心細想。視其目。乃常眷憐我人。爲人罪而多流涕淚者。今已瞑矣。視其口。乃常光榮天主。訓誨愚蒙。安慰憂苦者。今已默矣。視其手。乃常降福孩童。施惠眾人者。今皮肉破碎。穿以鐵釘。而不動矣。視其足。乃常遵聖父之命。跋涉道塗。憫憐亡羊。而追尋之者。今筋骨顯露。釘於十字架。而不行矣。視其全體。乃聖神全能所造。聖母淨血所成者。今爲榮主救人之故。業已受千般苦辱。致命捨生矣。思及於此。

我欲報主聖身代死之恩，將履行私省，善用五官百肢。今獻吾主寶死於聖父，賜我克成斯願。祝言

第四十六 耶穌殮葬石墓

瞻禮七

定像 想見若瑟與尼各得睦等人，卸下吾主聖身，殮以白布，葬於石墓。

特求 求主賜我聖寵，俾我善度此封齋末日。

第一端 若瑟購練布，卸下聖屍。尼各得睦市香液百斤，濡沫之。殮以練布。路加二十三篇，若望十九篇。主受難時，人人棄絕，無有憐之者。既死後，有若瑟等爲之殷勤厚葬。可知爲主被難，暫時苦辱，天主未嘗忘之，終將榮之也。夫若瑟等取吾主聖身，如何敬慎，在旁聖母聖女等，如何熱心感激。問我見司祭開聖龕，送聖體時，能如是懇誠乎。

傳以香液、殮以白布。此皆訓人領主聖體、當如何修飾己靈。白布、心靈之潔也。香液、諸德之馨也。裹首束身、思念聖善、謹慎五官也。獻我身靈於主、卽至爲主致命、亦所不辭。今值大瞻禮前日、雖事務難免紛繁、仍當不失我沉潛之修。

第二端 近有囿、囿內有新造之石墓、置耶穌於此、用大石扃墓門。若

望十九篇、瑪竇二十七篇、瑪爾谷十五篇、吾人之心、爲藏主聖身之活墓。旣新以聖洗聖事、如新造之壽壙、兼宜新以補贖神工、如墳之四面皆石、磨磋甚平、使纖塵不入、防損吾主聖身。又宜勤行善功、如囿旁多樹花木、景色清幽、更宜大石扃門、堅持其志、剛毅而行、致仇讐不能肆其陰謀。看聖母等旣葬耶穌、中心慘戚、若不忍捨之而去者。此訓我於領主後、亦當耿耿於懷、不忘主恩也。日內每思明日主

將臨格，我當何以修整吾靈。

第三端 明日，撒責首與法利色義俱聚比辣多前。請曰：憶彼誑者嘗曰：我三日後必復活。今懇命兵守墓三日，恐其門徒密來盜屍，乃向民言復活。如是，則後謬大於前矣。比辣多曰：爾輩有兵，令往守之，可也。其人往封墓石，命兵防守。瑪竇二十七篇自有此舉，不但人欲盜主屍而不得，且欲近主墓而不能。蓋主仇之意，欲釋心中憂慮，決主斷無復生之事，使國人信主言爲謬，深其憎惡。豈知正因有兵防守，而主之復活，益得昭彰，且使天下後世，皆無疑議。噫，人以淺陋之見，思拒天主上智之行，何其不知量也。我當稱揚主智，專務主榮。雖有死亡之憂，然有復活之慰。知主亦將拔我於荒塚，轉我於常生也。求主堅我信望諸德。 祝言

第四十七 耶穌第二日復活 主日

定像 想見吾主出自聖墓，光榮至極。

特求 求主賜我善心之真樂。

第一端 神樂繇於吾主 耶穌已復活，不在茲。瑪爾谷十六篇此天神謂聖女之言也。聖女瑪達肋納等清晨往墓，心中不勝愁悶。及聞耶穌復活之語，其慰何如。聖教今日於彌撒內，及瞻禮經文中，多誦耶穌復活之句。誠以耶穌爲吾王吾主，前日念其苦難，憶其慘死，致我心悲。今思其復活，念其榮光，日後不能再死，且享無窮之福。天主聖父畀伊上天下地萬物之權，吾能不倍增神樂，歡欣踴躍，慶之賀之，而誦亞肋路亞哉。且此歡躍之情，大爲修德立功之助。能如是，則修業之難者，亦視爲易。十字架之重者，亦覺爲輕。在事主之途，不但

步武而前，且得奔趨而進。更可慰者，諸凡行事，能愈悅主心，而益加其功。保祿宗徒曰：天主愛欣然而與者。致哥林多人後書九篇是也。慶賀吾主復活之榮。求主賜我神樂。日中如見吾主復活之榮，而欣然行天主之事。

第二端 神樂繇於聖母 吾主復活後，先現於聖母。經史雖未明載，然事有無庸疑者。當吾主顯現之時，聖母見聖子身力壯健，容顏光艷倍前，千萬神聖侍其左右，心中喜樂，神靈歡慰，非人思念所及，更非人筆舌可宣。然母之苦與樂，亦子之苦與樂也。聖母爲我母，今喜樂吾主之復活，吾自當與之偕樂。至論樂之長短，則視我前日與聖母同苦之淺深，更視我平日孝愛聖母之勤惰。今既與聖母同樂，宜不惟樂於一時，且宜樂於終身。如是，庶可獲第一端所思之神益。可

向聖母曰。天上母皇歡樂。亞肋路亞。爲我等轉達聖子者。亞肋路亞。賜我廣沾其復活之恩。亞肋路亞。定志每日善誦此經。

第三端 神樂繇於吾人 耶穌復活。爲吾人復活之像。復活之憑。思念及之。能不自欣自慰。且此非特爲諸聖大師之論。實爲聖教會信德之端。保祿宗徒曰。復活耶穌者。將賜吾偕耶穌同復活。致哥林多人後書四篇又曰。吾將偕耶穌同王於天。致第莫德書三篇既知此義。則世患自不攪心。卽有死亡之禍。亦不覺爲苦。當以此理常存我心。庶免多少憂愁纏擾。卽有困苦及身。可曰。我信肉身之復活。我信常生。向復活之耶穌。求賜誠信堅望。祝言

第四十八 耶穌聖身四奇

瞻禮二

定像 想見吾主聖身復活後。殊福殊榮。神光燿燿。

特求 求主賜我聖寵、使能識主聖身之榮、倍益忻賀之情。

第一段 無損 吾主聖靈重合其身、既得復生、又得無損之奇。前日備嘗辛苦、歷受艱難。今日百體完美、莫能損傷、莫能飢渴、無憂愁之動、無寒暑之侵。諸患俱無、不能再死、至於無終。按人性而論、吾主先行謙卑、受苦受辱、尊榮聖父、救贖世人、而後得此殊恩。吾欲偕享榮福、自當偕受卑苦、同補主榮、同償罪債、然後可也。且同主受苦愈多、愈得共其復活奇恩。保祿宗徒曰、我待救世主耶穌基利斯督重來、彼將化我卑賤之體、象其榮光之身。致斐理賓人書三篇人能悟其理、而會其意、福哉。吾當深信此理、艱苦時、可以斯意自勉。

第二段 輕快透實 榮光之體、迅如明悟。明悟在地、瞬息達天。又如天神、頃刻自天至地、自東徂西、無物能阻其快。且其與厚實之物同

處如地如山如石，俱能透達，而不必開路。試思吾主復活時，莫爲之開墓前之石，而聖軀已出乎墓。復活後，頻顯門徒，而不啟戶牖。吾儕將來，苟得義人之復活，亦能有輕快透實之恩。保祿宗徒嘗曰：今重濁之身，將復活如神。致哥林多人前書十五篇所急者，惟先活如神之命。將肉身之私，全伏於神靈權下，而爲精於內修之神人。

第三端 光明 耶穌復活後，身體極光極美。天主性之光耀，充於其靈，溢於其身。身發之光，太陽不覺爲麗。觀於大博爾山，吾主顯聖容時，可畧知之矣。義人復活後，肉身之光明亦類是。此身在世，愈苦愈勞，愈受挫折，則異日發光愈耀。保祿宗徒曰：聖人之光，一若太陽，一若太陰，一若星辰。致哥林多人前書十五篇聖奧斯定解曰：光對聖人之功，有上中下之分，光有日月星之別也。定志以後，堅恒我善志，

無損也。敏捷於事主，輕快也。通徹乎神修，透實也。懿行嘉言，德輝發外，光明也。賀吾主復活之榮，謝聖父賜聖子人性之奇。祝言

第四十九 耶穌聖傷痕跡 瞻禮三

定像 想見吾主聖體五傷，異光四射。

特求 求主賜我識其存此傷痕之故，恆沾聖傷神益。

第一端 聖傷爲榮福之源。世間元戎勝敵後，奏凱還朝，以所受之傷爲榮。吾主復活後，留五傷痕跡，亦此意也。吾主聖身之榮福，實受傷釘死以得之。今留此傷痕，正欲人珍重世苦，勉人先與之偕苦，庶後與之偕榮也。許多聖賢默想吾主苦難，注視吾主五傷，大發激勵之情。厭世人爭求之榮祿，除自己私欲之牽連，欣慕吾主謙抑之表，切願共吾主苦難，分吾主辛勞，以肖似吾主爲快。保祿宗徒曰：我於

吾主耶穌十字架外，不願有光榮。以吾主之故，我於斯世，斯世於我，彼此已如釘死。致加拉他人書六篇謹記此訓，凡遇拂意之端，當安心忍受。

第二段 聖傷爲憂苦之慰 吾主留此五傷，亦欲吾不忘其愛人之情。念其爲人所受之苦，而以此五傷爲吾憂苦之慰，劣弱之強。維此五傷，真爲贖我之五寶，印我之五號，盼我之五眼，飲我之五泉，援我之五綆，升天之五門。吾主爲我具如是大恩，尙憂何恩求之不得。每慨神靈枯槁，德業荒蕪。遇三仇誘惑時，恆恐心志搖動，力量虛微。問何處可望諸患之平，諸病之愈。吾確告汝曰，惟在吾主五傷。聖奧斯定有言，我疾之藥，莫有靈於主之五傷者也。求主藏我於聖傷中，於誘惑艱辛之際，赴吾主五傷之內。

第三端 聖傷爲罪人之怖 吾主留此五傷，爲將來審判之日，大增惡人羞愧。因惡人辜負吾主苦難，妄用吾主救贖之恩，而善靈則反是用吾主五傷之功，救靈贖罪。賴吾主五傷之寵，修德立功。卒見吾主五傷之榮，享無窮之福樂何如也。余靈爾願在此善靈數中，當先效法受傷之耶穌，然後可。由是臨終時，口親吾主五傷，定多神慰。去世後，目親吾主五傷，永長歡樂。今可朝拜聖傷，感其莫大恩功，納我身靈於肋旁傷內。求此傷中之火，爍熱我心，使我時酬其愛，永享其福。向耶穌五傷，誠求俯允。 祝言

第五十 耶穌復活之益 瞻禮四

定像 想見吾主謂我曰，壯爾心志，予已勝世矣。若望十三篇
特求 求主賜我聖寵，使我得其復生之益。

第一端 吾主復活爲我信德之基 吾主敷教三年，每以己身復活之端，徵己天主之性，與己教道之真。卽如德亞人陰謀詭計，亦祇欲誣滅吾主復活之真跡。誰知吾主復活之奇，於茲益顯。且使天下後世，無可疑議。故宗徒等始傳聖教，卽以吾主復活爲信德之基。保祿宗徒謂時人曰：若基利斯督未嘗復活，我教空虛，爾信亦空虛。致哥林多人前書十五篇：今天下信此聖跡最真，無數致命聖人，爲之捨生傾血，亦所不惜。吾旣得生於斯教，又因聖召之恩，沾信德，無數神光寵錫，當感激吾主，且慎厥躬修，以證此信德，務於今日諸行，存知恩感愛之心。

第二端 吾主復活爲我復活之憑 吾主自死復生，不能再死。日後我之肉身，亦將復活。倘我慎厥躬修，亦可得永福長生。此二端皆係

信德之理，毫不可疑。保祿宗徒曰：眾人因亞當而死，因基利斯督而生。致哥林多人前書十五篇又曰：復活耶穌者，將賜吾偕耶穌同復活。致哥林多人後書四篇又曰：若與耶穌同難，將與之同榮。致羅馬人書八篇余靈思念及此，此身殊可自慰也。人每畏死後，臭爛歸灰。抑知來日，將復得生活，精力將較前益健，而永無死日。榮福將倍勝於世，而時新其樂。蓋天主爲無窮福樂之源也。如是，則世之疾病，不但不足爲憂，且可大慰我靈，而爲我心喜悅之資。今須發信德之情，曰：我信肉身之復活，我信常生。慎於德行之途，勿爲艱辛敗志。

第三端 吾主復活爲我任勞之勸 人情見居室頽圯，心中未免抑鬱。有人爲之復新堂構，華美倍前，自將變憂爲喜矣。夫人之肉軀，係靈魂之寓所，脆軟之物也。思其死後速朽，不禁慊然於心。然幸賴天

主德能、此身於灰塵中、仍將復活。其堅強華麗、較勝於今。可證之以保祿宗徒之言曰、倘今世之居潰倒、天主將與我在天永久之居、非人手所作者。致哥林多人後書五篇又曰、吾主將化我死亡之軀、服不可死之體。致哥林多人前書十五篇余靈、爾既信此真理、則不應畏勞避苦、過惜此身。若爲光榮天主、助救人靈、卽減暫生年數、亦可欣然。須偕保祿宗徒曰、基利斯督爲我生命、其死爲我利益。致斐利賓人書一篇求主賜我明斯意義、能得吾主復活之益。祝言

第五十一 耶穌復活之訓

瞻禮五

定像 想見聖保祿宗徒謂我曰、吾主耶穌既自死復活、汝當度更新之生命。

特求 求主賜我聖寵、俾德業日新、一如死而復活。

第一端 耶穌已復活。瑪爾谷十六篇經言吾主復活，猶言主已出墓，脫斯生之苦，活維新之命，享純全之福。我度吾主復活慶期，亦當出前罪之幽塚，去習慣之愆尤。平素於神業，淡而無味，今後踴躍欣勤，樂於主事。身靈清潔，品詣純全。卽無心之過，亦日行減少。靈魂鼎新，革故，先後宛若兩人。是宗徒保祿聖經之訓也。曰：耶穌爲己聖父之榮，已自死復生。我當度靈魂新命，而日新其德。致羅瑪人書六篇求吾主增我靈性之光，神力之強。思何者爲我常犯之病妨害新德者，速卽改之。

第二端 主真復活。路加二十四篇經言吾主復活，非如先知撒莫厄爾，現於撒烏爾王，惟有復活之影。亦非如辣匝祿，不過暫時復活，他年不免再死。經曰：主真復活，乃卽聖保祿所云，基利斯督自死者中，一復

其生，永無再死，再不屬於死之權下。致羅瑪人書六篇吾神靈之復活，亦當如是。心地之冷者，化而爲熱，神味之淡者，變而爲濃。日新其德，又當至終不怠，不敢再陷於前日之非。欲行斯願，必須懇切祈主，賜我心堅志毅，不爲物欲動搖。尤宜謹慎細行，畏避素陷之失。如好與人閒語，虛廢時光，行事靡常，輒易所定之修規，及種種放縱五官，不謹守外面之莊重，皆是。

第三端 而現於西滿。同上吾主復活後，顯現於人，示人復活之據。以此原舊肉身，前日被釘而死者，出於石墓。四旬之久，現於宗徒，及諸弟子。且與之共飲食，同言笑。令其目視手足釘迹，手探肋旁傷孔，使彼信識已真復活無疑。此又爲吾神復生之式。所謂吾神復生者，不但在天主目中，靈魂宜去舊更新，一如死而復活。且宜於師長昆季

之前，示爾嘉言善行，使皆見爾不蹈前轍，不犯舊惡。於是得眾心悅服，而光榮在天聖父。今當慶主復活之喜，獻爾善心之志。求主助爾常存德行之新。祝言

第五十二 耶穌聖墓之榮 瞻禮六

定像 想見天神如衣白少年，護守主墓。
特求 求主賜我聖寵，能輕忽世幻。

第一端 世榮終於墓主榮始於墓。世多好名之人，行事每干人榮譽。一至死瘞墳墓，其榮何在。雖或有人稱頌，究於彼何益。聖奧斯定曰：受讚於其不在之處，受刑於其所在之地，如是而已。吾主之榮異是，一生求聖父之榮，自受無數凌辱，然愈辱於前，乃愈榮於後。而其榮適始於墓，億萬神聖擁護吾主聖靈，至聖身埋葬之處，見其復活。

之榮、揚其救贖之功。而其墓之受人朝謁者、一千九百年於茲矣。人奉吾主、輕視世榮、甘受人辱、迨復活之日、亦將見其光榮。且其所葬之墓、亦將示其光榮。吾知此理、而猶未免縈懷世榮、心拂世苦、當自謙自悔、而務全死我世俗之心。

第二端 世祿終於墓主祿始於墓 有賢王臨終、謂左右曰、今日者金銀玉帛、田園屋產、皆在我掌握。文臣武將、惟我命是從。曾未幾時、於我何有、一抔之土而已。畢生專心世務、終期既至、乃毫無可恃。是堪痛已。吾主則生於馬槽、死於十字架上、在生貧乏、一無所有、及死而葬。聖保祿謂其受萬物之產、致厄白肋人書一篇、聖若望謂有判眾之權。聖若望五篇是何富且貴也。愛慕吾主、效法吾主者、身修甘貧之德、心超塵埃之外、亦祇欲死後似吾主耳。主嘗曰、凡爲予而棄

其房屋，捨其田疇者，將受百倍，而獲長生。瑪竇十九篇既知此理，而猶戀情世虛，不思受祿於天，豈不愚哉。求主助我修全神貧之德，專務法主儀型。

第三端 世樂終於墓主樂始於墓 多慾之人，在世逞肉身之歡娛，尋偏私之適意。一朝長逝，而昔時之快樂，皆爲永火之薪材。聖奧斯定曰：歡於瞬息，苦於永遠，誠哉是言。一思夫後日自墓而出，靈魂肉身將同受永刑，其酸楚更覺無比。吾主之樂，大不類是。畢生擔荷人罪，憂心冲冲。一旦自死而復活，無數神聖相隨稱賀，其樂如何。善人生平效法吾主，迨死候臨身，欣喜曰：諸苦已畢，諸事已終。可與達未聖王曰：主轉我涕泣爲歡。聖咏二十九篇亦可與聖保祿宗徒曰：吾善戰我敵，終行我程。今茲無他，惟俟主賜我義德之冕。致第莫德後

書四篇余靈、將此實理、銘刻爾心、自不羨此生之快樂、而喜行苦刻之功矣。今茲心嚮神往、朝拜主墓、向光榮莫比之耶穌、求賜終時之榮光歡樂。祝言

第五十三 聖母憂樂異情

瞻禮七

定像 想見天神環繞聖母、唱聖母喜樂經。

特求 求主賜我聖寵、使我今與聖母同憂、後與聖母同樂。

第一端 聖母心憂 設有爲母者於此、惟舉一子、最爲鍾愛。忽被人手刃、一朝永訣。則其中心傷痛、自不待言而喻。至仁聖母、一心惟愛耶穌。及吾主既死且葬、不得相見、心中憂苦、誰能縷述。蓋吾主自埋葬至復活、雖不周二日、而其間聖母望主復活、欲見聖子之情、可謂無一息忘懷。吾儕寓此竄流之地、而於歆羨吾主、享見聖容之願、淡

然無覺者何哉。信望不堅，愛德不熱，故也。當感發衷情，可如多默更比曰：吁，耶穌，永光之耀，旅靈之慰。願卽至我貧獨之人，使我歡樂。願伸厥手，提救苦人於諸窘難中。求爾卽來，求爾卽來。蓋爾不來，無一日一時之可樂。師主編三卷二十一章定心立志，務絕世物之牽纏，割肉身之依戀。

第二段 聖母心樂 聖史紀納應有孀婦，生一子，病亡，異常悲慟。主命復活，以還其母。 路加七篇母乃抱之於懷，心中歡慰，不言可知。聖母見主復生，身體極光極美，將前日悲傷之心，翻作不可勝言之樂。且前日悲傷愈慘，今日歡樂愈深。達未聖咏曰：主，寬慰予靈，如予心痛苦之多。三十九篇是可爲聖母吟也。世人皆好安榮，畏苦辱，然安榮有所由來，苦辱是也。先難後獲，事理之常。基利斯督先受苦，後享

其光榮。路加二十四篇吾主之訓也。我須輕視世上虛幻，在憂苦中，含忍克己，以師法吾主。

第三端 聖母憂樂迭更 吾主復活後，四十日中屢現於宗徒及諸弟子，可知其現於聖母，當非一次。然其忽來忽往，顯現之時無多。故聖母得見聖子，愈覺歡欣愉悅。不見聖子時，則愈覺怒如調飢。於是聖心憂樂，互相迭更矣。天主待己臣僕，每無一定境遇。時而賜以安慰，時而加以愁苦。時而神味旨甘，時而心靈憔悴。吾儕惟當堅定志意，砥礪躬修。此固神師之訓，亦聖母之遺表也。求聖母、賀聖母、誦其喜樂經，而咀嚼其句義。 祝言

三月十九日 大聖若瑟

定像 想見聖人懷抱耶穌，目注聖母。

特求 求主增益我敬愛聖若瑟之心。

第一端 聖若瑟之尊榮 聖若瑟之尊榮莫比。我欲知之。當思天主擢之於至聖至高之品。爲天主聖母之淨配。天主降世成人之義父。且思聖人恩受天主默啟。明達降生奧理。多蒙逾格寵恩。以準其所任之職。亦思聖若瑟被天主聖神稱爲義人。瑪竇一篇惟其善用主寵。而一生所立之功德。寔至極崇高。更思在世之功。必爲天上光榮之權量。經云。天主度量各人之功。行以報。瑪竇十六篇逐思此理。可知聖母後。惟聖若瑟與天主最爲親近。而所求者。宜無不得矣。蓋吾主一生行事。常遵聖若瑟之意旨。而今在天。豈有拒其求之理乎。是故我當虔心倚賴聖人。庶能如先聖前賢蒙其轉達。得承所望諸恩。聖女德肋撒嘗云。我有求於聖若瑟。而不得其恩者。未之記憶。且每

思因聖人轉求，多蒙主錫，不禁自深駭異。蓋天主賜諸聖人助佑吾人，若有定限。而聖若瑟主保吾人，自我觀之，全無拘係。吾主似欲告人在世屬其權下者，在天無不如其懇請也。我宜恭賀聖人，感謝前恩，託我身靈，求爲主保，崇其敬禮。凡遇艱憂誘惑，熱心倚賴聖人。

第二端 聖若瑟之福寵 聖若瑟一生福寵，千古聖人，莫可與之爭衡。因其不但得聖母爲之陪伴，爲之輔助。且三十年得與耶穌親炙，與之締交，與之出入，與之作息，未嘗須臾離也。其殷勤作苦，供養聖家，固不免劬勞。然每思心身之瘁，悉爲耶穌。知耶穌鑒其辛勤，爲其酬報。自覺雖苦亦甘，雖勞亦慰。及其將死，得耶穌聖母在其左右，扶持撫慰，送其善終，尤樂何如也。思此，孰不羨聖若瑟之福寵。不知我所有之福寵，寔有相類於是者。所居之院宇，非可比納匝勒之居乎。

聖母不爲我主保乎。耶穌在聖體中，豈不與我同斯殿屋。我不可隨時與之言談，與之交際乎。我夙夜勤劬，豈不爲吾主之故。豈不知吾主今者見我辛勞，後日爲我賞酬乎。若我能效法聖人之生，必將得聖人之死。今偕聖人竭誠事奉耶穌聖母，可望聖人同耶穌聖母輔助我於終時，而得安死之恩。故我當欣喜奮振，自勵前修。今日聖人瞻禮，在其臺前，矢志忠恒。法其謙遜，順命，含忍，勤敏，克己，虔心諸德。奉爲生前死後之主保。屢次呼號曰：耶穌瑪利亞若瑟，我心我靈我生命，皆獻於爾等。乃向聖若瑟，求爾所欲。祝言

三月二十五日 聖母領報

定像 想見嘉俾厄爾天神，朝拜童貞瑪利亞，告以天主特選爲母。特求 求主賜我於斯瞻禮當有之情。

第一端 天主當日有何賜於聖母 天主是日賜於聖母者、卽遣至
大天神之一、拜禮之、稱賀之、告伊爲天主於無始際特選之女、將爲
天主降生之母。又天主於斯日賜於聖母者、加滿其向日所賜之寵、
致其聖德高出於九品天神之上、而成降生莫名之奧於其身。一如
路加所記、維時天主遣天神嘉俾厄爾詣加利勒亞地納匝肋府、朝
報童女名瑪利亞、神入室朝曰、亞物滿被額額辣濟亞者、主與爾偕焉。
女中爾爲讚美、將懷孕生子、立名時稱之耶穌、厥位大位、厥稱至高
者之子、瑪利亞自天神口、知天主母之位、無礙於童貞之守。乃允諾
曰、主之婢女在茲、希惟如爾之言、致成於我。於是如聖若望所謂物
爾朋降生爲人、居我人間。路加若望一篇思聖母身盈聖寵、位尊神
聖、猶自稱主之婢女。我無德無功、心神匱乏、而意念間、每自以爲大。

且聖母寧欲完守其貞，不羨爲天主之母。而我每怠於清修，不畏神形之瑕玷。何我之不肖於聖母也。懇其轉求賜宥，輔助我法其諸德。並賀其今日所承之榮寵。求其將滿被之神恩，稍分於我。念其爲天主聖母，實爲救世之母，更求其普濟同人。

第二端 天主因聖母有何賜於人。天主於是日以其聖子賜我人類，用證其至愛於人。經曰：天主愛人，若是其甚，付人以惟一子。欲人得免恒苦，得享常生。若望三篇然斯天主子之付於吾人者，實惟聖母是賴。經又曰：瑪利亞生耶穌，聖德純備，其稱天主之子，是也。瑪竇路加一篇我思天主降生之義，自當激發衷情，感主洪恩。感天主聖父，以己至愛，付己聖子於人。感天主聖神，以己全善，成斯神妙之奇。感天主聖子，以己至仁，屑畀於童貞之胎，生而爲人，賜吾人類厥天

主性。感童貞聖母，以己至慈至悲，甘願任天主母之職，生我救世者，助聖子始其救贖之功。且以我感激之情，證於實行。一、致力以獲天主之心。卽如聖保祿曰：修聖爾身，斯乃天主之意。致得撒羅尼人前書四篇二專誠奉救世主爲師，法其降世時所豎之表。三、盡心孝愛聖母，不忝爲其佳兒。如是，則庶乎其可也。謝聖母以我之故，歷受天主母之苦辛。求其於聖子前，作我主保。賜我所有善心美意，篤志力行，不負吾主降世時一片苦心。玩味聖母經句。祝言

24

212214

